

契丹國志

[宋] 葉隆禮 撰

李西寧 點校

進契丹國志表

臣隆禮上言：伏惟契丹立國，強盛逾二百年；秘苑脩書，鑒誠垂億千代。不量愚瞽，冒瀆淵聰，臣誠惶誠懼，頓首頓首。恭惟皇帝陛下天挺英奇，神資睿聖，縱觀前史，紆覽宏圖。印五帝三王之心，有意建極；陋三國六朝之事，奚取亂華。然道判汙隆，載存嫩惡。中朝不競，漠北方勇於爭衡；五閩紛拏，瓊廬遂安於徙宅。載觀大遼之紀號，其誰小朝以自居。八際洪流，頓起興亡之慨；九州重霧，忍無夷夏之嗟。其契丹國自阿保機初興，迄于天祚之亡，立統承家，凡二百餘載。臣奉敕命，謹採摭遺聞，刪繁剔冗，緝為《契丹國志》以進。淺短自慙，筆削莫措。尊王而黜霸，庶幾有補於將來；外陰而內陽，益宜永鑒於既往。所有《契丹國志》隨表繕進以聞。臣誠惶誠懼，頓首頓首，百拜昧死謹言。

淳熙七年三月日，秘書丞臣葉隆禮上表。

契丹國初興本末

契丹之始也，中國簡典所不載。遠(夷)[裔]草昧，復無書可攷，其年代不可得而詳也。本其風物，地有二水。曰北七里没里，復名陶猥思没里者，是其一也，其源出自中京西馬孟山，東北流，華言所謂土河是也。曰袞羅箇没里，復名女古没里者，又其一也，源出饒州西南平地松林，直東流，華言所謂潢河是也。至木葉山，合流為一。古昔相傳：有男子乘白馬浮土河而下，復有一婦人乘小車駕灰色之牛，浮潢河而下，遇於木葉之山，顧合流之水，與為夫婦，此其始祖也。是生八子，各居分地，號八部落：一曰祖皆利部，二曰乙室活部，三曰寶活部，四曰納尾部，五曰頗没部，六曰內會難部，七曰集解部，八曰奚嗚部。立遺像^①。于木葉山，後人祭之，必刑白馬殺灰牛，用其始來之物也。後有一主，號曰迺呵，此主特一髑髏，在穹廬中覆之以氈，人不得見。國有大事，則殺白馬灰牛以祭，始變人形，出視事已，即入穹廬，復為髑髏。因國人竊視之，失其所在。復有一主，號曰嗚呵，戴野猪頭，披豬皮，居穹廬中，有事則出，退復隱入穹廬如故。後因其妻竊其豬皮，遂失其夫，莫知所如。次復一主，號曰晝里昏呵，惟養

羊二十口，日食十九，留其一焉，次日復有二十口，日如之。是三主者，皆有治國之能名，餘無足稱焉。異矣哉！糞中枯骨，化形治事；戴猪服豕，罔測所終。當其隱入穹廬之時，不知其孰為〔之〕主也，孰為之副貳也，荒唐怪誕，訛以傳說，遂為口實，其詳亦不可得而詰也。自時厥後，牛馬死損，詞訟龐淹，復遭風雨雪霜之害，中遂衰微。八部大人後稍整兵，三年一會，於各部內選雄勇有謀略者，立之為主，舊主退位，例以為常。至阿保機為衆所立，後併七部而滅之，契丹始大。原其立國，興自阿保機，至耶律德光而寢張。遭五季之衰，天未厭亂，石郎胎孽，產禍諸華。毒痛四海，飛揚跋扈，貪殘僭擬，中國帝王名數，盡盜有之；冠履倒植，薰蕕共染，干戈之慘極矣。迨宋真宗屈己和戎，不復以一矢相加遣，含容覆護，百有餘年。聖、興、道三主^②。以來，天誘其衷，革心慕義，貪婪歲幣，顧惜盟好，銷烽寢柝，號稱無事，南北民不知兵，各保首領以沒，茲非以德懷遠之明效歟？嗟夫，宋列聖之兼愛，其德可謂至哉！若遼之威服諸夷，奄有全燕，何其強也。天祚昏庸，女真生心，深入一呼，土崩瓦裂，何其弱也。且佳兵者，不祥之器也，天道好還，盛極而微，理固然也。故其興也勃焉，其亡也忽焉，悲夫！今撫舊聞，哀其本末，雖未能考其異而訂其同，要之大略，甚不相遠，後之英主、忠臣、志士，游今洄古，可以鑒矣。

①始祖及八子。 ②聖宗、興宗、道宗。

契丹國九主年譜

太祖大聖皇帝^①，梁均王貞明二年丙子稱帝，國號大契丹，改元神冊，辛巳改元天贊，至丙戌天贊六年^②。秋七月崩，在位十一年。

太宗嗣聖皇帝，^③丙戌歲即位，丁亥改元天顯，丁酉改元會同，國號改大遼，丁未會同十一年^④。夏四月崩，在位二十二年。

世宗天授皇帝，^⑤丁未歲即位，戊申改元天祿，^⑥辛亥天祿四年^⑦。秋九月為燕王述輅等弑於新州火神淀，在位五年。

穆宗天順皇帝，^⑧辛亥歲即位，改元應曆，至戊辰應曆十八年，^⑨秋九月為庖人弑于黑山下，在位一十八年。

景宗孝成皇帝，^⑩戊辰歲即位，改元保寧，甲戌改元乾亨，至壬午乾亨九年宋太宗太平興國七年。十二月崩，在位十五年。

聖宗天輔皇帝，^⑪癸未歲即位，改元統和，^⑫癸丑統和三十一年改元開泰，復改國號大契丹，壬戌改元太平，辛未太平十年宋仁宗天聖九年。六月崩於上京，在位四十九年。

興宗文成皇帝，^⑫辛未歲即位，壬申改元景福，^⑬癸酉改元重熙，至乙未重熙二十三年^⑭，八月崩，在位二十五年。

道宗天福皇帝，^⑮乙未改元清寧，乙巳改元咸雍，丙午咸雍二年復改國號大遼，乙亥改元壽昌，至庚辰壽昌六年^⑯崩，在位四十六年。

天祚皇帝，^⑰辛巳歲即位，改元乾統，^⑱辛卯改元天慶，戊辰天慶八年，^⑲辛丑改元保大，至甲辰保大四年，^⑳金太宗舉兵攻遼，天祚逃竄夾山，金國擒之，削封為海濱王，送長白山東，築城居之，踰年乙巳而卒，遼國遂亡，在位二十四年。

契丹自太祖神冊丙子稱帝，至天祚保大甲辰，計九主，在位首末二百一十五年，實歷二百單九年。

- ①諱德，番名阿保機。 ②後唐明宗天成元年。 ③諱德光，元名曷屈之，太祖第二子。 ④北漢高祖天福元年。 ⑤諱阮，番名兀欲，太祖之孫，東丹王突欲之子。 ⑥北漢隱帝乾祐元年。 ⑦後周太祖廣順元年，北漢乾祐四年。 ⑧諱璟，番名述律，太宗長子。 ⑨宋太祖開寶元年。 ⑩諱明記，更名贊，世宗之子。 ⑪諱隆緒，景宗之長子。 ⑫宋太平興國八年。 ⑬諱宗真，番名木不孤，聖宗第八子。 ⑭宋仁宗明道改元。 ⑮宋仁宗至和二年。 ⑯諱洪基，興宗之子。 ⑰宋哲宗元符三年。 ⑱諱延禧，道宗之孫，秦王元吉之子。 ⑲宋徽宗建中靖國元年。 ⑳宋徽宗政和八年，金太祖天輔元年。 ㉑宋徽宗宣和六年，金太宗天會二年。

契丹國志目錄

進契丹國志表	(1)
契丹國初興本末	(1)
契丹國九主年譜	(1)
第一卷	(1)
太祖大聖皇帝	(1)
第二卷	(9)
太宗嗣聖皇帝上	(9)
第三卷	(23)
太宗嗣聖皇帝下	(23)
第四卷	(35)
世宗天授皇帝	(35)
第五卷	(41)
穆宗天順皇帝	(41)
第六卷	(46)
景宗孝成皇帝	(46)
第七卷	(50)
聖宗天輔皇帝	(50)
第八卷	(61)

興宗文成皇帝	(61)
第九卷	(70)
道宗天福皇帝	(70)
第十卷	(79)
天祚皇帝上	(79)
第十一卷	(94)
天祚皇帝中	(94)
第十二卷	(104)
天祚皇帝下	(104)
第十三卷	(111)
后妃傳	(111)
太祖述律皇后	(111)
太宗蕭皇后	(113)
世宗甄皇后	(113)
穆宗蕭皇后	(114)
景宗蕭皇后	(114)
聖宗蕭皇后	(116)
興宗蕭皇后	(117)
道宗蕭皇后	(117)
海濱王蕭皇后	(118)
海濱王文妃	(118)
第十四卷	(120)
諸王傳	(120)
東丹王	(120)
恭順皇帝	(121)
孝文皇帝太弟	(122)

齊國王隆裕	(122)
魯王宗元	(122)
晉王宗懿	(123)
燕王洪道	(123)
梁王信寧	(123)
第十五卷	(125)
外戚傳	(125)
述律魯速	(125)
蕭延思	(125)
劉珂	(126)
蕭守興	(126)
蕭孝穆	(126)
蕭奧只	(127)
第十六卷	(128)
列傳	(128)
韓延徽	(128)
張礪	(129)
趙延壽	(130)
第十七卷	(134)
列傳	(134)
蕭翰	(134)
麻荅	(135)
耶律郎五	(136)
第十八卷	(137)
列傳	(137)
盧文進	(137)
耶律隆運	(138)

劉六符	(140)
第十九卷	(142)
列傳	(142)
馬保忠	(142)
張琳	(143)
蕭奉先	(144)
李徽	(145)
耶律余禛	(145)
大寶	(146)
番將除授職名	(147)
漢官除授職名	(147)
第二十卷	(148)
晉表	(148)
晉出帝降表	(148)
晉李后降表	(149)
澶淵誓書	(149)
宋真宗誓書	(149)
契丹聖宗誓書	(150)
關南誓書	(151)
契丹致宋書	(151)
宋回契丹書	(152)
契丹回宋誓書	(152)
議割地界書	(154)
契丹求地界書	(154)
宋回契丹書	(155)
第二十一卷	(156)
南北朝饋獻禮物	(156)

契丹賀宋朝生日禮物	(156)
宋朝賀契丹生辰禮物	(157)
宋朝勞契丹人使物件	(157)
外國貢進禮物	(159)
新羅國貢進物件	(159)
橫進物件	(159)
契丹回賜物件	(159)
契丹賜奉使物件	(159)
西夏國貢進物件	(160)
諸小國貢進禮物	(160)
高昌國 龜茲國 于闐國 大食國 小食國 甘州	
沙州 涼州 契丹回賜物件	
第二十二卷	(161)
州縣載記	(161)
控制諸國	(163)
四至鄰國地理遠近	(164)
四京本末	(167)
第二十三卷	(170)
族姓原始	(170)
國土風俗	(170)
併合部落	(171)
兵馬制度	(172)
建官制度	(173)
宮室制度	(173)
衣服制度	(174)
漁獵時候	(175)

試士科制	(175)
第二十四卷	(177)
王沂公行程錄	(177)
富鄭公行程錄	(179)
余尚書北語詩	(179)
刁奉使北語詩	(180)
第二十五卷	(181)
胡嶠陷北記	(181)
張舜民使北記	(184)
第二十六卷	(186)
諸蕃記	(186)
奚國	(186)
古肅慎國	(186)
室韋國	(186)
新羅國	(187)
高昌國	(187)
女真國	(188)
黃頭女真	(188)
暕熱國	(188)
渤海國	(189)
第二十七卷	(190)
歲時雜記	(190)
校點後記	(196)

契丹國志卷之一

太祖大聖皇帝

太祖皇帝諱億，番名阿保機，乃斡里小子也，父斡里，為夷離申，猶中國刺史。帝生而拓落多智，與眾不羣。及壯，雄健勇武，有膽略。好騎射，鐵厚一寸，射而洞之。所寢至夜常有光，左右莫不驚怪。部落憚其雄勇，莫不畏而服之。

先是契丹部落分而為八，以次相代。唐咸通末，有習爾者為王，土宇始大。其後欽德為王，乘中原多故，時人侵邊。及阿保機稱王，^①尤雄勇，五姓奚及七姓室韋咸服屬之。太祖擊黃頭室韋還，七部劫之於境上，求如約。太祖不得已，傳旗鼓，且曰：“我為王九年，得漢人多，請帥種落居古漢城，與漢人守之，自為一部。”七部許之。其後，太祖擊滅七部，復併為一。又北伐室韋、女真，西取突厥故地。擊奚，滅之，復立奚王，使契丹監其兵。東北諸夷皆畏服之。梁太祖開平元年，契丹遣其臣袍笏梅老之梁

通好，梁遣太府少卿高順、軍將郎公遠報聘。太祖嘗入攻雲州，衆共三十萬。晉王李存勗，^②與之連和，面會東城，約為兄弟，延之帳中，縱酒握手盡歡，約以今冬共擊梁。留旬日而去，晉王贈以金縢數萬。太祖留馬三千匹、雜畜萬計以酬之。太祖既歸國，更通好于梁。丙子神冊元年。^③是年，阿保機始自稱皇帝，國人謂之“天皇王”，以妻述律氏為皇后，置百官，建元曰神冊，國號契丹。

初，唐末藩鎮驕橫，互相併吞鄰藩，燕人軍士多亡歸契丹，契丹日益強大。又得燕人韓延徽，有智略，頗知屬文。與語悅之，遂以為謀主，舉動訪焉。延徽始教契丹建牙開府，築城郭，立市里以處漢人，使各有配偶，墾藝荒田。由是漢人各安生業，逃亡者益少。契丹威服諸國，於延徽有力焉。頃之，延徽逃奔於晉，晉王欲置之幕府，而掌書記王緘疾之。延徽不自安，求歸省母，遂復入契丹，太祖待之益厚。至是以為相，累官遷中書令、平章事。

丁丑神冊二年，^④春二月，晉王之弟威塞軍節度使李存矩在新州，驕惰不治，邊人嗟怨，為小校宮彥璋謀殺。其裨將盧文進，帥其衆奔契丹。

三月，盧文進分契丹兵馬攻晉新州，刺史安金全棄城走。文進以其部將劉殷為刺史守之。晉王使周德威合河東、鎮、定之兵攻之，旬日不克。太祖帥三十萬衆救之，德威大敗奔歸。太祖乘勢進圍幽州，揚言有衆百萬，旣車毳幕瀰漫山澤。盧文進教之攻城，為地道，晝夜四面俱進，城中穴地燃膏以邀之。又為土山以臨城，城中鎔鐵汁以澆之，日死千計而攻城不止。周德威遣使告急于晉王。

四月，晉王命李嗣源、李存審、閻寶來援德威。契丹圍幽州且二百日，城中危困。晉李嗣源等步騎七萬，會于易州。自易州北行，踰大房嶺，循澗而東。距幽州六十里，與太祖遇。太祖行山上，晉師行澗下，每至谷口，太祖以萬餘騎遮其前，晉師失色。嗣源以百餘騎先進，免胄揚鞭，胡語謂曰：“汝無故犯我疆場，晉王命我將百萬衆直抵西樓，滅汝族類。”因躍馬奪槊，三入陣中，斬酋長一人，後軍齊進，太祖兵却，晉師始得出。李存審命步兵伐木為鹿角，人持一枝，止則成寨。太祖騎環寨而過，寨中發萬弩射之，流矢蔽日，人馬死傷塞路。將至幽州，太祖兵列陣待之。存審命步兵陣於後，先令嬴兵曳柴燃草而進，煙塵漲天，鼓譟合戰，乃趣後陣起乘之。太祖大敗，席卷其衆自北山歸，委棄車帳、鎧仗、羊馬滿野。晉師入于幽州。太祖以盧文進為盧龍節度使，居平州，歲入北邊，殺掠吏民，盧龍巡屬，為之殘弊。

先是，幽州北七百里有渝關，下有渝水通海。自關東北循海有道，道狹處纔數尺，旁皆亂山，高峻不可越。北至進牛口，中國嘗置八防禦軍，募士兵守之，田租皆供軍食，歲致納纈以供衣。每歲早穫，清野以待，契丹兵至，則堅壁不戰，俟其去，則選驍勇據隘邀之，契丹常失利，不能輕入。及周德威鎮盧龍，恃勇不修邊備，遂失渝關之險，契丹始芻牧於營、平之間。盧文進來歸，常居平州，帥奚騎歲入北邊，殺掠吏民，盧龍巡屬，為之殘弊。

戊寅神冊三年。^⑤太祖弟撒剌阿潑，號北大王，謀亂。事覺，太祖數之曰：“汝為吾手足，而汝興此心，吾若殺汝，

則與汝何異？”乃囚之，期年而釋之。撒剌阿潑帥其衆奔晉，晉王厚遇之，養為假子，任為刺史。

己卯神冊四年。^⑥

庚辰神冊五年。^⑦

辛巳天贊元年。^⑧夏六月朔，日食。

十二月，晉王圍鎮州，討張文禮。時義武節度使王處直在定州，以鎮、定為唇齒，恐鎮亡而定孤，乃潛遣人語其子王郁，使賂契丹，令犯塞以解鎮州之圍。乃說太祖曰：“鎮州美女如雲，金帛如山，天皇王速往，則皆為己物也，不然，為晉王所有矣！”太祖以為然，悉衆而南。述律后曰：“吾有西樓羊馬之富，其樂不可勝窮也，何必勞師遠出，以乘危徼利乎？吾聞晉王用兵，天下莫敵，設有危敗，悔之何及！”太祖不聽。遂長驅而南，圍涿州，旬日拔之，擒刺史李嗣弼，進攻定州。王處直之子王都告急于晉王。

壬午天贊二年。^⑨春正月，晉王親率鐵騎五千來攻，先進新城北，半出桑林，太祖見之稍却。晉王之軍來，遂獲太祖之子。契丹兵遂退保望都。晉王至定州，王都迎謁馬前，請以愛女妻王之子繼岌。晉王趨望都，遇奚酋秃餒^⑩五千騎，為其所困，力戰，出入數四，不解。李嗣昭引三百騎橫擊之，乃退，晉王始得出。因縱兵奮擊，太祖兵敗，遂北至易州。會大雪彌旬，平地數尺，人馬死者相屬，太祖乃歸。晉王引兵躡之，隨其行止，見其野宿之所，布藁於地，回環方正，皆如編剪，雖去，無一枝亂者，歎曰：“契丹法嚴，乃能如是，中國所不及也。”晉王至幽州，使二百騎躡契丹之後，曰：“如出境即還。”晉騎恃勇追擊之，悉

為所擒。太祖責王郁，繫之以歸，自是不聽其謀。

癸未天贊三年。^①夏四月己巳，晉王李存勖稱皇帝於魏州牙城之南，國號大唐。是為莊宗。以魏州為興唐府，建東京，又於太原府建西京，又以鎮州為真定府，建北都。時唐國所有，凡十三節度、五十州。

冬十月朔，日食。彗星見，出輿鬼，長丈餘。

是月，梁主均王自殺死。

契丹日益強盛，遣使就唐求幽州以處盧文進。時東北諸夷皆服屬，惟渤海未服。太祖謀南征，恐渤海倚其後，乃先舉兵擊渤海之遼東，遣其將禿餞及盧文進據平、營等州，以擾燕地。師攻渤海，無功而退。

甲申天贊四年。^②春正月，契丹攻幽州。

十二月，攻蔚州，唐遣李嗣源禦之。

乙酉天贊五年。^③夏四月朔，日食。

丙戌天贊六年。^④夏四月朔，唐莊宗如汜水，嚴辦將發，從馬直指揮使郭從謙叛，帥所部兵攻興教門，緣城而入，近臣宿將皆釋甲潛遁，莊宗為流矢所中而崩，年四十三。左右皆散，善友斂樂器覆尸而焚之。是月，李嗣源自罍子谷而入洛陽，拾莊宗骨於灰燼而葬之河南新縣。百官勸請嗣源監國，^⑤既而即位，是為明宗。

七月，唐遣姚坤如契丹告哀。太祖聞之慟哭曰：“我朝定兒也。^⑥吾方欲救之，以渤海未下，不果往，致吾兒及此。”哭不已。又曰：“今天子聞洛陽有急，何不救？”坤對曰：“地遠不能及。”曰：“何故自立？”坤曰：“新天子將兵二十年，所領精兵三十萬，天時人事，其何得違？”其子突欲

在側，曰：“使者毋多言。蹊田奪牛，豈不為過？”坤曰：“應天順人，豈比匹夫之事。”太祖即慰勞坤曰：“理正當如是。”又曰：“聞吾兒專好聲色遊畋，不恤軍民，宜其及此。我自聞之，舉家不飲酒，散遣伶人，解縱鷹犬。若亦效吾兒所為，行自亡矣！”又曰：“我於今天子無怨，足以修好。若興我大河之北，吾不復南侵矣！”坤曰：“此非使臣所得專也。”太祖怒，囚之。旬餘復召之，曰：“河北恐難得，得鎮、定、幽州亦可也。”給紙札筆趣為狀，坤不可，欲殺之，用韓延徽之諫，乃復囚之。

太祖攻渤海，拔其夫餘城，更命曰東丹國，命長子突欲鎮之，號人皇王。^①以其次子德光元名曷羅屈之。守西樓自隨，號“元帥太子”。

先是，渤海國王大諲譔本與奚、契丹為唇齒國。太祖初興，併吞八部，繼而用師，併吞奚國。大諲譔深憚之，陰與新羅諸國結援，太祖知之，集議未決。後因遊獵，彌旬不止，有黃龍在其毘屋上，連發二矢，殪之，龍墜其前。後太子德光於其地建州，黃龍府即其地也。太祖曰：“吾欲伐渤海國，衆計未定而龍見吾前，吾能殺之，是滅渤海之勝兆也。”遂平其國，擄其主。

《紀異錄》曰：阿保機居西樓毘帳中，晨起，見黑龍長十餘丈，蜿蜒其上，引弓射之，即騰空夭矯而逝，墜于黃龍府之西，相去已千五百里，纔長數尺。其後女真滅遼，尚藏其骸於內庫，金西悟室長子源嘗見之，尾鬣肢體皆全，雙角已為人所截，與水龍畫絕相似。蓋其背上鬣不作魚鬣也。正文謂“射黃龍”，此謂“射黑龍”。黃黑色雖不可

知，而符兆所先，抑何彰彰若是歟！

渤海既平，乃製契丹文字三千餘言。因於所居大部落置寺，名曰天雄寺。^③又於木葉山置樓，謂之南樓；大部落東一千里，謂之東樓；大部落北三百里置樓，謂之北樓，後立唐州，今廢為村；大部落之內置樓，謂之西樓，今上京是。其城與宮殿之正門，皆向東闢之，四季遊獵，往來四樓之間。

是月，太祖於夫餘城崩。

述律后召諸酋長妻，謂曰：“我今寡居，汝不可不敬我。”又集其夫泣問曰：“汝思先帝乎？”對曰：“受先帝恩，豈得不思？”后曰：“果思之，宜往見之。”遂殺之。

八月朔，日食。

九月，葬太祖於木葉山。置州墳側，名曰祖州。今有廟，有靴尚在，長四五尺許。謚曰大聖皇帝，廟號太祖。

述律后左右有桀黠者，后輒謂曰：“為我達語於先帝。”至墓所，則殺之。前後所殺者以百數。最後，平州人趙思溫當往，不肯行，后曰：“汝事先帝常親近，何故不行？”對曰：“親近莫如后，后行，臣則繼之。”后曰：“吾非不欲從先帝於地下，顧嗣子幼弱，國家無主，不得往耳。”乃斷其一腕，令置墓中。思溫亦得免。

是月，述律后中子德光立。

論曰：“契丹之興，本自東胡。然人外而獸內，窺轡中原，未若有太祖其盛者也。唐末諸藩霧暗，五嶽塵昏，赤縣成墟，紫宸遷宅。太祖奮自荒陬，馳驅中夏，漲幽、燕而胡塵，吞八部以高嘯，雄亦盛矣。豈天未厭亂，而淫名越

號，亦可帖服諸人歟？不然，何以若斯其鋒也。五胡雲擾，聖鼎終移；拓拔鯨吞，南宇分割。雖曰人事，亦有運數存焉。

- ①崩，謚太祖。 ②唐太祖李克用長子也。 ③梁均王貞明二年。
④梁貞明三年。 ⑤梁貞明四年。 ⑥梁貞明五年。 ⑦梁貞明六年。
⑧神冊六年改元，時梁均王龍德元年也。 ⑨梁龍德二年。
⑩契丹將名。 ⑪梁龍德三年，唐莊宗李存勖同光元年。 ⑫後唐同光二年。 ⑬後唐同光三年。 ⑭後唐同光四年四月，明宗立，改元天成。
⑮嗣源，乃太祖李克用之養子也。 ⑯朝定猶華言朋友也。
⑰一日東丹王。 ⑱今寺內有契丹太祖遺像。

契丹國志卷之二

太宗嗣聖皇帝上

太宗諱德光，太祖第二子也。母曰述律氏。帝誕於大部落東一千里之牙帳。生時黑雲覆帳，火光照耀，有聲如雷。及長，美姿貌，雄傑有大志，精於騎射。平奚、渤海二國，太祖愛之，立為元帥太子。嘗從太祖至西樓，有赤光紫氣蓋其上，左右異之。述律后尤所鍾愛。太祖崩於夫餘，后欲立之，至西樓，命帝與突欲^①。俱乘馬立帳前，謂諸酋長曰：“二子吾皆愛之，莫知所立，汝曹擇可立者執其轡。”酋長知其意，爭執帝轡。后曰：“衆之所欲，吾安敢違？”遂立為天皇王，稱帝，即位。明年，改元天顯。突欲慍，欲奔于唐，后乃遣歸東丹。帝立，尊后為太后，國事皆決焉。太后復納其姪為帝后。帝性孝謹，母病不食亦不食，嘗侍於母前，應對或不稱旨，母揚眉而視之，輒懼而趨避，非復召不敢見也。以韓延徽為政事令。聽唐告哀使姚坤歸國復命，阿思、没骨餒往唐告哀，時唐明宗之初年

也。

丙戌天贊六年。^②九月，帝即位，猶稱天贊六年。

冬十月，盧龍節度使盧文進守平州，唐遣人說之，以易代之後，無復嫌怨，而文進所部華人皆思歸，乃帥其衆十萬歸唐。

丁亥天顯元年。^③春正月，唐主嗣源更名亶。

八月朔，日食。契丹遣使如唐修好。

戊子天顯二年。^④春二月朔，日食。

夏四月，唐義武節度使王都在鎮州謀反，詔招討使王晏球等，發諸道兵會討定州。晏球攻拔其北關城，王都以重賂求救於奚酋禿餒。將名。

五月，禿餒以萬騎突入定州，晏球退保曲陽，王都與禿餒就攻之。晏球與戰，破之。契丹亦發兵救定州，王都悉衆與契丹五千騎合萬餘人邀戰。晏球集諸將校，誓以報國：“悉去弓矢，以短兵擊之，回顧者斬！”於是騎兵先進，奮槌揮劍，直衝其陣，大破之，僵屍蔽野。契丹兵死者過半，餘衆北走。王都與禿餒得數騎，僅免。契丹退師，又為盧龍節度使趙德鈞邀擊，殆無孑遺。

七月，契丹復遣其酋長惕隱救定州，為王晏球逆戰，破之；追至易州，俘斬溺死者，不可勝數。趙德鈞遣牙將武從諫邀擊，擒惕隱等數百人，餘衆散投村落，村人以白挺擊之，其得脫者不過數十人。自是契丹為之沮氣，更不犯塞。

八月，契丹遣使如唐。

己丑天顯三年。^⑤春二月，唐王晏球克定州。王都、禿

餒欲突圍走，不能出。定州都指揮使馬讓能開門納官車，王都舉族自焚，擒禿餒，送大梁斬之。

庚寅天顯四年。^⑥夏六月朔，日食。

十一月，契丹東丹王突欲失職怨望，帥其部曲四十人越海奔唐。唐賜姓東丹，名慕華，^⑦以為懷化節度使。

辛卯天顯五年。^⑧十一月朔，日食。

壬辰天顯六年。^⑨春三月，契丹遣使如唐，請歸擒去〔骨〕舍利煎刺與惕隱。唐乃遣〔前〕骨舍利與契丹使者俱歸。契丹以不得煎刺，自是數攻雲州及振武。

冬十一月，唐以石敬瑭^⑩為河東節度使。蔚州刺史張彥超與敬瑭有隙，聞其為節度使，遂叛降契丹。

癸巳天顯七年。^⑪冬十一月，唐主明宗崩，年六十七。明宗性不猜忌，與物無競，登極以來，每夕於宮中焚香祝天曰：“某胡人，因亂為衆所推；願天早生聖人，為生民主。”在位年穀屢豐，兵革罕用，較之五代，粗為小康。

胡文定公曰：明宗美善，頗多過舉，亦不至甚求于漢、唐之間，蓋亦賢主也。其尤足稱者，內無聲色，外無遊政；不任宦者，廢內藏庫，賞廉吏，治穢蠹。若輔相得賢，則其過舉當又損矣。其焚香祝天之言，發于誠心。天既厭亂，遂生聖人。由是觀之，天人交感之理，不可誣矣。

十二月，唐主從厚立。^⑫葬明帝于河南洛陽縣。

甲午天顯八年。^⑬春正月，唐潞王從珂叛，至長安。唐遣康義誠為招討使，將兵拒之。潞王所至，唐諸將及康義誠等皆降。愍帝憂駭不知所為，領五十騎自隨，出奔。至衛州東數里，遇石敬瑭，問以大計。敬瑭聞康義誠等叛

降，俛首長嘆。未幾，敬瑭命牙內指揮使劉知遠引兵，盡殺愍帝從兵，獨置愍帝于驛，遂趣洛陽。

夏四月，唐潞王從珂入洛陽，至蔣橋，馮道率百官班迎，傳教以未拜梓宮，未可相見。入謁太后、太妃，詣西宮，伏梓宮慟哭，自陳詣闕之由。馮道帥百官班見，拜，潞王答拜。道等上牋勸進，潞王曰：“予之此行，事非獲已。俟皇帝歸闕，闈寢禮終，當還守藩服。”明日，太后下令廢少帝為鄂王，以潞王知軍國事。又明日，太后令潞王即位於柩前。遣王弘贇遷愍帝於衛州廨內，隨遣弘贇之子王欒往鳩之。愍帝不飲，欒縊殺之。帝之在衛州，惟磁州刺史宋令詢遣使問起居，聞其遇害，慟哭半日，自縊死。

胡文定公曰：“歐陽公《五代史》取死節者三人，死事者十人，而不及宋令詢，豈以其君微，其事略，故遺之歟？夫潞王非明宗之子也，愍帝真其國矣。所以不終者，身乏股肱，朝無楨幹，非其罪也。令詢不以其微而廢君臣之義，雖王彥章、裴約何以加焉，是以表而出之。

十一月，唐葬鄂王于徽陵城南，^①封纜數尺，觀者悲之。

乙未天顯九年。^②夏六月，契丹屢攻北邊。時石敬瑭將大兵屯忻州，潞王遣使賜軍士夏衣，傳詔撫諭，軍士呼萬歲者數四。敬瑭懼，幕僚段希堯請誅其倡者，敬瑭命劉知遠斬三十六人以徇。潞王聞，益疑之。

丙申天顯十年。^③夏五月，唐以石敬瑭為天平節度使。敬瑭拒命謀叛，唐發兵討之。

秋七月，唐殺石敬瑭子弟四人。敬瑭令掌書記桑維

翰草表稱臣於契丹帝，且請以父禮事之，約事捷之日，割盧龍一道及雁門關以北諸州為獻。表至，契丹大喜。復書許俟仲秋，傾國赴援。

九月，契丹帝將兵五萬騎，自揚武谷而南。至晉陽，陳於汾北之虎北口。先遣人謂石敬瑭曰：“吾欲今日即戰，可乎？”敬瑭遣人馳告曰：“南軍甚厚，請俟明日。”使者未至，契丹已與唐騎將高行周、符彥卿合戰，敬瑭遣劉知遠將兵助之。唐張敬達、楊光遠、安審琦以步兵陳于城西北山下，契丹遣輕騎三千，不被甲，直犯其陣。唐兵逐之，至汾曲，契丹伏兵起，衝唐兵斷而為二，縱兵乘之，唐兵大敗，死者數萬人。敬達等收餘衆保晉安，契丹亦引兵歸虎北口。敬瑭得唐降兵千餘人，劉知遠勸敬瑭盡殺之。是夕，敬瑭出見契丹帝，問曰：“皇帝遠來，士馬疲倦，遽與唐戰而大勝，何也？”帝曰：“始吾謂唐必斷雁門諸路，伏兵險要，不可得進。使人偵視，皆無之，是以長驅而深入。我氣方銳，乘此擊之，是以勝也。”敬瑭歎伏。引兵會圍晉安寨，置營於晉安之南，長百餘里，厚五十里，多設鈴索吠犬，人跬步不能過。敬達等士卒猶五萬人，馬萬匹，四顧無所之，遣使告敗。唐潞王大懼，下詔親征。潞王至懷州，以晉安為憂，問策於羣臣。吏部侍郎龍敏請立李贊華為契丹主，令天雄、盧龍二鎮分兵送之，自幽州趣西樓，朝廷露檄言之，契丹必有內顧之憂，然後選募精銳以擊之，此亦解圍之一策也。潞王深以為然，而執政恐其無成，議竟不決。潞王憂沮，日夕酣飲悲歌。羣臣或勸其北行，則曰：“御勿言，石郎使我心膽墮地。”

胡文定公曰：龍敏之策必可解晉安之圍，而唐之君臣不能用，豈天固亡之，先褫其魄乎？

冬十月，唐詔大括天下將吏及民間馬，又發民為兵，每七戶出征夫一人，自備鎧仗，謂之“義軍”。凡得馬二千餘匹，征夫五千人，民間大擾。

十一月，契丹帝謂石敬瑭曰：“吾三千里來赴難，必有成功。觀汝器貌識量，真中原之主，吾欲立汝為天子。”敬瑭辭讓數四，將吏復勸進，乃許之。契丹帝作策書，命敬瑭為大晉皇帝，^①自解衣冠授之，築壇即位。割幽、薊、瀛、莫、涿、檀、順、新、媯、儒、武、雲、應、寰、朔、蔚十六州以獻契丹，仍許歲輸帛三十萬匹。制改長興七年為天福元年。敕命法制，皆遵明宗之舊。以趙瑩為翰林學士承旨，桑維翰為翰林學士、權知樞密使事，劉知遠為侍衛馬軍都指揮使，客將景延廣為步軍都指揮使。立晉國長公主為皇后。

胡文定公曰：“石敬瑭之罪在不助愍帝。苟以愍帝失國，則當尊奉許王，不為衛州之事，而歸奪國弑君之惡於從珂，兵以義舉，名實皆正，則其德美矣。乃急於近利，稱臣契丹，割棄土壤，以父事之，其利不能以再世，其害乃及於無窮。故以功利謀國而不本於禮義，未有不旋中其禍也。

契丹圍晉安數月，糧竭馬死，援兵不至。

唐將楊光遠、安審琦勸招討使張敬達降，敬達曰：“吾受明宗及今上厚恩，為元帥而敗軍，其罪已大，況降敵乎？今援兵早晚至，且當候之。若力盡勢窮，諸軍斬我，出降

未晚也。”後諸將畢集，光遠殺敬達，以其首帥諸將出降。契丹主嘉敬達之忠，命收葬而祭之，謂其下及晉諸將曰：“汝曹為人臣，當倣敬達也。”契丹帝與晉高祖將引兵而南，高祖以齊王重貴^③為北京留守，以契丹將高謨翰為先鋒，與降卒偕進。至團柏，與唐兵戰，唐兵大潰，死者萬計。

晉高祖將發潞州，契丹帝舉酒相屬之，曰：“我若南向，河南之人必大驚駭。汝宜自引漢兵南下，我令大相溫將五千騎衛送汝至河梁。余且留此，俟汝音問，有急，則下山救汝。若洛陽既定，吾即北返矣。”因執手而泣別，解白貂裘以衣晉高祖，并贈良馬二十匹，戰馬一千二百匹，曰：“世世子孫勿相忘。”又曰：“劉知遠、桑維翰、趙瑩皆創業功臣，無大故，勿相棄也。”

晉高祖自太原入洛陽，帝親送至潞州。唐樞密使趙德鈞及子趙延壽^④出降。先是德鈞陰遣人聘契丹，求立為帝，帝乃指穹廬前巨石謂德鈞使者曰：“吾已許石郎矣，石爛，可改也。”帝至潞州，鎖德鈞父子而去。述律太后見之，問曰：“汝父子自求為天子，何耶？”德鈞慙不能對，悉以田宅之籍為獻，后問何在？曰：“幽州。”后笑曰：“幽州屬我也，何獻之為？”德鈞益慙。自是鬱鬱不多食，踰年而死。德鈞既卒，國主釋延壽而用之。

《紀異錄》曰：契丹主德光嘗晝寢，夢一神人，花冠，美姿容，輜餅甚盛，忽自天而下，衣白衣，佩金帶，執錯錄，有異獸十二隨其後，內一黑色兔入德光懷而失之。神人語德光曰：“石郎使人喚汝，汝須去。”覺，告其母，忽之不以

為異。後復夢，即前神人也，衣冠儀貌，宛然如故。曰：“石郎已使人來喚汝。”既覺而驚，復以告母。母曰：“可命筮之。”乃召胡巫筮，言：“太祖從西樓來，言中國將立天王，要你為助，你須去。”未浹旬，唐石敬瑭反於河東，為後唐張敬達所敗，亟遣趙瑩持表重賂，許割燕、雲，求兵為援。契丹帝曰：“我非為石郎興師，乃奉天帝敕使也。”率兵十萬，直抵太原，唐師遂衄，立石敬瑭為晉帝。後至幽州城中，見大悲菩薩佛相，警告其母曰：“此即向來夢中神人。冠冕如故，但服色不同耳。”因立祠木葉山，名菩薩堂。德光生於癸卯年，黑兔入懷，此其兆也。中原喪亂，視淵、勸過之。豈陰山之北，天亦固兆冥符而啟嘉瑞歟？

唐主潞王命河陽節度使萇從簡與趙州刺史劉在明守河陽南城，遂斷浮梁，歸洛陽。殺東丹王李贊華。

晉高祖至河陽，萇從簡迎降，舟楫已具。

潞王議復向河陽，將校皆已飛狀迎晉高祖。高祖慮潞王西奔，遣契丹千騎扼澗池。潞王與曹太后、劉皇后并子雍王重美及宋審虔等攜傳國寶登玄武樓。潞王自焚死，年五十一。劉皇后欲燒宮室，重美諫曰：“新天子至，必不露居，他日重勞民力，死而遺怨。”乃止。后與重美俱死。是日晚，晉高祖入洛陽，唐兵皆解甲待罪。高祖命知遠部署京城，知遠分漢軍使還營，館契丹軍於天宮寺，城中肅然，無敢犯令。

十二月，晉追廢潞王為庶人。以馮道同平章事。

丁酉會同元年。^⑤春正月，日食。

是年，改元會同，國號大遼。公卿百官皆效中國，參

用中國人，以趙延壽為樞密使，尋兼政事令。^④遼帝遣使如洛陽，取延壽妻唐燕國長公主以歸。

二月，遼帝歸，北過雲州，節度使沙彥珣出迎降，遼帝留之。判官吳玘在城中，謂其衆曰：“吾屬禮義之俗，安可臣事夷狄乎？”衆推玘領州事，閉城不受命，攻之不克。應州郭崇威亦恥臣契丹，挺身南歸。張礪逃歸，為追騎所獲，遼帝責之，對曰：“臣華人，飲食衣服皆不與此同，生不如死，願蚤就戮。”遼帝顧通事高彥英曰：“吾常戒汝善遇此人，何故使之失所而亡？若失之，安可復得耶？”答彥英而謝之。礪甚忠直，遇事輒言無隱，遼帝甚重之。

三月，晉得潞王簪及髀骨，詔以王禮葬於徽陵南。^⑤

夏四月，晉遷都汴州。

五月，吳徐誥欲結遼取中國，遣使以美女、珍玩泛海修好，遼帝亦遣使報之。

秋七月，吳徐誥稱帝，國號南唐。後復姓名李昇。

遼以幽州為南京，大都為上京，渤海夫餘城為東京。

戊戌會同二年。^⑥春正月朔，日食。

秋七月，晉作受命寶，以“受天明命，惟德允昌”為文。

八月，晉上尊號於遼帝及太后。以同平章事馮道、左僕射劉昫為冊禮使，遼帝大悅。晉帝事遼甚謹，奉表稱臣，謂遼帝為“父皇帝”；每遼使至，即於別殿拜受詔敕。每歲輸金帛三十萬之外，吉凶慶弔，歲時贈遺，相繼於道。乃至太后、元帥太子、諸王、大臣皆有賂遺。然所輸金帛，不過數縣租賦。其後，遼帝屢止晉帝上表稱臣，但令為書稱“兒皇帝”，如家人禮。

冬十月，遼帝遣使奉寶冊，加高祖尊號曰英武明義皇帝。

己亥會同三年。^④秋七月朔，日食。

八月，晉以故唐明宗子許王從益為郟國公，以奉唐祀。

庚子會同四年。^⑤初，晉割雁門之北路遼，由是吐谷渾皆屬于遼，苦其貪虐，思歸中國，晉成德節度使安重榮復誘之，春正月，吐谷渾使其部落千餘帳奔晉。遼帝大怒，遣使讓晉高祖。遣兵逐之，使還故土。

辛丑會同五年。^⑥夏六月，晉安重榮耻臣事遼，見其使者至，必箕踞慢罵，或潛遣人殺之；遼以為讓，晉高祖為之遜謝。後重榮執遼使拽刺，遣輕騎掠幽州南境，上表稱：“吐谷渾、兩突厥、渾、契苾、沙陁各帥部衆歸附。党項國名等亦納遼告牒，言為遼所陵暴，願自備十萬衆，與晉共擊遼。”高祖不許。

壬寅會同六年。^⑦夏六月，遼以晉招納吐谷渾，遣使來責讓。晉高祖憂悒成疾。一日，馮道獨對。高祖命幼子重睿出拜之，又令宦者抱置道懷中，蓋欲馮道輔立之。是月，高祖崩，年五十一。馮道與侍衛馬步都虞候景延廣議，以國家多難，宜立長君，乃奉齊王重貴為嗣，是日即位。^⑧

胡文定公曰：晉高祖以幼子委馮道，道不可，盡明言之，乃含糊不對。死肉未寒，乃背顧命，其視苟息為如何？

晉高祖崩，大臣議奉表稱臣，告哀於遼，景延廣請致書稱孫而不稱臣。時李崧曰：“陛下如此，他日必躬擐甲

肖與遼戰，於時悔無益矣。”延廣固爭，馮道依違其間，晉出帝卒從延廣議。遼帝大怒，遣使來責讓，延廣復以不遜語答之。

盧龍節度使趙延壽欲代晉帝中國，屢說遼擊晉，遼帝頗然之。

癸卯會同七年。^③春二月，晉聞遼將入攻，遂還東京。然間遣相往來，無虛月。

胡文定公曰：即事而論，景延廣亡晉之罪無可贖者；即情而論，則以晉父事虜，中外人心皆不能平。故慨然欲一灑之而不思輕背信好，自生釁端。公卿不同謀，將帥有異志，君德荒穢，民力困竭，乃與虜鬥，何能善終？狹中淺謀，一朝之忿，忘其身以及其君。嗟夫，使景延廣知“慮善以動，動惟厥時”之義，姑守前約而內修政事，不越三、四年，可以得志于北狄矣！

是月，南唐主昷殂，齊王璟立。

夏四月朔，日食。

秋九月，先是河陽牙將喬榮從趙延壽入遼，遼帝以為回鹘使，往來販易於晉，置邸大梁。至是景延廣說晉帝囚榮於獄，凡遼國販易在晉境者，皆殺之，奪其貨。大臣皆言遼國不可負。乃釋榮，慰賜而歸之。榮辭延廣，延廣大言曰：“歸語而主，先帝為北朝所立，故稱臣奉表；今上乃中國所立，所以降志於北朝者，正以不敢忘先帝盟約故耳。為鄰〔國〕稱孫，足矣，無稱臣之理。翁怒則來戰，孫有十萬橫磨劍，足以相待。他日為孫所敗，取笑天下，毋悔也。”榮乃曰：“公所言頗多，恐有遺忘，願記之紙墨。”延

廣命吏書其語以授之，榮具以白遼帝。遼帝大怒，入攻之志始決。晉使如遼者，皆繫之。桑維翰屢請遜辭謝遼，每為延廣所沮。晉帝以延廣為有定策功，又總宿衛兵，故大臣莫能與之爭。河東節度使劉知遠知延廣必致遼來攻，而不敢言，但益募兵，增置十餘軍以備。

十二月，晉平盧節度使楊光遠遣騎密告遼，以晉境大饑，乘此攻之，一舉可取；趙延壽亦勸之。遼帝乃集兵五萬，使延壽將之，經略中國，曰：“若得之，當立汝為帝。”延壽信之，為盡力。晉帝頗聞其謀，遣使徵近道兵以備之。

甲辰會同八年。^⑤春正月，遼用趙延壽、趙延照為前鋒，將兵入攻，逼晉貝州。先是，晉朝以貝州水陸要衝，多聚芻粟，為大軍數年之儲。軍校邵珂性兇悖，節度使王令溫黜之。珂怨望，密遣人亡入遼，言貝州易取。會令溫入朝，執政以吳繼權知州事。遼帝親攻貝州，繼悉力拒之，燒其攻具殆盡。珂引遼兵自南門入，繼赴井死。遂陷貝州，所殺且萬人。晉以高行周為都部署，與符彥卿、皇甫遇等將兵禦之。

晉帝遣使齎書遺遼帝，時遼帝已屯鄴都，不得通而返。晉帝至澶州。遼帝屯元城，別將攻太原，晉詔劉知遠、杜威、馬全節、張彥澤等將兵拒之於黎陽。復遣譯者孟守忠致書於遼帝，求修舊好。遼帝復書曰：“已成之勢，不可改也。”會遼偉王在秀容失利，遼帝兵自鴉鳴谷歸。博州刺史周儒叛降。

二月，周儒引麻荅^⑥自馬家口濟河，營於東岸，攻鄆州北津。晉帝自將兵，及遣李守貞等分道擊之，遼師敗

績。

三月，遼帝偽棄元城去，伏精騎於古頓丘城，以俟晉軍與恒、定之兵合而來擊。大軍欲進追之，會霖雨而止。遼兵人馬飢疲。趙延壽曰：“晉軍悉在河上，畏我鋒銳，必不敢前，不如即其城下，四合攻之，奪其浮梁，則天下定矣。”遼帝從之，親將兵十餘萬，陣於澶州城北，與晉高行周合戰，自午至晡，互有勝負。遼帝以精兵當中軍而來，晉帝亦出陣待之。遼帝望見晉軍之盛，謂左右曰：“楊光遠言晉兵半已餒死，今何其多也？”以精騎左右掠陣，晉軍不動，萬弩齊發，飛矢蔽地，遼帝稍却，兩軍死者不可勝數。昏後，各引去。遼帝自澶州北分為兩軍，一出滄、德，一出深、冀而歸。時遼帝帳中有小校亡來，云遼帝已傳木書，收軍北去，景延廣疑有詐，閉壁不敢追。遼帝北歸，所過焚掠，民物殆盡。

夏四月，晉因遼國入侵，國用逾竭，遣使三十六人，分道括率民財，各封劍以授之。使者多從吏卒，携鎖械、刀杖入民家，大小驚懼，求死無地。州縣吏復因緣為姦。先是，晉楊光遠叛，命兗州修守備。節度使安審信亦以治樓堞為名，率民財以實私藏，民力大困。

晉遣李守貞討楊光遠於青州，遼救之，不克。

九月朔，日食。

遼師攻遂城、樂壽。代州刺史白文珂戰于七里烽，遼師敗績。

十二月，晉師圍青州，經時，城中食盡，餓死者大半。遼援兵不至，楊光遠遙稽首於遼曰：“皇帝，皇帝，誤光遠

矣！”其子承勳勸光遠降，冀全其族，光遠不許。承勳乃斬勳其父反者判官丘濤，送其首於守貞，縱火大譟，劫其父出居私第，上表待罪，開城納官軍。

閏月，晉以楊光遠罪大，而諸子歸命，難於顯誅，命守貞便宜從事。守貞遣人拉殺光遠，以病死聞。起復其子承勳，除汝州防禦使。

胡文定公曰：光遠不肯臣事于契丹是也，既而舉兵與遼合，則其情實歹矣。承勳以義迫其父開門納官軍，變而不失正，亦可矣。父既被殺，而已乃受賞，于心何安？無乃被罔之時，自虞及禍，故為劫降之計歟！

是月，遼復大舉攻晉，趙延壽引兵先進，至邢州。

- ①太祖長子。 ②後唐明宗天成元年。 ③後唐天成二年。
④後唐天成三年。 ⑤後唐天成四年。 ⑥後唐明宗長興改元。
⑦明年，改賜姓李，名贊華。 ⑧後唐長興二年。 ⑨後唐長興三年。
⑩敬瑄娶明宗女永寧公主。 ⑪後唐長興四年。 ⑫是為愍帝。
⑬後唐愍帝從厚應順元年四月，以後唐主潁王從珂立，改清泰元年。
⑭敏陵，明宗墓也。 ⑮後唐清泰二年。 ⑯後唐清泰三年。十一月以後晉高祖石敬瑭天福元年。 ⑰是為高祖。 ⑱重貴，乃高祖兄敬瑭之子，以為養子。 ⑲延壽尚明宗女。 ⑳晉天福二年。 ㉑後封燕王。 ㉒即明宗陵寢處。 ㉓晉天福三年。 ㉔晉天福四年。
㉕晉天福五年。 ㉖晉天福六年。 ㉗晉天福七年。 ㉘是為出帝。
㉙晉天福八年。 ㉚晉出帝開運改元。 ㉛太宗從弟。

契丹國志卷之三

太宗嗣聖皇帝下

乙巳會同九年^①。春正月，遼師至邢、洺、磁三州，至於安陽河。千里之內，焚剽殆盡。遼主見大桑木，罵曰：“吾知紫披襖出自汝身，吾豈容汝活耶？”束薪於木而焚之。

時晉出帝病不能征，遣張從恩、馬全節、安審琦、皇甫遇，悉兵陳于相州安陽水之南。皇甫遇與濮州刺史慕容彥超將數千騎前覘，至鄴都，遇遼師數萬，遇等且戰且却，至榆林店，遼師大至，二將死戰，自午至未，百餘合，殺傷甚衆。日暮，安陽諸將怪覘兵不還，安審琦即引騎兵出。遼師自相驚曰：“晉軍悉至矣。”遂引兵退。時遼帝在邯鄲，聞之即時北去。

二月，遼發羸兵驅牛羊，過祁州城下，晉刺史沈斌出兵擊之，遼以精兵奪其門，州兵不得還。趙延壽引兵急攻之。斌在城上，延壽語之曰：“使君何不早降？”斌曰：“侍

中父子失計，陷身虜廷，忍帥犬羊以殘父母之邦，不自愧耻，更有驕色，何哉？沈斌弓折矢盡，寧為國家死耳，終不倣公所為！”明日城陷，斌自殺。

三月，遼師還軍，南下晉都，排陣使符彥卿等來擊，遼師敗走。

夏四月，晉杜威等諸軍會于定州。攻遼秦州，降之。取(蒲)[滿]城，獲遼二千人。取遂城。趙延壽部曲有降者言：“遼帝還至虎北口，聞晉取秦州，復擁八萬餘騎南向，計來夕當至。”威等懼，退至陽城。遼師大至，晉師與戰，逐北十餘里，遼師踰白溝而去。晉師結陣而南，胡騎四合如山，諸軍力戰拒之，人馬饑渴。至白園村，埋鹿角為行寨。遼師圍之數重，奇兵出寨後，斷樞道。是夕，東北風大起。營中人馬俱渴，掘井輒崩。至曙，風甚。遼帝坐奚車中，命鐵鷂四面下馬，拔鹿角而入，奮短兵以擊晉兵，又順風縱火揚塵以助其勢。諸將憤怒，皆願出一戰。符彥卿等引精兵出西門，諸將繼至。遼師却數百步。風勢益甚，昏晦如夜。彥卿等擁萬餘騎橫擊遼師，號呼聲動天地，大敗而走，勢如崩山。至幽州，散兵稍集。帝以軍失利，杖其酋長各數百。諸軍引歸。出帝亦還大梁。

六月，晉遣使如遼。

遼連歲入侵，中國疲於奔命，邊民塗地，人畜多死，國人厭苦之。述律太后謂帝曰：“使漢人為胡主，可乎？”曰：“不可。”太后曰：“然則汝何故欲為漢帝？”曰：“石氏負恩，不可容。”后曰：“汝今雖得漢地，不能居也；萬一蹉跌，悔所不及。”又謂羣下曰：“漢兒何得一餉眠？自古但聞漢和

番，不問番和漢。漢兒果能回意，我亦何惜與和。”

晉桑維翰屢勸出帝復請和，以紓國患。遣供奉官張（徽）[暉]奉表稱臣，詣遼謝過。帝曰：“使景延廣、桑維翰自來，仍割鎮、定兩道隸我，則可和。”出帝以遼語忿，謂其無和意，乃止。及帝入大梁，謂李崧等曰：“向使晉使再來，則南北不戰矣。”

八月朔，日食。

丙午會同十年^②。春二月朔，日食。

夏四月，晉定州指揮使孫方簡叛降。

六月，遼攻定州，晉遣李守貞為都部署，將兵禦之。

八月，晉張彥澤敗遼師於定州北。

冬十月，晉遣杜威、李守貞將兵攻遼。

十一月，晉帥杜威、李守貞會兵至瀛州，城門洞啟，寂若無人，威等不敢進。聞遼將高謨翰先已引兵潛出，威遣梁漢璋將二千騎追之，漢璋敗死，威等遂引兵而南。

十二月，遼師大舉入攻，趨恒州。杜威等聞之，將自冀、貝而南。張彥澤時在恒州，引兵會之，言遼兵可破之狀，威等乃復趨恒州，以彥澤為前鋒，與遼兵夾滹沱而軍。遼兵恐晉軍渡河與恒州合勢，議引兵還；及聞晉軍築壘為持久計，遂不去。

磁州刺史李穀說杜威及李守貞曰：“今大軍去恒州咫尺，煙火相望。若多以三股木置水中，積薪布土其上，橋可立成；密約城中舉火相應，夜募壯士斫虜營而入，表裏合勢，逃遁必矣。”諸將皆以為然，獨杜威以為不可，遣李穀出督懷、孟軍糧。遼以大兵當晉軍之前，潛遣蕭翰將百

騎出晉軍之後，斷晉糧道及歸路。樵採者遇之，悉為所掠，有逸歸者，皆稱遼師之盛。又獲晉民，皆黥其面，曰“奉勅不殺”，縱之南走，運夫在道遇之，皆棄車驚潰。

李穀密奏出帝，具言遼兵危急之勢，請幸滑州及發兵守澶州、河陽，以備奔衝。杜威亦奏請益兵，晉詔悉發守宮禁者數百人赴之。威又遣使告急，還為遼兵所獲，自是出帝與軍前聲問兩不相通。開封府尹桑維翰以國家危在旦夕，求見言事，出帝方在苑中調鷹，辭不見；又詣執政言之，執政不以為然，退謂所親曰：“晉氏不血食矣。”

胡文定公曰：“史載維翰請見言事而不知其所欲言，讀之者皆有遺恨。以愚度之，維翰非有他策，不過勸帝稱臣謝過、割隴南以增賂耳。此可以救目前之危，終不足以彌異日之禍。蓋與夷狄共事，勢均力敵，猶且見圖，況為之下乎？”

晉出帝欲自將北征，李彥韜諫而止。

晉奉國都指揮使王清戰死。

杜威與李守貞、宋彥筠等謀降，威潛遺腹心詣遼，邀求重賞。遼帝給云：“許以中國，與之為帝。”威喜，遂定降計。召諸將，出降表使署名。乃命軍士出陣於外，軍士皆踊躍，決為一戰，及告以出降，令其釋甲，軍士大哭，聲振原野。

遼帝遣趙延壽衣赭袍至晉營，慰撫士卒；亦以赭袍衣杜威，其實皆戲之耳。

威引遼帝至恒州城下，順國節度使王周降。

帝引兵南向，自易、定趣恒州，威將降兵以從。遣張

彥澤將二千騎先取大梁，以通事傅住兒為都監。杜威之降也，皇甫遇初不預謀，帝欲遣遇先入大梁，遇辭，退謂所親曰：“吾位為將相，敗不能死，何面目復南行。”至平棘，遂扼吭而死。

胡文定公曰：《五代史》稱杜重威召諸將示以降表，皇甫遇等愕然不能對，遂以次署名，麾其下解甲，與張彥澤先入京師。遇行至平棘，絕吭而死。歐陽子譏之曰：“使遇奮然攘袂而起，殺杜威於坐上，雖不幸而不免，猶為得其死矣，其義烈豈不凜然哉！既俛首聽命，相與亡人之國，雖死不能贖也，豈足貴哉？”遇一人爾，如晉史則鄙夫也，如《通鑑》則節士也，其相去遠矣，尚論取予，可不慎哉！

是月，張彥澤倍道疾驅，夜渡白馬津。晉出帝召李崧、馮玉、李彥韜入禁計事，欲詔劉知遠發兵入援。明日，彥澤自封丘門斬關而入，城中大擾。出帝於宮中起火，自攜劍驅後宮十餘人將赴火，為嬖臣薛超所持。俄而彥澤自寬仁門傳遼帝與太后書慰撫之，乃命滅火，與后妃聚泣，召范質草降表，自稱“孫男臣重貴禍至神惑，運盡天亡。今與太后及妻馮氏，舉族面縛待罪。遣男延煦、延寶奉國寶出迎”。太后亦上表稱“晉室皇太后李氏妾”。傅住兒入宣遼帝遺解里命，出帝脫黃袍，衣素袍，再拜受宣，曰：“係無憂，管取一喫飯處。”又詰以所獻傳國寶非真。出帝奏：“頃唐潞王從珂自焚，舊傳國寶不知所在。此先帝所為，羣臣備知。”乃止。有司欲使啣璧牽羊，大臣輿視，迎於郊外。遼帝曰：“吾遣奇兵取大梁，非受降也。”不

許。又詔管文武羣僚，一切如故；朝廷制度，竝用漢禮。出帝使人召彥澤，彥澤笑而不答。且召桑維翰、景延廣。或勸維翰逃去，維翰曰：“吾大臣，逃將安之？”坐而俟命。彥澤以出帝命召之，維翰至天街遇李崧，駐馬語未畢，有軍吏於馬前揖維翰赴侍衛司。維翰知不免，顧謂李崧曰：“侍中當國，今日國亡，反令維翰死之，何也？”崧有愧色。彥澤倨坐見維翰，維翰切責之曰：“去年拔公於罪人之中，復領大鎮，授以兵權，何乃負恩至此？”彥澤無以應，遣兵守之。

彥澤縱兵大掠二日，都城為之一空。彥澤自謂有功於遼，旗幟皆題“赤心為主”，見者笑之。彥澤迫遷出帝於開封府，頃刻不得留，見者流涕。帝與太后、皇后肩輿，宮嬪、宦者十餘人皆步從，以內庫金珠自隨。彥澤曰：“此物不可置也。”帝悉歸之，彥澤悉輦以歸私第。彥澤遣控鶴指揮使李筠以兵守出帝，內外不通。所上遼表章，皆先示彥澤乃敢上。遣使取內庫帛，主者不與，曰：“非帝之物也。”求酒於李崧，崧曰：“臣家有酒，非敢惜，慮陛下憂躁，飲之有不測之虞，所以不敢進。”欲見李彥韜，彥韜亦不往。出帝姑烏氏公主私賂守門者，得入與帝訣，歸第，自經死。

帝初渡河，出帝欲郊迎，彥澤不聽，遣白遼帝，報曰：“天無二日，豈有兩天子相見於道路耶？”乃止。

晉皇子延煦母楚國夫人丁氏，有美色，彥澤使人劫取之。

彥澤殺桑維翰，以帶加頸，白帝，云其自經。帝命厚

撫其家。

高行周、符彥卿皆詣降，帝以陽城之敗責之。彥卿曰：“臣當時惟知為晉主竭力，今日死生惟命。”帝笑而釋之。

帝又遣兵趣河陽捕景延廣。延廣見帝於封丘。帝責之曰：“致兩主失歡，皆汝所為也，十萬橫磨劍安在？”召喬榮，使相辯證，榮出衣襟所藏書，乃以十事責延廣，每服一事，授一牙籌，授至八籌，帝叱鎖之。後命押送歸本國。宿陳橋，夜分扼吭而死。

丁未會同十一年。^③春正月朔，晉文武百官遙辭出帝於都城北，素服紗帽迎降，俯伏路側請罪。帝命起，改服，撫諭之。出帝、太后迎於封丘門外，帝辭不見，館于封禪寺，遣其將崔廷勳以兵守之。是時雨雪連旬，外無供億，上下凍餒，太后使人謂寺僧曰：“吾嘗於此飯僧數萬，今日豈不相憫邪？”僧辭以遼帝之意難測，不敢獻食。出帝陰祈守者，乃稍得食。

帝初入門，民皆驚走，遣通事諭之曰：“我亦人也，汝曹勿懼，會當使汝曹蘇息。我無心南來，漢兵引我至此耳。”至明德門，下馬拜而後入晉宮中，嬪妃迎謁，皆不顧。日暮，復出，屯於赤崗。執楊承勳，責其劫父楊光遠叛，饜而食之。

先是，張彥澤與閹門使高勳有隙，乘醉入其家，殺其叔父及弟而去。後至京師，聞彥澤劫掠，怒而鎖之。高勳與百姓亦爭投牒疏其惡，及命高勳監刑。彥澤前所殺士大夫子孫，皆經杖哭隨詆罵，以杖撲之，彥澤俛首無一言。

行至北市，斷腕出鎖，然後用刑。勳命剖其心祭死者，市人爭破其腦取髓，燻其肉而食之。

胡文定公曰：興晉者桑維翰也，亡晉者景延廣也，二人用心異而受禍同，何也？歐陽子曰：“本末不順而與夷狄共事者，常見其禍，未見其福也。”

帝初入宮，諸門皆用兵守衛。磔犬於門，以竿懸羊皮於庭，為厭勝法。謂晉羣臣曰：“自今不修甲兵，不市戰馬，輕賦省役，天下太平矣。”改服中國，百官皆如舊制。以李崧為太子太師，充樞密使；馮道守太傅，於樞密院祇候。及分遣使，詔賜晉之藩鎮，藩鎮大臣爭上表稱臣，惟彰義節度使史匡威據涇州拒遼，而雄武節度使何重建以秦、階、成州降蜀。

帝悉收晉降卒鎧仗貯恒州，驅馬歸北國。以胡騎擁降卒而納之河流，趙延壽勸分以戍邊，由是得免，散遣還營。

遼降出帝為光祿大夫、檢校太尉，封負義侯，遷於黃龍府。^④帝使人謂太后曰：“吾聞爾子重貴不從母教而至于此，可求自便，勿與俱行。”太后答曰：“重貴事妾甚謹。所失者，違先君之志，絕兩國之歡，然重貴此去，幸蒙大惠，全生保家，母不隨子，欲何所歸？”於是太后與馮后、皇弟重睿、子延煦、廷寶舉族從晉侯而北。以宮女五十，宦者三十，東西班五十，醫官一，控鶴官四，御厨七，茶酒司三，儀鸞司三，六軍士二十人從，衛以騎兵三百。又遣趙瑩、馮玉、李彥韜與之俱。所經州縣，皆故晉將吏，有所供饋，不得通。路傍父老爭持羊酒為獻，衛兵擁隔，不使得

見，皆涕泣而去。舊臣亦無敢進謁者，獨磁州刺史李穀迎馮於路，傾貲以獻。晉侯至中度橋見杜威寨，嘆曰：“天乎！我家何負於汝，為此賊所破。”慟哭而去。

帝廣受四方貢獻，大縱酒作樂。趙延壽請給上國兵食。帝曰：“吾國無此法。”乃縱胡騎四出剽掠，謂之“打草穀”。丁壯斃於鋒刃，老弱委於溝壑，自東、西兩畿及鄭、滑、曹、濮數百里間，財畜殆盡。

晉北面行營都統劉知遠遣客將王峻奉表稱臣。帝賜詔褒美，親加“兒”字於知遠姓名之上，仍賜以木拐。胡法以優禮大臣，如漢賜几杖之比。

荆南節度使高從誨遣使入貢。

唐主遣使賀帝滅晉，且請詣長安修復諸陵，帝不從。

二月朔，帝冠通天冠，絳紗袍，執大圭視朝。華人皆法服，北人仍胡服，立於文武班，百官朝賀。帝問百官曰：“中國之俗異於吾國，吾欲擇一人君之，何如？”皆曰：“夷夏之心，皆願推戴皇帝。”於是下制，以晉國稱大遼，大赦天下。

燕王趙延壽以遼帝負約，心常怏怏，乞為皇太子。帝曰：“吾於燕王無所愛惜，雖我皮肉可為燕王用者，吾亦割也。吾聞皇太子當以天子兒為之，燕王豈得為之？”因令延壽遷官。張礪奏擬為中京留守、大丞相、錄尚書事、都督中外諸軍事。帝塗去“錄尚書事都督中外諸軍事”而行之。

晉劉知遠稱帝於晉陽，自言未忍（改）〔忘〕晉（國），又惡開運之名，乃更稱天福十二年。詔諸道為遼國括率錢

帛者，皆懼之。

劉知遠自將東迎晉侯，至壽陽，聞已經數日，乃留兵戍承天軍而還。

晉侯自幽州十餘里，過平州，沿途無供給，飢不得食，遺宮女、從官採木實、野蔬而食。又行七八日，至錦州，衛兵迫拜太祖畫像，不勝屈辱而呼曰：“薛超悞我，不令我死。”馮后求毒藥，欲與晉侯俱自死，不果。又行五六日，過海北州，至東丹王墓，遣延煦拜之。又行十餘日，渡遼水，至渤海國鐵州。又行七八日，過南海府，遂至黃龍府。

帝聞劉知遠即位，遣耿崇美守澤、潞，高唐英守相州，崔廷勳守河陽，以控扼要害。滏陽賊帥梁暉夜遣壯士踰相州城，啟闢納衆，殺遼兵數百，據州自稱留後。

鎮寧節度使耶律郎五性殘虐，澶州人苦之。賊帥王瓊率其徒千餘人，圍郎五於牙城。帝聞之懼，遣兵救之，瓊敗死。帝自是無久留河南之意矣。

述律太后遣使，以其國中酒饌脯菓賜帝，賀平晉國。帝與羣臣宴於永福殿，每舉酒，立而飲之，曰：“太后所賜，不敢坐飲。”

三月朔，帝服赭袍，坐崇元殿，百官行人閣禮。

胡文定公曰：“衛宣公淫亂，遂為狄所滅。晉室三綱絕，遂召五胡之亂。唐世家法不正，又好結戎狄，非獨當其世數，因於猾夏，流及五代，更其傳其甚，則至此而天下之亂極矣。堯、舜修德而建士師，三王自治而立司寇，謹華、夷之辨，禁侵亂之階，所以深扶人理，慮末流之若此，使斯人與禽獸雜處而罹其凶害也。

帝謂晉百官曰：“天時向暑，吾難久留，欲暫至上國省太后。”乃以汴州為宣武軍，以蕭翰為節度使。翰，述律太后之兄子，其妹復為帝后。始以蕭為姓，自是遼之后族，皆稱蕭氏。

帝發大梁，晉文武諸司、諸軍吏卒從者皆數千人，宮女、宦官數百人，盡載府庫之實以行。謂宣徽使高勳曰：“吾在上國，以射獵為樂，至此令人悒悒。今得歸，死無恨矣。”

夏四月，遼帝攻相州，克之，悉殺城中男子，驅其婦人而北，留高唐英守，城中遺民僅七百人，而鬻骸十餘萬。

帝自大梁北歸，行至樂城，得疾，崩于殺狐林。國人剖其腹，實以鹽數斗，載之北去，晉人謂之“帝羓”。喪車至國，述律太后不哭，曰：“待諸部寧一如故，則葬汝矣。”明年八月，葬於木葉山。

遼帝在位凡二十餘年，謚曰嗣聖皇帝，廟號太宗。

《紀異錄》曰：遼帝太宗在樂城病時，上京西八十里山，有獵人見太宗容貌如故，乘白馬追奔一白狐，因射殺之。獵人驚：國主南征未回，何忽至此？因獲其死狐並箭，失國主所在。不浹旬而凶問至，驗其日，乃得疾之日；驗其箭，則國主南征所帶之箭失其一矣。國人於其地置堂，塑白狐形，並箭在焉，名曰白狐堂。今其陵之側，創置懷州是也。茫茫中原，紅塵暗之。殺狐讖應，白狐崇之。斯豈天道好還，而運數亦為之冥合歟？

五月，永康王兀欲立。

論曰：太祖之興，燎灰灼原矣！太宗繼之，承祖父遺

基，擅遐颯英氣，遂登大寶，誕受鴻名。然石郎之消息，乃中原之大禍。幽、燕諸州，蓋天造地設以分番、漢之限，誠一夫當關，萬夫莫前也。石晉輕以畀之，則關內之地，彼扼其吭，是猶飽虎狼之吻，而欲其不搏且噬，難矣。遂乃控弦鳴鏑，徑入中原，斬滅華人，肆其窮黷。卷京、洛而無敵，空四海以成墟。謀夫賊將，卒莫敢睨，而神州分裂，強諸侯代起為帝，亦莫之究矣。

①晉開運二年。 ②晉開運三年。 ③晉開運四年。是歲晉亡。
二月，劉知遠立，六月，改號漢，稱高祖。 ④即慕容氏和龍城也。

契丹國志卷之四

世宗天授皇帝

世宗諱阮，番名兀欲，太祖孫，東丹王突欲之子也。東丹王歸唐，卒於滑州。太宗南入大梁，兀欲隨駕，於後求父遺骸骨。會太宗會同十一年四月歸，崩於欒城，燕王趙延壽恨太宗負許代中國之約，即日引兵入恒州。帝以領兵繼入，遼諸將密議，奉帝為主，登鼓角樓，受叔兄拜。而延壽不之知，自稱受太宗遺詔，權知南朝軍國事，下教布告諸道，所以供饋帝與諸將同，帝恨之。鎮州諸門管鑰與夫倉庫出納，皆帝親掌之。或說延壽曰：“遼諸大人數日聚謀，此必有變。今漢兵不下萬人，不若先事圖之。”延壽不決，下令以來月朔日於待賢館上事受賀。大臣李崧等以遼帝之意難測，乃止。

丁未會同十一年^①。夏五月，帝召趙延壽、張礪、李崧、馮道於所館飲酒。帝妻素以兄事延壽，酒數行，帝從容謂延壽曰：“妹自上國來，寧欲見之乎？”延壽與俱入。

食頃，帝出坐，笑謂張礪等曰：“燕王謀反，已鎖之矣，諸君可無慮矣。”又曰：“先帝在汴州與我筭子一莖，許我知南朝軍國事。昨日臨崩，別無遺詔，燕王安得擅立邪？”一日，帝至待賢館，受蕃漢官謁賀，笑謂張礪等曰：“燕王果於此即位，吾以鐵騎圍之，諸公亦不免矣。”後數日，集蕃漢諸臣於府署，宣太宗遺制，曰：“永康王，大聖皇帝之嫡孫，人皇王之長子，太后鍾愛，羣情允歸，可於中京即皇帝位”。^②於是舉哀成服。既而易吉服見羣臣受賀，更不復行喪禮，歌吹之聲不絕於內。是年猶稱會同。帝以太宗有子在國，已以兄子襲位，又無述律太后之命，內不自安。

初，太祖崩於夫餘城，述律殺酋長及諸將數百人。太宗復崩於境外，酋長諸將懼死，乃謀奉帝，欲勒兵北歸。使麻荅^③為中京留守，以前武州刺史高奉明為安國節度使。晉文武官及士卒悉留之，獨以翰林學士徐台符、李澣及後宮宦者、教坊人自隨。述律太后聞帝立，怒曰：“我兒南征東討，有大功業，其子在我側者當立。汝父棄我，走投外國，乃大逆人也，豈得立逆人之子為帝乎？”發兵拒之。帝遣偉王為前鋒，相遇於石橋。太后以李彥韜為排陣使，彥韜迎降於偉王，太后兵敗。帝幽太后於太祖墓側，自稱天授皇帝，以高勳為樞密使。帝慕中華風俗，多用晉臣，而荒于酒色，侮諸宰執，由是國人不附，諸部數叛，興兵追討，故數年不暇南征。

先是，述律太后徙晉侯并后于懷密州，去黃龍府西北一千五百里。行過遼陽二百里，而述律太后為帝所囚，晉侯與后復得還於遼陽，稍有供給。

蕭翰矯遼制，命唐許王從益知南朝軍國事，召赴恒州。時許王從益及王淑妃俱匿於徽陵下宮，不得已而出，翰立為帝，帥諸酋拜之。淑妃泣曰：“吾母子單弱如此，而為諸公所推，是禍吾家也。願諸公宜早迎新主，自求多福，勿以吾子母為意。”衆感其言。許王遣使奉表稱臣，迎北漢主劉知遠，仍出居私第。

漢主人洛，汴州百官奉表來迎，諭以受遼補署者皆勿自疑，聚其告牒而焚之。命鄭州防禦使郭從義先入大梁清宮，密令殺許王及王淑妃。淑妃且死，曰：“吾兒何罪而死！何不留之，每歲寒食以一盂麥飯灑明宗陵乎？”聞者泣下。

漢主至大梁，晉之藩鎮相繼來降。復以汴州為東京，改國號曰漢，仍稱天福年號，曰：“余未忍忘晉也。”

明年，遼國改元天祿。

戊申天祿元年。^④春正月，漢主知遠更名厲。

召蘇逢吉、楊邠、史弘肇、郭威入受顧命，曰：“承祐幼弱，後事託在卿輩。”又曰：“善防杜重威。”是日殂。逢吉等祕不發喪，下詔稱：“重威父子，因朕小疾，謗議搖衆，皆斬之。”磔尸于市，市人爭啖其肉。

二月，漢主第二子周王承祐立，時年十八。^⑤

初，遼帝北歸，至定州，以孫方簡為大同節度使。方簡怨惠不受命，帥其黨三千人保狼山故寨，攻之不克。未幾，遣使降漢。漢主復其舊官，使扞遼國。時麻荅等焚掠定州，悉驅其人棄城北去。方簡自狼山帥其衆數百，還據定州。於是晉末州縣陷遼者，皆復為漢有矣。麻荅歸至

其國，帝責其失守，麻答不服，曰：“朝廷徵漢官致亂爾。”帝鳩殺之。

夏四月，帝至遼陽，晉侯白衣紗帽，與太后、皇后詣帳中上謁，帝令晉侯以常服見。侯伏地而泣，自陳過咎。帝使人扶起之，與坐，飲酒奏樂。而帳下伶人、從官，望見故主皆泣下，悲不自勝，爭以衣服藥餌為遺。

五月，帝上涇，取晉侯所從宦者十五人，東西班五十人及皇子延煦而去。

帝有妻兄禪奴利，聞晉侯有女未嫁，求之，乃辭以幼。後數日，帝遣騎取之，以賜禪奴利。

六月朔，日食。

涇，北地，尤高涼，北人常以五月上涇避暑，八月下涇。至八月，帝下涇。太后自馳至霸州謁帝，求於漢兒城側賜地種牧以為生，許之。帝以太后自從，行十餘日，遣與延煦俱還遼陽。

己酉天祿二年。^①春二月，徙晉侯、太后于建州。中途安太妃卒，遣令晉侯：“焚骨為灰，南向颺之，庶幾遺魂得反中國也。”自遼陽東南行千二百里至建州，節度使趙延暉避正寢以館之。去建州數十里外，得地五十餘頃，侯遣從者耕以給食。頃之，太宗之子述律王遣騎取晉侯寵姬趙氏、聶氏而去。

夏四月，太白晝見。

六月朔，日食。

冬十月，遼攻河北，漢遣郭威督諸將禦之。

庚戌天祿三年。^②秋八月，故晉李太后病，無醫藥，常

仰天號泣，戟手罵杜重威、李守貞曰：“吾死不置汝！”疾亟，謂管侯曰：“我死，焚其骨送范陽佛寺，無使我為虜地鬼也。”是月，后卒。周顯德中，有中國人自遼來者，云管主及皇后、諸子尚無恙，其從者亡歸及物故，則過半矣。

十一月朔，日食。

漢郭威反，隱帝出奔。至趙村，追兵已至。隱帝下馬入民家，為郭允明所殺，時冬十一月也。

郭威等帥百官迎武寧節度使劉贇^⑤為主。

十二月，郭威攻遼，至濱州，將發，將士數千人忽大譟，曰：“天子須侍中自為之，將士已與劉氏為讎，不可立也。”或裂黃旗以被威體，共扶抱之，呼萬歲，推立為帝。威乃上太后禮，請奉漢宗廟，事太后為母。下書撫諭大梁士民，勿有憂疑。遷故主於外館。太后誥，廢贇為湘陰公。

天祿四年。^⑤春正月，漢太后下誥，授郭威監國符寶，即皇帝位，國號曰周，建元廣順。

是月，弑漢湘陰公贇於宋州。漢高祖之弟劉崇稱帝於晉陽，仍用乾祐年號，所有者并、汾、忻、代、嵐、憲、隆、蔚、沁、遼、麟、石十二州之地。

二月，遼帝聞北漢主立，使招討使潘聿撫遺其子劉承鈞書。漢主使承鈞復書，言“本朝淪亡，欲循晉室故事求援。”帝大喜。至是北漢主遣使如遼乞兵。

夏四月，遼帝遣使如北漢，告以周使田敏來，約歲輸錢十萬緡。北漢主使鄭珙以厚賂謝遼，致書稱姪，請行冊禮。帝大喜，命燕王述軋冊命北漢主為大漢神武皇帝，更

令旻妃為皇后。尋遣其翰林學士衛融等詣遼稱謝，且請兵。

九月，北漢主自團柏攻周，帝欲引兵會之，與普長議於九十九泉。諸部皆不欲南，帝強之。行至新州之火神淀，燕王述軋及偉王之子太寧王溥僧等率兵作亂，弑帝，而述軋自立。齊王述律^⑥逃於南山，諸大臣奉之以攻述軋、溥僧，殺之，并其族黨。立述律為帝，改元應曆。

世宗在位凡五年崩，廟號世宗，葬醫巫閭山。

論曰：前史嘗云，創業易，守成難。吾於世宗益信。世宗地居上嗣，運屬樂推，兵威不戢，關河流毒。自謂荒淫無妨，而不知諸部之心離；自謂專欲可成，而不知蕭牆之釁啟。三十餘年血戰之基業，而繼繼承承乃若此，守成之難，不信然歟！

①時北漢高祖稱天福十二年。 ②中京，契丹為鎮州也。 ③麻荅，太宗從弟。 ④二月，漢主隱帝承祐立，乾祐元年。 ⑤是為隱帝。
⑥北漢乾祐二年。 ⑦北漢乾祐三年。 ⑧高祖弟崇之子。 ⑨北漢乾祐四年。 ⑩太宗之子。

契丹國志卷之五

穆宗天順皇帝

穆宗諱璟，番名述律，後更名明，太宗之長子也。太宗攻石晉，入大梁，留帝侍述律太后。太宗於會同十一年四月崩於欒城，諸將畏述律太后殘虐，遂立世宗。世宗遇弒，諸將共迎帝即位，改元應曆。自火神淀入幽州，遣使告于北漢。北漢主遣樞密直學士王得中賀即位；復以叔父事之，請兵以擊晉州。帝年少，好遊戲，不親國事，每夜酣飲，達旦乃寐，日中方起，國人謂之“睡王”。

詳矣應曆元年。^①冬十月，遼遣蕭禹厥將奚、遼兵五萬會北漢兵伐周，北漢主自將兵二萬，攻晉州。三面置寨，晝夜攻之，巡檢使王萬敢與都指揮使史彥超、何徽共拒之。周太祖自將由澤州路與王峻會兵救之。

十二月，周王峻至晉州，遼兵與北漢兵夜遁。

北漢土瘠民貧，內供軍國，外奉遼幣，賦役繁重，民不聊生，逃入周境者衆。

壬子應曆二年。^③夏四月朔，日食。

六月，遼幽州節度使蕭海真^④許以內附，請降于周，中國多事，不果從。

秋九月，遼攻冀州，為周兵所拒。

冬十月，遼瀛、莫、幽州大水，流民入塞者數十萬口，本國亦不之禁。周詔所在賑給存處之，中國民被掠得歸者什五六。

癸丑應曆三年。^⑤春正月，遼攻定州，為周將楊弘裕敗。

夏六月，遼張藏英降周。

秋八月，周太祖得風痺疾，術者言宜散財以攘之，於是築社壇，建太廟於大梁。太祖享太廟，纔及一室，不能拜而退，命晉王榮終禮。^⑥是夕，宿南郊，幾不救，夜分小愈。

甲寅應曆四年。^⑦春正月朔，周太祖祀闕丘，僅能瞻仰致敬而已。以晉王榮判內外兵馬事。太祖疾篤，晉王榮入侍，屢戒之曰：“昔吾西征，見唐十八陵無不發掘者，無他，惟多藏金玉故也。我死，當衣紙衣，斂以瓦棺，壙中無用石，以甕代之；工人役徒皆私雇，勿以煩民；葬畢，募近陵民三十戶，贖其雜徭，使之守視；勿修下宮，置宮人，作石羊、虎、人、馬，惟刻石置陵前云‘周天子平生好儉約，遺令用紙衾、瓦棺，嗣天子不敢違也。’汝苟或違，吾不福汝。”是月，太祖崩，年五十一。晉王榮立。^⑧

二月，北漢主聞周太祖崩，喜甚，遣使詣遼請兵。遼遣武定節度使楊衮將萬騎如晉陽。北漢主自將兵三萬，

會遼師趣潞州。節度使李筠領兵逆戰，敗走。

夏五月，周帝自潞州趣晉陽，至其城下，旗幟環城四十里。遼將楊衮奔歸，帝怒其無功，囚之。使數千騎屯忻、代之間，周遣符彥卿〔邀〕擊之。遼兵退保忻口。彥卿恃勇輕進，為遼兵所敗，死傷甚衆，彥卿引兵還晉陽。

冬十一月，北漢主旻殂。子承鈞告衮于遼，遼册命為帝。其事遼，上表稱男，遼賜詔，謂之“兒皇帝。”

乙卯應曆五年。^⑧春二月朔，日食。

丙辰應曆六年。^⑨

丁巳應曆七年。^⑩冬十一月，遼遣侍中崔勳將兵會北漢，同攻周，北漢遣李存瓌將兵會之，南侵潞州，至其城下而還。北漢主知遼不足恃而不敢遽與之絕，贈送勳甚厚。

戊午應曆八年。^⑪夏五月朔，日食。

己未應曆九年。^⑫夏四月，周帝自將攻遼。

五月，周將韓通領兵大至，遼失瀛、莫、易、涿、雄、霸六州。其瓦橋關建為雄州，割容城、歸義二縣隸之；益津關建為霸州，割文安、大城二縣隸之，皆遼之地也。周帝趣幽州，有疾乃還。

六月，周帝立其子宗訓為梁王。^⑬是月，周帝崩，年三十九，謚曰世宗。子梁王立。

秋九月，遼帝遣其舅使於南唐，中國疑憚，秦州團練使荆罕儒募刺客，使殺之。南唐夜宴遼使於清風驛，酒酣，起更衣，久不返，視之，則失其首矣。自是遼與唐絕。

庚申應曆十年。^⑭春正月辛丑朔，北邊奏遼與北漢連

兵犯邊。時宋趙太祖事周為殿前檢點使，周帝命領宿衛，諸將禦之，次陳橋驛，諸將擁立太祖為帝，國號曰宋，改元建隆。奉周帝為鄭王，太后為周太后，遷居西京。

夏五月朔，日食。

辛酉應曆十一年。^⑫夏四月朔，日食。

壬戌應曆十二年。^⑬

癸亥應曆十三年。^⑭

甲子應曆十四年。^⑮

乙丑應曆十五年。^⑯春二月壬寅朔，日當食不虧。

丙寅應曆十六年。^⑰

丁卯應曆十七年。^⑱春三月，五星聚奎。

夏六月朔，日食。

戊辰應曆十八年。^⑲秋七月，北漢主劉承鈞寢疾，召平章事郭無為，執繼恩^⑳手，付以後事。繼恩崩位，謚承鈞為孝和皇帝。

九月，北漢主繼恩自崩位以來纔六十餘日，為郭無為所弑。弟繼元立，^㉑改元廣運。

是月，宋師入北漢境。北漢上表于遼求援；又遣將領軍扼團柏谷，為宋將李繼勳、何繼筠等擊破之于銅鍋河。北漢尋復入攻，大掠晉、絳二州之境。

是時，承會同之餘威，中原多事，藩鎮爭強，莫不求援於遼國以自存。晉陽之北漢，江南之李唐，使車狎至，饋遺絡繹，遼帝以政昏兵弱，不能應之。

帝體氣卑弱，惡見婦人。居藩時，述律太后欲為納妃，帝辭以疾；即位後，嬪御滿前，並不一顧。朝臣有言椒

房虛位者，皆拒而不納。左右近侍、房帷供奉率皆闖人。性好遊畋，窮冬盛夏，不廢馳騁。萬機事繁，蕃漢諸臣共澁之，帝不以屑意。如京東北有山曰黑山，曰赤山，曰大保山，山水秀絕，麋鹿成羣，四時遊獵，不離此山。瀛、莫之失，幽州急遞以聞，帝曰：“三關本漢地，今以還漢，何失之有？”其神氣愈緩，不恤國事如此。逮至末年，殘忌猜忍，左右小有過愆，至于親手刃之。數年之間，重足屏息，人人虞禍。會醉，索食不得，欲斬庖人，掌膳者恐禍及，因捧食以進，挾刃弑帝於黑山下。帝在位凡十九年，謚曰天順皇帝，廟號穆宗。

論曰：“芙蓉騰風，戎馬交馳而不足；耽酣愒日，禍敗淪胥而有餘。太祖奮自遐陬，虎視中原；太宗偉度英資，關河拱手，一何壯也！一再傳之後，世宗以聲色覆於前，穆宗以荒淫履其轍。介冑脫諸房帷，霧端生於肘腋，一何怯也！本其驕心縱欲，醉色遊畋，敗亡之塗，如出一手，豈陰山異氣之所緝抱於英靈者，至茲少歇歟？不然，何以若斯其昏昏也！”

①周太祖郭威廣順元年。 ②周廣順二年。 ③世宗之妻弟。

④周廣順三年。 ⑤晉王本姓柴氏，幼從姑，長太祖家，遂以為子。

⑥周世宗榮立，顯德元年。 ⑦是為世宗。 ⑧周顯德二年。 ⑨周顯德三年。 ⑩周顯德四年。 ⑪周顯德五年。 ⑫周顯德六年，六月恭帝宗訓立。 ⑬時年七歲。 ⑭宋趙太祖即位，建隆元年。 ⑮宋建隆二年。 ⑯宋建隆三年。 ⑰宋太祖乾德改元。 ⑱宋乾德二年。 ⑲宋乾德三年。 ⑳宋乾德四年。 ㉑宋乾德五年。 ㉒宋太祖開寶改元。 ㉓承鈞養子。 ㉔亦承鈞養子。

契丹國志卷之六

景宗孝成皇帝

景宗諱明記，更名賢，世宗兀欲子也。穆宗先為帳下所弑，諸將迎立帝即位，號天贊。以樞密使知政事令高勳守政事令，封秦王；侍中蕭守興為尚書令，封魏王。每朝，必命坐議國事。納蕭守興女燕燕為皇后。

先是，火神淀弑逆之時，述輒之害世宗，併及於后，復求帝殺之。帝時年九歲，御厨尚食劉解里以甌束之，藏於積薪中，由是得免。及即位，嬰風疾，多不視朝。改元保寧。

戊辰保寧元年。^①遼大赦境內。刑賞政事，用兵追討，皆皇后決之，帝卧牀榻間，拱手而已。

己巳保寧二年。^②春二月，宋太祖命曹彬等伐北漢。

夏四月，遼分道救北漢，為宋何繼筠敗于陽曲，又為韓重贊擊破其衆于定州境。

庚午保寧三年。^③夏四月朔，日食。

冬十一月，遼騎六萬攻定州，宋太祖命田欽祚領兵三千戰于(蒲)(滿)城，馬中流矢而踣，騎士王超以馬授欽祚得免，夜入保遂城。遼兵圍之數日，欽祚度城中糧少，整兵開南門，突圍一角而出。

辛未保寧四年。^④冬十月朔，日食。

壬申保寧五年。^⑤秋九月朔，日食。

癸酉保寧六年。^⑥春正月，周鄭王殂於房州，諡曰恭帝。

甲戌乾亨元年。^⑦春二月朔，日食。

冬十一月，遼邊臣貽宋雄州守孫全興書，請和。全興以聞于宋太祖，許之。

乙亥乾亨二年。^⑧春三月，遼遣使聘宋。

夏六月，彗出柳，長三四丈，晨見東方，西南指，歷輿鬼，距東壁，凡十一舍，八十三日乃滅。

秋七月朔，日食。

宋初遣使通遼。

丙子乾亨三年。^⑨冬十月，宋太祖崩，年五十，在位十七年。皇弟晉王即帝位。^⑩

丁丑乾亨四年。^⑪夏四月，宋葬太祖於永昌陵。遼遣鴻臚少卿耶律敵等往宋助葬。宋太宗尋遣起居舍人辛仲甫使遼，右贊善大夫穆波副之。時宋朝將用兵伐北漢，北漢實倚遼為援，仲甫遲留境上，未敢進，宋詔趨行，既至，帝問曰：“聞中朝有黨進者，真驍將，如進之比凡幾人？”仲甫對曰：“名將甚多，如進鷹犬之材，何可勝數！”帝頗欲留之，仲甫曰：“信以成命，義不可留，有死而已。”帝知其乘

節不可奪，厚禮遣還。

冬十一月朔，日食。

戊寅乾亨五年。^⑫

己卯乾亨六年。^⑬春二月，宋太宗親征北漢。

三月，遼以數萬騎援之，戰于石嶺關之南，為宋郭進敗。

夏四月，北漢主劉繼元降宋，盡廣運十三年。

六月，宋詔親征，發鎮州。

涿州判官劉德厚以城降宋。

秋七月，太宗至幽州，攻城踰旬不下，士卒疲頓，轉輸回遠，又恐遼救兵至，遂退師。

先是宋師自并幸幽，乘其無備，帝方獵，急歸牙帳，議棄幽、薊，以兵守松亭、（北岸）（虎北）口而已。時耶律遜寧號于越，呼為“舍利郎君”^⑭請兵十萬救幽州。並西山薄幽陵，人夜持兩炬，朝舉兩旗。選精騎三萬，夜從他道自宋軍南席卷而北。

遼兵先守幽州者，皆脆兵弱卒，見宋師之盛，望風而遁，又為宋師所遏，進退無計，反為堅守。至是，于越救至，宋遂退師。或勸于越襲其後，于越曰：“受命救幽、薊，今得之矣。”遂不復追。

宋太宗欲北侵，遣詔渤海王發兵相應，然渤海畏遼，竟無至者。遣使如渤海責問。

秋九月，遼攻鎮州，為宋趙延進敗。

庚辰乾亨七年。^⑮冬十一月，帝發兵萬餘衆進攻闕南，宋河陽節度使崔彥進將兵禦之，遼師失利。

十二月，宋太宗親征至大名，遼師遁，遂班師。

辛巳乾亨八年。^①遼大赦。

帝性仁懦，雅好音律，喜醫術，伶倫、鍼灸之輩，授以節鉞使相者三十餘人。自幼得疾，沉痾連年，四時遊獵，問循故典，體憊不能親跨馬；令節大朝會，鬱鬱無歡，或不視朝者有之。耽于酒色，暮年不少休。燕燕皇后^②以女主臨朝，國事一決於其手。大誅罰，大征討，蕃漢諸臣集衆共議，皇后裁決，報之（知帝）〔帝知〕而已。易、定、幽、燕間兩大戰，烽書旁午，國內惶惶，帝嬰疾，不能親駕，基業少衰焉。

秋九月朔，日食。

壬午乾亨九年。^③春三月朔，日食。

夏五月，遼分三道入宋，為其邊將所敗。

冬十二月朔，日食。

是歲，帝崩，謚孝成皇帝，廟號景宗。

論曰：景宗爰在弱齡，中遭多難，高秋搖落，理之自然。政非己出，不免牝雞之伺；祭則寡人，聽命椒塗之手。其得虛尊而擁號，幸矣。

①宋太祖開寶元年。 ②宋開寶二年。 ③宋開寶三年。 ④宋開寶四年。 ⑤宋開寶五年。 ⑥宋開寶六年。 ⑦宋開寶七年。

⑧宋開寶八年。 ⑨宋開寶九年。太宗即位，十二月改太平興國元年。

⑩是為太宗。 ⑪宋太平興國二年。 ⑫宋太平興國三年。 ⑬宋太平興國四年。 ⑭北朝親近無職事者呼為之。 ⑮宋太平興國五年。 ⑯宋太平興國六年。 ⑰蕭守興之女。 ⑱宋太平興國七年。

契丹國志卷之七

聖宗天輔皇帝

聖宗諱隆緒，景宗之長子。年十二即位，改元統和。尊母蕭氏為承天太后，臨朝稱制凡二十七年，乃歸政于帝。宋楊業之陷，康保裔、王繼忠之敗，與夫澶淵之役，皆統和二十五年前事。是時三、四大戰，帝雖親履行陣，力戰深入，而太后實未歸政也。

癸未統和元年。^①帝即位，復號大契丹。

春二月朔，日食。

甲申統和二年。^②

乙酉統和三年。^③冬十二月朔，日食。

丙戌統和四年。^④春正月，宋曹彬等分三道攻契丹。曹彬克涿州；田重進克飛狐、靈邱二縣及蔚州；潘美克雲、寰、朔、應四州。宋尋命潘美、楊業遷雲、寰、朔、應四州之民于許、汝間。時西南面招安使大鵬翼、監軍馬顯、副將何萬通為其所擒。曹彬等亦連收新城、

固安，取涿州。以糧食不繼，退師至歧溝關北。契丹兵大至，追及，宋師大敗。

六月朔，日食。

秋八月，蕭太后與大臣耶律漢寧、南北皮室、五（神）〔押〕押楊隱領衆十餘萬，復取寰州，擒宋楊業。

先是，宋克雲、朔、寰、應四州，命潘美、楊業遷四州之民于許、汝，以所部護送，契丹邀擊之。楊業力戰，自日中至暮，手刃數百人，馬重傷不能進，遂為契丹所擒。業太息曰：“主上遇我甚厚，何面目求活於虜中？”乃不食，三日而死。其麾下尚百餘人，業慰遣之，皆感泣不肯去。遂俱死，無生還者。

十二月，契丹因獲楊業之勝，乃遣耶律遜寧號于越者，以數萬騎取瀛州。宋部署劉廷讓來禦，戰于君子館，會天大寒，宋師不能發弓弩，契丹兵圍廷讓數重。無救，全軍敗沒，廷讓以身免。平州團練使賀令圖、高陽關部署楊重進俱陷。契丹勢益振，長驅深入深、祁、鎰易州，魏、博之北，咸被其禍。

契丹攻代州，為守臣張齊賢伏兵掩擊，敗走。

丁亥統和五年。^⑤春正月，契丹攻陷深、祁、德、易四州。

戊子統和六年。^⑥冬十一月，契丹騎大至唐河北，將攻于宋，為定州都部署李繼隆與監軍（李）〔袁〕繼忠拒戰，敗績。

己丑統和七年。^⑦秋七月，彗出東井，凡三十日。

契丹攻威虜軍，為宋尹繼倫、李繼隆敗于唐、徐河

間，殺契丹相皮室，其大將于越被傷遁走，俘獲甚衆。自是契丹不復大入。契丹之人以纒倫面黑，相戒曰：“當回避黑面大王。”

九月，鎮星熒惑入南斗。

庚寅統和八年。^⑧

辛卯統和九年。^⑨春閏月朔，日食。

冬十二月，女真以契丹兵隔其貢宋之路，請宋攻之，不許。自是遂屬契丹。

壬辰統和十年。^⑩春二月朔，日食。

癸巳統和十一年。^⑪秋八月朔，日食。

甲午統和十二年。^⑫冬十二月朔，日食，陰雪不見。

乙未統和十三年。^⑬春正月，契丹自振武入攻，為府州折御卿敗于子河汭。契丹兵死亡甚衆。

夏四月，契丹攻雄州，為守臣何承矩所敗。

丙申統和十四年。^⑭

丁酉統和十五年。^⑮春三月，宋太宗崩。

戊戌統和十六年。^⑯春二月，彗出營室北。

夏四月朔，日食。

冬十月朔，日食。

己亥統和十七年。^⑰秋九月朔，日食。

冬十二月，契丹入攻宋，宋真宗親征，次于澶州。為知冀州張旻敗於城南；次大名府，為知府州折惟昌敗于五合川。

庚子統和十八年。^⑱春正月，宋真宗次大名府。

是年，宋定州都部署范廷召自中山來侵，求援於高

陽關都部署、彰國節度使康保裔，保裔即領兵赴之。至瀛州西南裴曹村，而廷召後陣已與契丹師遇，保裔選精銳與廷召。會日暮，廷召潛師以遁。保裔不之覺，遲明，契丹師圍之數重，保裔凡戰數十合，兵盡矢窮而死。契丹遂自德、棣濟河，掠淄、齊而歸。

辛丑統和十九年。^①冬十月，契丹攻宋，為張斌敗于長城口，尋又為李繼宣敗于牟山谷。

壬寅統和二十年。^②秋七月朔，日食。

癸卯統和二十一年。^③春三月，契丹攻宋，宋定州行營都部署王超、鎮州桑贊、高陽關周瑩逆戰于望都縣。翌日，至縣南六里，副部署王繼忠率麾下死戰。繼忠素銜儀服，契丹識之，圍數十重，且戰且行，旁西山而北，至白城，繼忠為契丹擒。

冬十一月，有星孛於井、鬼。

甲辰統和二十二年。^④春二月，契丹侵宋，為魏能敗于長城口。

秋閏九月，帝同母蕭太后大舉攻邊，遣統軍順國王撻覽引兵掠威虜軍、安順軍，前鋒為魏能敗。又攻北平寨，為田敏等擊走。遂東趨保州，攻城不克。帝與蕭太后合兵攻定州，宋將王超按兵不出，陣于唐河拒之，契丹兵東駐陽城淀。又分兵圍岢嵐軍，為守臣賈宗擊走。

冬十月，攻瀛州，為守臣李延渥敗，死者三萬餘人，傷者倍之，乃解去。

契丹往宋議和，宋遣崇儀副使曹利用使軍前定約。先是望都戰時，契丹獲去王繼忠，後稍親用，授之以

官。繼忠乘間言和好之利。時太后年老，頗有厭兵意，雖大舉深入，亦納其說，復遣小校李興等四人持信箭以繼忠書詣宋，莫州部署石普奏諸宋朝，真宗遂手詔（雍）〔雄〕諭繼忠。繼忠欲朝廷先遣使命，至是，始遣曹利用來。

契丹自瀛州率衆三十萬，復欲乘虛抵貝、冀、天雄。宋之天雄軍聞契丹師將至，圍城遑遽。伏發，天雄兵不能進退，得還者什三四。契丹師遂陷德清，知軍、尚食使張旦及胡福等死者十四人。

契丹既陷德清，率衆抵澶州北，直犯大陣，圍合三面。宋李繼隆等整軍成列出禦。統軍順國王撻覽為床子弩所傷，中額而殞。契丹師大挫，退却不敢動。

十一月，宋真宗親駕澶淵。是時曹利用之書已通契丹，尋遣左飛龍使韓杞持國書偕至南朝，跪授書函，復以關南為請。宋帝曰：“所言歸地事極無名，若必邀求，朕當決戰耳！實念河北居人重有勞擾，歲以金帛濟其不足，朝廷之體固亦無傷。誓書不必具言，但令曹利用與韓杞口述茲事可也。”利用一再往返，乃許歲遺絹二十萬疋，銀一十萬兩，兩議遂定。契丹且請以兄禮事之。乃命李繼昌齎國書與姚柬之俱往。契丹遣丁振奉誓書之宋。遂退師。自是不復侵邊矣。

宋真宗車駕至澶州，將止，寇準固請渡河，高瓊遂麾衛士進輦，至浮橋，瓊執過築輦夫背，令亟行。既至，登北城門樓，張黃龍旗，諸軍皆呼萬歲，聲聞數十里，契丹相視怖駭。初，曹利用議和，面請宋帝歲賂金

帛之數。宋帝曰：“必不得已，雖百萬亦可。”寇準召語之曰：“雖有勅旨，汝所許不得過三十萬。過三十萬，將斬汝矣！”利用至契丹，果亦如數成約而還。兩議既定，尋即退師。

十二月朔，日食。

宋真宗至自澶州。

乙巳統和二十三年。^⑤春二月，宋遣孫僅使契丹，賀國母生辰。

秋八月，有星孛于紫微。

丙午統和二十四年。^⑥

丁未統和二十五年。^⑦夏五月朔，日食。

戊申統和二十六年。^⑧

己酉統和二十七年。^⑨

庚戌統和二十八年。^⑩夏六月，契丹遣使往宋告糴。宋詔（雍）〔雄〕州出粟二萬石，賤價賑之。

冬十一月，契丹伐高麗國。高麗與女真合兵拒之，契丹兵敗。

辛亥統和二十九年。^⑪

壬子統和三十年。^⑫秋八月朔，日食。

癸丑開泰元年。^⑬是年，契丹以幽州為析津府。

冬十二月朔，日食。

甲寅開泰二年。^⑭

乙卯開泰三年。^⑮夏六月朔，日食。

丙辰開泰四年。^⑯

丁巳開泰五年。^⑰

戊午開泰六年。^⑤夏六月，彗出北斗。

己未開泰七年。^⑥春三月朔，日食。

庚申開泰八年。^⑦

辛酉開泰九年。^⑧秋七月朔，日食。

壬戌太平元年。^⑨春二月，宋真宗崩，子仁宗立。

癸亥太平二年。^⑩

甲子太平三年。^⑪

乙丑太平四年。^⑫

丙寅太平五年。^⑬冬十月朔，日食。

丁卯太平六年。^⑭冬十二月，宋龍圖待制孔道輔使契丹，有優人以文宣為戲，道輔蹙然徑出，契丹主使主客者邀道輔還坐，且令謝。道輔曰：“中國與北朝通好，以禮文相接。今俳優之徒侮慢先聖而不之禁，北朝之過也。道輔何謝？”契丹君臣嘿然。又酌大卮謂曰：“方天寒，飲此可以致和氣。”道輔曰：“不和，固無害。”自是中國使至，不敢侮之。道輔，孔子四十五代孫也。

戊辰太平七年。^⑮春三月朔，日食。

夏四月，有星大如斗，聲如雷，自北流於西南，光燭天下，尾長數丈，久之，散為蒼白雲。

己巳太平八年。^⑯春三月，契丹饑，流民之宋境上。宋仁宗曰：“皆吾赤子也，可不賑救之！”詔給以唐、鄧州閒田，仍令所過州縣給食。

秋八月朔，日食。

庚午太平九年。^⑰

辛未太平十年。^⑱先是，后未歸政前，帝已長立，每

事拱手。或府庫中需一物，必詰其所用，賜及文武僚庶者，允之，不然不與。

帝既不預朝政，縱心弋獵，左右狎邪與帝為笑謔者，太后知之，重行杖責，帝亦不免詬問。御服、御馬皆太后檢校焉。或宮嬪譏帝，太后信之，必庭辱帝。每承順，略無怨辭。好讀唐《貞觀事要》，至太宗、明皇《實錄》則欽伏，故御名連明皇諱上一字；又親以契丹字譯白居易《諷諫集》，召番臣等讀之。嘗云：“五百年來中國之英主，遠則唐太宗，次則後唐明宗，近則今宋太祖、太宗也。”或諸道貢進珍奇，一無所取，皆讓其弟。親政後方一月，太后暴崩，帝哀毀骨立，哭必嘔血。番漢羣臣上言山陵已畢，宜改元。帝曰：“改元吉禮也。居喪行吉禮，乃不孝子也。”羣臣曰：“古之帝王，以日易月，宜法古制。”帝曰：“吾契丹主也，寧違古制，不為不孝之人。”終制三年。

丞相耶律隆運，本漢人，姓韓，名德讓，太后有辟陽侯之幸，賜姓耶律，改名隆運。尋拜大丞相，封晉王。景宗崩，太后臨朝，隆運私事之。是時，太后年方三十，諸子尚幼，外無親援，雄傑角立，帝登大寶，皆隆運力也。帝念其功，父事之。隆運薨，帝為制，服其終始，眷遇如此。帝性英辨多謀，神武冠絕。遊獵時，曾遇二虎方逸，帝策馬馳之，發矢，連殪其二虎。又曾一箭貫三鹿。^⑨至於道釋二教，皆洞其旨。律呂音聲，持所精徹。承平日久，羣方無事，縱酒作樂，無有虛日。與番漢臣下飲會，皆連晝夕，復盡去巾幘，促席造

膝而坐。或自歌舞，或命后妃已下彈琵琶送酒。又喜吟詩，出題詔宰相已下賦詩，詩成進御，一一讀之，優者賜金帶。又御製曲百餘首。幸諸臣私第為會，時謂之“迎駕”，盡歡而罷。刑賞（信必）〔必信〕，無有僭差。撫柔諸番，咸有恩信。修睦宋朝，人使饋送，躬親檢校。時黃河暴漲，謁會同驛。帝親擇夷坦地，復創一驛。每年信使入境，先取宋朝《登科記》，驗其等甲高低、及第年月。其賜賚物，則密令人體探。

宋真宗上仙，薛貽廓報哀入境，幽州急遞先聞。帝不俟貽廓至闕，集番漢大臣舉哀，后妃已下皆為沾涕，因謂宰臣呂德懋曰：“吾與兄皇未結好前，征伐各有勝負，泊約兄弟二十餘年，兄皇昇遐，況與吾同月生，年大兩歲，吾又得歲多時也？”因又泣。復曰：“吾聞姪帝即仁宗皇帝。聖年尚幼，必不知兄皇分義，恐為臣下所間，與吾違約矣。”後貽廓至闕，達宋帝聖意，喜謂后曰：“吾觀姪帝來意，必不失兄皇之誓。”復謂呂德懋曰：“晉高祖承嗣聖爺爺^④之力深矣！少主登位，便背盟約，皆臣下所惑。今姪帝必敦篤悠久矣。”又謂后曰：“汝可先貽書與南朝太后，備述妯娌之好，人使往來，名傳南朝。”

又詔燕京懷忠寺特置真宗御靈，建資福道場，百日而罷。復詔沿邊州軍不得作樂。後因御宴，有教坊都知格守樂名格子眼，轉充色長，因取新譜宣讀，帝欲更遷一官，見本名正犯真宗諱，因怒曰：“汝充教坊首領，豈不知我兄皇諱字？”遂以筆抹其宣而止。燕京僧錄亦

犯真宗諱，勅更名圓融。尋下令國中應內外文武百僚、僧道、軍人、百姓等犯真宗諱者，悉令改之。

詔漢兒公事皆須體問南朝法度行事，不得造次舉止，其欽重宋朝百餘事，皆此類也。末年染消渴病，多忌諱稱說死亡之人，雖帝之父母尊號，亦不得言之。病亟，乃驛召東平王蕭孝穆、上京留守蕭孝先赴闕，始以輔立之事而委之；次以不得失宋朝之信誓而屬之。又屬子宗真曰：“皇后事我四十年，以其無子，故命汝為嗣，我死，汝子母切毋殺之。”

六月三日，崩於上京東北三百里大斧河之行帳，年六十一，在位（通）〔統〕太后臨朝凡四十九年。葬上京西北二百里赤山。諡曰天輔皇帝，廟號聖宗。

論曰：聖宗挺寬仁之姿，表夙成之質。年方幼沖，母后侵政。事歸當壁，元輔專功。澶淵之深入，蓋其母后與權臣之謀，非聖宗本意也。眷遇功臣，終始如一；慈孝之性，本自天然，亦守成之令主云。

①宋太平興國八年。 ②宋太宗雍熙元年。 ③宋雍熙二年。

④宋雍熙三年。 ⑤宋雍熙四年。 ⑥宋太宗端拱改元。 ⑦宋端拱二年。 ⑧宋太宗淳化改元。 ⑨宋淳化二年。 ⑩宋淳化三年。

⑪宋淳化四年。 ⑫宋淳化五年。 ⑬宋太宗至道改元。 ⑭宋至道二年。 ⑮宋至道三年。 ⑯宋真宗即位。咸平改元。 ⑰宋咸平二年。 ⑱宋咸平三年。 ⑲宋咸平四年。 ⑳宋咸平五年。 ㉑宋咸平六年。 ㉒宋真宗景德元年。 ㉓宋景德二年。 ㉔宋景德三年。

㉕宋景德四年。 ㉖宋真宗大中祥符改元。 ㉗宋大中祥符二年。

㉘宋大中祥符三年。 ㉙宋大中祥符四年。 ㉚宋大中祥符五年。

㉛統和三十一年，改元開泰，宋大中祥符六年。 ㉜宋大中祥符七年。 ㉝宋大中祥符八年。 ㉞宋大中祥符九年。 ㉟宋真宗天禧改

元。 ㉒宋天禧二年。 ㉓宋天禧三年。 ㉔宋天禧四年。 ㉕宋天禧五年。 ㉖開泰盡九年，改元太平。宋乾興元年。 ㉗宋仁宗天聖改元。 ㉘宋天聖二年。 ㉙宋天聖三年。 ㉚宋天聖四年。 ㉛宋天聖五年。 ㉜宋天聖六年。 ㉝宋天聖七年。 ㉞宋天聖八年。 ㉟宋天聖九年。 ㊱時幽州試舉人，以一箭貫三鹿為賦題，駙馬劉三叔獻《射三鹿頌》。 ㊲嗣聖，太宗也。叅叅，箭呼也。

契丹國志卷之八

興宗文成皇帝

興宗皇帝諱宗真，番名木不孤，聖宗第八子，順聖元妃所生。帝生於顯州東錐子河，始封梁王，後立為皇太子。聖宗崩，帝即位，明年改元景福，軍國事皆生母法天皇后主之。

辛未太平十年。^①是年，帝即位，尊所生母順聖元妃曰法天皇后，嫡母為齊天皇后。

齊天后，平州節度使蕭思叟之女，丞相耶律隆運之甥。有容色，聖宗愛幸特甚，事承天太后^②尤謹。承天以隆運故，深愛之。承天上仙，齊天預政，權勢日盛，置宮闈司，補官屬，出教令。生辰曰“順天節。”有子皆不育。元妃生子，長即今帝也，次曰達姐李，又生楚國公主、燕國公主。承天太后以楚國公主嫁其弟蕭徒姑撒，為築城以居之，曰睦州，號長慶軍，徙戶一萬實之，曰“從嫁戶。”齊天善琵琶，通琵琶工燕文顯、李文福，元妃屢言其事，聖宗不

之信。又為(卷)(番)書投聖宗寢帳中，聖宗得之，曰：“此必元妃所為也。”命焚之。聖宗遺命以齊天為皇太后，順聖為太妃。元妃置之，自為皇太后，令人誣告齊天謀叛，載以小車，囚之上京。帝曰：“齊天皇后與先帝四十年夫妻，先帝遺詔立為太后，今既不立，何忍殺之？”法天后復問於諸兄弟，皆執奏曰：“若存之，必為後患。”帝曰：“齊天皇后無子，又年老，若存之宮中，有何患乎？”法天后竟不從其言，縊殺之，殺其左右百餘人，以庶人禮葬於祖州北白馬山。

法天皇后專制其國，多殺功臣，用蕭氏兄弟，分監南北蕃漢事，蕭氏奴為團練、防禦、觀察、節度使者至四十人。范陽無賴輩多占名樂工，為蕭氏奴。

帝以上尊酒銀帶賜樂工，太后怒，鞭樂工孟五哥。帝知內品高慶郎告太后，使左右殺高慶郎。太后愈怒，下吏雜治，語達於帝。帝曰：“我貴為天子，而與囚同答狀耶？”鬱鬱不樂。

壬申景福元年。^④

癸酉重熙元年。^④春二月，星孛于東北，光芒長一尺。

夏六月朔，日食。

甲戌重熙二年。^⑤秋八月，有星孛于張，翼長七尺，闊五寸，十二日而沒。

是歲，帝與耶律孫謀，率兵逐母法天太后，登黃布車載送慶州，守聖宗塚，遂誅永興(軍)(宮)都總管高常哥及內侍數十族，命內庫都提點王繼(恩)、內侍都知趙安仁等監南北面蕃漢臣僚。

宋朝自聖宗太平四年，每歲遣使賀帝生辰及元旦，賀太后則別遣使，至是不復別遣。至重熙八年，迎回法天太后，乃遣使如故。

乙亥重熙三年。^⑥帝因獵過祖州白馬山，見齊天太后墳塚荒穢，又無影堂及灑掃人，只空山中一孤塚，惻然而泣曰：“吾早同今日，汝不至於此也。”左右皆沾涕。因詔上京留守耶律貴寧、鹽鐵使郎玄化等於祖州陵園內選吉地改葬，其影堂、廊庫等並同宣獻太后園陵。

丙子重熙四年。^⑦

丁丑重熙五年。^⑧秋七月，有星數百，從西南而流至（壁東）〔東壁〕，其光燭地，黑氣長丈餘，出畢宿下。

戊寅重熙六年。^⑨春正月，有衆星西北流。

秋八月，熒惑犯南斗。

己卯重熙七年。^⑩

庚辰重熙八年。^⑪春正月朔，日食。

先是，帝於重熙二年幽母法天太后於慶州，既改葬齊天后，羣僚勸帝復迎之，且以覲宋朝歲聘之利，皆不從。因命僧建佛事，帝聽講《報恩經》感悟，即遣使迎法天太后，館置中京門外，筮日以見，母子如初，加號法天應運仁德章聖皇太后。然出入舍止，常相去十數里；陰為之備。

是歲，太后始遣始平軍節度使耶律元、方州觀察使王惟吉，帝遣左千牛衛上將軍蕭迪、右諫議大夫知制誥劉三緄，往宋賀乾元節。

辛巳重熙九年。^⑫

壬午重熙十年。^①春二月，帝遣蕭英、劉六符往宋求石晉所割瓦橋關十縣，其書略曰：“李元昊於北朝為甥舅之親，設罪合致討，曷不以一介為報？況營築長堤，填塞要路，開決塘水，添置邊軍，既稔猜疑，慮隳信睦。儻思久好，共遣疑懷，以晉陽舊附之區，關南元割之縣，見歸敵國，共康黎元。”

初，涿州進士梁濟世嘗主文書於帳下，一日得罪歸宋，言契丹將有割地之請。又知雄州杜惟序亦先得其事以聞。至是，宋仁宗發書示輔臣，色皆不動。六符亦疑其書之先漏。

夏四月，宋遣知制誥富弼往契丹為回謝使，西上閣門〔使〕張茂實副之，報書略曰：“元昊急謀狂僭，響議討除，已嘗聞達。復云築堤埭，開陂澤，蓋森涼愆溢，當致繕防；閩集兵夫，蓋邊臣常職，彼此何疑？遽興請地之言，殊匪載書之約。”富弼至契丹，與帝往反難論，力拒其割地之意。富弼又對曰：“兩朝人主繼好垂四十年，一旦忽求割地，何也？”帝曰：“南朝違約，塞鴈門，增塘水，治城隍，籍民兵，意將何為？羣臣競請舉兵而南，寡人以為不若遣使取關南故地，求而不獲，舉兵未晚。”弼曰：“北朝忘章聖皇帝之大德乎！澶淵之役，若從諸將言，北兵無得脫者。且北朝與中國通好，不絕歲幣，則人主專其利，而臣下無所獲；若用兵則利歸臣下，而人主任其禍。故北朝羣臣爭勸用兵者，皆為身謀，非國計也。帝曰：“何謂也？”弼曰：“晉高祖欺天叛君，而求助於北。末帝昏亂，神人棄之。是時中國小，上下離叛，故北朝全師獨克，所獲金幣充仞諸臣

之家，而壯士健馬物故大半，此誰任其禍？今中國提封萬里，所在精兵以百萬計。法令修明，上下一心。北朝欲用兵，能保其必勝乎？”帝曰：“不能。”弼曰：“勝負既未可知，設使其不勝，所亡士馬羣臣當之歟？人主當之歟？若通好不絕，歲幣盡歸人主。臣下所得者，奉使一二人而已，羣臣何利焉？”帝大悟，首肯者久之。弼曰：“塞雁門，以備元昊也。塘水始於何承矩，事在通好前，地平水聚，勢不得不增。城隍皆修舊，民兵亦舊籍，特補其闕耳，非違約也。晉高祖以盧龍一道路契丹，周世宗復伐取關南，皆異代事。宋興已九十年，若欲各求異代故地，豈北朝之利也哉？本朝皇帝之命使臣則有辭矣，曰：‘朕為宗祖守國，必不敢以其地與人。北朝所欲，不過利其租賦爾。朕不欲因爭地而殺兩朝赤子，故屈己增幣，以代賦入。若北朝必欲得地，是志在敗盟，假為此事，朕亦安得獨避用兵乎？澶淵之役，天地鬼神實臨之。今北朝首發兵端，過不在朕，天地鬼神豈能欺哉？’”遼帝感悟，遂欲求婚。弼曰：“婚姻易於生隙，人命修短不可知，豈若歲帛之為堅久。本朝長公主出降，齎送不過十萬緡，豈若歲幣無窮之利。”帝曰：“卿且歸矣，再來當擇一事為報，并以誓書來。”弼歸復命。

八月，宋再命富弼同張茂實齎書至契丹。書曰：“來書云章聖皇帝與紹聖皇帝誓書，每歲以絹二十萬疋、銀十萬兩以助軍旅之費。今以兩朝修好三紀于茲，關南縣邑本朝傳守已久，愧難依從，每年更增絹十萬疋、銀十萬兩。恭惟二聖威靈在天，顧茲纂承，各當遵奉，共循大體，無介

小嫌。餘依景德、統和兩朝誓書。”帝不復求婚而意在增幣，乃曰：“南朝遣我書當曰‘獻’，否則曰‘納’”。弼固爭不可。帝曰：“南朝既懼我矣，何惜此一字。我若擁兵而南，得無悔乎？”弼曰：“本朝皇帝愛南北之民，不忍使蹈鋒鏑，故屈己增幣，何名為懼？若不得已而至於稱兵，則南北敵國，當以曲直為勝負，非使人之所憂也。”帝曰：“卿勿固執，古亦有之。”弼曰：“自古惟唐高祖借兵於突厥，故臣事之。當時所遣，或稱‘獻’、‘納’，則不可知。其後頡利為太宗所擒，豈復有此禮哉？”弼聲色俱厲，帝知不可奪，曰：“吾當遣人議之。”於是留所許增幣誓書，復使耶律仁先、劉六符以誓書詣宋，求為“獻”、“納”。弼奏曰：“臣以死拒之，可勿許，其無能為也。”宋帝從之。時契丹固惜盟好，特為虛聲以動宋朝。宋方困西夏，許予過厚。契丹既歲得金帛五十萬，因勒碑紀功，擢劉六符為顯官，子孫貴於國中。

法天專制不滿四年，帝幽而廢之。既親政，後始自恣，拓落高曠，放蕩不羈。嘗與教坊使王稅輕等數十人約為兄弟，出入其家，至拜其父母。變服微行，數入酒肆，褻言狎語，盡歡而返。尤重浮屠法，僧有正拜三公、三師兼政事令者，凡二十人。貴戚望族化之，多捨男女為僧尼。如王綱、姚景熙、馮立輩皆道流中人，曾遇帝於微行，後皆任顯官。每有除授，凡所親信不依常格，徑與躐升，如刺曷昌等數十人。左右隸役，皆自微賤入親宮闈，會無動力，拔居將相，位至公卿。爵賞濫行，除授無法。樞密使馬保忠本漢人，嘗從容進諫，言

於帝曰：“罰當罪，賞當功，有國之令典也。積薪之言，汲黯嘆之；斜封之濫，至唐而極。國家起自朔北，奄有幽、燕，量才授官，人始稱職。今臣下攀養承平，無動可陟，宜且序進之。”帝佛然怒曰：“若爾，則是君不得自行其權，豈社稷之福耶？”保忠惶恐。自是欲有遷除，必先厚賜貴臣，以絕其言。

癸未重熙十一年。^④夏五月朔，日食。

甲申重熙十二年。^⑤秋七月，契丹遣使往宋，告伐西夏元昊。宋遣余靖充報使，止之。

乙酉重熙十三年。^⑥夏四月朔，日食。

是歲，帝以弟鄭王宗元加兵馬大元帥，封晉國王；樂郡王宗德進封肅王；中山王宗正進封魯王；豫章王宗熙進封齊王；節度使宗哲進封長沙王。

丙戌重熙十四年。^⑦春三月朔，日食。

夏六月，有流星出營室南，大如杯，其光燭地，隱然有聲。

丁亥重熙十五年。^⑧東京留守耶律忽札叛入高麗，命將軍蕭迪誅之。

帝常夜宴，與劉四端兄弟、王綱人伶人樂隊，命后妃易衣為女道士。后父蕭磨只曰：“番漢百官皆在，后妃入戲，恐非所宜。”帝擊磨只，敗面，曰：“我尚為之，若女何人耶？”帝工書，善丹青，嘗以所畫鵝、雁送諸宋朝，點綴精妙，宛乎逼真，仁宗作飛白書以答之。蓋當是時南北無事，歲受南宋饋遺百四五年，內府之儲珍異，固山積也。

戊子重熙十六年。^①

己丑重熙十七年。^②春正月朔，日食。

二月，彗出虛，晨見東方，指西南，歷紫微垣至婁，凡一百二十四日而沒。

庚寅重熙十八年。^③

辛卯重熙十九年。^④

壬辰重熙二十年。^⑤

癸巳重熙二十一年。^⑥冬十月朔，日食。

甲午重熙二十二年。^⑦夏四月朔，日食。

乙未重熙二十三年。^⑧夏，契丹主遣使，以其畫像獻宋，求易仁宗御容以代相見，篤兄弟之情。

八月，國主崩，在位二十五年，年四十一，廟號興宗，諡曰文成皇帝。子洪基立，改元清寧。

先是，日食正陽，客星出于昴。宋著作佐郎劉義叟曰：“興宗其死乎？”至是果驗。

論曰：契丹自阿保機以來，凡五、六世至于興宗。是時承平日久，而宋朝歲幣山增而阜積矣。四時遊獵，曰“避暑”、曰“釣魚”，各各定制，而狼心麀性，茫無隄岸之所。僧固虛無也，而政事纏之；道固清淨也，而貴仕縈之；伶人樂工固優雜也，而帷薄蕩情，循同光故轍而覆之。二十餘年間，亦幸其無事，不爾殆哉！

①宋天聖九年。 ②景宗之后，聖宗之母。 ③宋仁宗明道改元。 ④宋明道二年。 ⑤宋仁宗景祐改元。 ⑥宋景祐二年。 ⑦宋景祐三年。 ⑧宋景祐四年。 ⑨宋仁宗寶元改元。 ⑩宋寶元二年。 ⑪宋仁宗康定改元。 ⑫宋仁宗慶曆改元。 ⑬宋慶曆二年。 ⑭宋慶曆三年。 ⑮宋慶曆四年。 ⑯宋慶曆五年。 ⑰宋慶曆六

年。 ⑬宋慶曆七年。 ⑭宋慶曆八年。 ⑮宋仁宗皇祐改元。 ⑯宋皇祐二年。 ⑰宋皇祐三年。 ⑱宋皇祐四年。 ⑲宋皇祐五年。 ⑳宋仁宗至和改元。 ㉑宋至和二年。

契丹國志卷之九

道宗天福皇帝

道宗諱洪基，興宗之子也。興宗於重熙二十三年八月崩，洪基即位，改重熙二十三年為清寧元年。

乙未清寧元年。^①

丙申清寧二年。^②秋七月，彗出紫微垣，歷七星，其色白，長丈餘。

八月朔，日食。

丁酉清寧三年。^③是歲，祖母法天皇太后蕭氏卒，帝遣懷德節度使蕭福延詣宋告哀。宋仁宗發哀於內東門觀殿，百官進名奉慰，輟視朝七日。

戊戌清寧四年。^④秋八月朔，日食。

己亥清寧五年。^⑤春正月朔，日食。

夏四月，宋以周恭帝子為崇義公，給田(千)(十)頃。令奉周祀。

庚子清寧六年。^⑥春正月，大星隕東南，有聲如雷。

辛丑清寧七年。^⑦夏六月朔，日食四分。

壬寅清寧八年。^⑧

癸卯清寧九年。^⑨春三月，宋仁宗崩，在位四十二年，壽五十四。契丹遣使祭大行於皇儀殿，遂見宋副帝英宗于東廂。副帝痛哭久之。

先是，蕭后既卒，魯王宗元^⑩怙寵益恣，與其相某謀作亂。及相某以貪暴黷，宗元懼，謀愈急。帝知其謀，陰為之備。秋七月戊午，宗元從帝獵於涼淀，帝讓宗元先行，宗元不可，帝乃先行，依山而左，宗元之子楚王洪孝以百餘騎直前，射帝傷臂，又傷乘馬、馬仆。其太師某下馬掖帝，使乘己馬。殿前〔都〕點檢蕭〔福〕美引兵遮帝，與洪孝戰，射殺之。帝與宗元戰，宗元不勝而遁，南趣幽州，一日行五百里，明日〔被〕〔自〕殺。燕京留守耶律明與宗元通謀，聞其敗，領奚兵入城授甲，欲應之。副留守某將漢兵拒焉。會使者以金牌至，遂擒斬耶律明，帝尋亦至，陳王蕭孝〔先〕〔友〕等皆坐誅。其先遣來南宋使者數人，悉宗元之黨也，過白溝，悉以檻車載至，誅之。獨蕭福延以兄福美有功，得免。

甲辰清寧十年。^⑪是歲，帝遣林牙左監門衛大將軍耶律防、樞密直學士給事中陳顛詣宋，求真宗、仁宗御容。宋遣右諫議大夫權御史中丞〔張昇〕為回謝使，單州防禦使劉永年副之。後帝以御容於慶州崇奉，每夕，宮人理衣衾，朔日、月半上食，食氣盡，登臺而燎之，曰“燒飯”，惟祀天與祖宗則然。北狄自黃帝以來為諸夏患，未有事中國之君如事天與祖宗者，《書》曰：“至誠感神，矧茲有苗。”其

謂是矣！

先是，重熙中，興宗以其父皇宗及己畫像二軸，詣宋求易真宗、仁宗聖容，曰：“思見而不可得，故來求聖容而見之也。”宋朝許之，會興宗崩，遂寢。至是，遣使再求。宋命修撰胡宿為回謝使，李緩副之，且許以御容，約因賀正旦使置衣篋中交致焉。

乙巳咸雍元年。^①

丙午咸雍二年。^②春三月，彗見西方。庚申，晨見于室，本大如月，長七尺許。辛巳，昏見于昴，如太白，長丈有五尺。壬午，孛于畢，如月，至五日落。

秋九月朔，日食。

是歲，契丹復改號大遼。

丁未咸雍三年。^③春正月，宋英宗崩，年三十八，皇子神宗立。

戊申咸雍四年。^④春正月朔，日食。

己酉咸雍五年。^⑤秋七月朔，日食。

庚戌咸雍六年。^⑥

辛亥咸雍七年。^⑦

壬子咸雍八年。^⑧

癸丑咸雍九年。^⑨夏四月朔，日食。

甲寅咸雍十年。^⑩春三月，遼遣使蕭禧詣宋爭河東地界。國書大略言河東路沿邊增修戍壘，起鋪舍，侵入彼國蔚、應、朔三州界內，乞行毀撤，別立界至等事。神宗面諭以“三州地界俟差官與北朝職官就地頭檢視定奪。雄州外羅城今修已十三年，即非創築，又非近事。北朝既不欲

如此，更不令接續修。白溝館驛亦俟差官檢視，如有創蓋樓宇、箭窻等，並令拆去，屯戍兵級，並令抽回。”國書亦云：“倘事由夙昔，固難徇情，誠有侵踰，何怪改正。”

秋九月，遼使蕭(索)[素]再詣宋議疆事。宋遣劉忱、呂大忠與之共議于代州。遼指蔚、應、朔三州分水嶺上隴為界，及劉忱與之行視無上隴，乃但云以分水嶺為界。凡山皆有分水嶺，相持久之，不決。

乙卯咸雍十一年。^②春三月，遼復遣蕭禧賚國書詣宋，以劉忱等遷延為言。宋命沈括為報使，詣遼面議。括尋於樞密院閱案牘，得契丹頃歲始議地畔書，指古長城為分界，今所爭乃黃嵬山，相遠三十里，其議遂決。

秋八月朔，日食，陰雲不見。

冬十月，彗出軫。

丙辰咸雍十二年。^③

丁巳咸雍十三年。^④

戊午咸雍十四年。^⑤夏六月朔，日食。

東南有大星出(如瓠)[匏]瓜，聲如雷，其光燭地。

己未咸雍十五年。^⑥

庚申咸雍十六年。^⑦秋七月，彗出太微垣。

冬十一月朔，日食。

辛酉咸雍十七年。^⑧

壬戌咸雍十八年。^⑨秋八月朔，日食，陰雲不見。

癸亥咸雍十九年。^⑩秋九月朔，日食。

甲子咸雍二十年。^⑪

乙丑咸雍二十一年。^⑫宋神宗崩，年三十八。皇子哲

宗立。

丙寅咸雍二十二年。^③

丁卯咸雍二十三年。^④夏六月，有星如爪，出文昌。
秋七月朔，日食，陰雲不見。

戊辰咸雍二十四年。^⑤

己巳咸雍二十五年。^⑥春三月，晝有流星出東北。

庚午咸雍二十六年。^⑦

辛未咸雍二十七年。^⑧夏五月朔，日食。

壬申咸雍二十八年。^⑨

癸酉咸雍二十九年。^⑩

甲戌咸雍三十年。^⑪春三月朔，日當食，雲霧不辨。

乙亥壽昌元年。^⑫

丙子壽昌二年。^⑬是歲，大國舅帳蕭解里四郎君善騎射，豪俠不羈。嘗養亡命數十人從行，往來遊獵於遼，至東西郡間，其飲食用度，強取辦於富民。一日獲罪，遼國捕之甚峻，即囑聚為盜，未旬日間，有衆二千餘，攻陷乾、顯等數州。諸道發兵捕討，累戰不勝，濟率衆奔生女真界，就結楊割太師謀叛。諸軍追襲至境上，不敢進，具以聞。北樞密院尋降宣劑子付楊割一面圖之。楊割遷延數月，獨斬賊魁解里首級，遣長子阿骨打獻遼，餘悉不遺，給云“已誅絕矣。”隨行婦女、鞍馬、器甲、財物，給散有功之人充賞。遼不得已，反進楊割父子官爵。自是，楊割父子自平蕭解里之後，內恃有功於遼，陰懷異志，吞併旁近部族，或誣以誘納叛亡，或許云盜藏牛馬，好則結親以和取之，怒則加兵以強掠之，力農積粟，練兵牧馬，多市金珠良

馬，歲時進奉，賂遺權貴，以通情好。

丁丑壽昌三年。^④夏六月朔，日食。

秋八月，彗出氐，斜指天市垣，光芒三尺餘，越三夕，長丈餘，掃巴星。

戊寅壽昌四年。^⑤

己卯壽昌五年。^⑥春三月，帝命蕭德崇等齎國書詣宋，見宋哲宗，跪言曰：“北朝皇帝告于南朝皇帝，西夏事早休得，即甚好。”哲宗答曰：“西人累年犯順，理須討伐，何煩遣使？”德崇等唯唯而退。其國書略云：“粵惟夏臺，實乃藩輔，累承尚主，迭受封王。近歲以來，連表馳奏，稱南兵之大舉，入西界以深圖，懇求救援之師，用濟攻伐之難。理當依允，事貴解和。蓋遼之於宋，情重祖孫；夏之於遼，義隆甥舅。必欲兩全於保合，豈（知）〔宜〕一失於緩存。而況于彼慶曆、元豐中，會有披聞，皆為止退，寧謂輒違先旨，仍事遠征。儻蔽議以無從，慮造端而有自。”宋報國書云：“惟西夏之小邦，乃本朝之藩鎮，曲加封植，俾獲安全。雖於北嘗與婚姻之親，而在南全居臣子之分。含容浸久，變詐多端。爰自累歲以來，無復事上之禮，賜以金帛而不已，加之封爵而愈驕，殺掠吏民，圍犯城邑。推原罪惡，在所討除。聊飭邊防，稍修武備，據守要害，控扼奔衝。輒於去歲之冬，復驅竭國之衆，來攻近塞，凡涉兩旬，自取死傷，數以萬計，糧盡力屈，衆潰宵歸。更為詭誕之辭，往求拯救之力。狡獪之甚，於此可知。采聽之間，固應洞曉。必謂深加沮却，乃煩曲為勸和，示以華絨，將之聘幣，禮雖形於厚意，事實異於前聞。緬料雅懷，誠非得已。顧於信

誓，殊不相關。惟昔興宗致書仁祖，諭協力蕩平之意，深同謀外禦之情。至欲全除，使無噍類，謂有稽於一舉，誠無益於兩朝。祖宗貽謀，斯為善美；子孫繼志，其可彌忘。今者詳味綢辭，有所未諭，輒違先旨，諒不在茲。”又回白劄子，略云“夏國犯順，罪惡如此，北朝所當共怒。兼慶曆、皇祐間，興宗屢嘗致書仁廟，至有‘孰料兇頑，終合平蕩’等語。且言北朝興宗敦篤勸和，情義兼至，方夏人有罪，則協力討除；及西征勝捷，則持書相慶。慮彼稱臣修貢，則欲當朝勿賜允從。今來兩朝歡好，加於前日。乃以夏人窮蹙之故，詭辭干告。既移文計會，又遣使勸和，恐與昔日興宗皇帝之意稍異。竊料北朝臣僚不曾檢會往日書詞及所立誓約，〔子細〕聞達。”宋詔郭知章報聘。初，蕭德崇堅乞於國書內增“休退兵馬，還復土疆”等語。往復議論，宋帝不從。德崇留京師凡三十七日，乃歸。

庚辰壽昌六年。^⑥春正月，宋哲宗崩，年二十五。皇弟徽宗立。夏四月朔，日食。秋七月，熒惑犯房心。遼帝大漸，戒孫延禧曰：“南朝通好歲久，汝性剛，切勿生事。”又戒大臣曰：“嗣君若妄動，卿等當力諫止之。”

帝崩，在位四十七年，廟號道宗，諡天福皇帝。

帝聰達明睿，端嚴若神，觀書通其大略，神領心解。嘗有漢人講《論語》，至“北辰居其所而衆星拱之”，帝曰：“吾聞北極之下為中國，此豈其地耶？”又講至“夷狄之有君”，疾讀不敢講。又曰：“上世獯鬻、獫狁蕩無禮法，故謂之‘夷’，吾修文物，彬彬不異中華，何嫌之有？”卒令講之。先是，帝之末年，女真大酋阿骨打來朝，以悟室自隨。遼

之貴人與為雙陸戲，貴人投瓊不勝，妄行馬。阿骨打憤甚，拔小佩刀欲刺之，悟室從旁救止，急以手握鞘，阿骨打止其柄杙其胸不死。帝大怒，侍臣以其強悍，咸勸誅之。帝曰：“吾方示信以懷遠方，不可殺也。”侍臣又諫曰：“王衍縱石勒，卒毒中原；張守珪赦祿山，終傾唐室。阿骨打朔北小夷，今乃敢陵轢貴臣，肆其無君之心，此其不追，將貽邊患。”帝不從。

女真之種，有生、熟之分，居混同江之南者，謂之熟女真。阿骨打所居乃江之北，謂之生女真，亦臣服於遼。方遼之盛，歲遣使者，稱天使，佩銀牌自別，每至女真國，遇夕，必欲美姬豔女薦之枕席。女真舊例，率輸中下之戶作待國使處，未出適女待之，或有盛色而適人者，逼而取之，甚至近貴閹闈高者，亦恣其醜污，屏息不敢言。其後承平日久，需求無厭，酷喜海東青，^④遣使徵求，絡繹於道，加以使人縱暴，多方貪婪，女真浸忿之，然苦無戰甲。至壽昌二年，國舅蕭解里叛于女真，始得甲五百副。女真大喜，賞為阿盧里移賚。自後於海濱王之時，興師謀叛，纔有千騎，用其五百甲，攻破寧江州，累戰累勝，器甲益備，而女真始強，不可禦矣。

論曰：政出房闈，則龍燧改當璧之命；權歸悍妬，則衽席痛匹嫡之危。道宗越自儲宮，遂登旒裳，雖瓊屋之末更，亦寶曆之有在。觀夫孽后，可為心寒。卒之驕矜產禍，盤維就戮，亦痛矣。然寬仁懷遠之方，卒不料後來亂亡之禍，而二百餘年之基業，一阿骨打得以敗之。豈其疑似無辜之戮，不肯受寡恩之名，而勒與祿山之禍，帝自貽

憂於子孫歟？是可為之長太息矣！

①重熙二十三年改元清寧。 ②宋仁宗嘉祐改元。 ③宋嘉祐二年。 ④宋嘉祐三年。 ⑤宋嘉祐四年。 ⑥宋嘉祐五年。 ⑦宋嘉祐六年。 ⑧宋嘉祐七年。 ⑨宋嘉祐八年。 ⑩聖宗之子。 ⑪宋英宗治平改元。 ⑫宋治平二年。 ⑬宋治平三年。 ⑭宋治平四年。 ⑮宋神宗熙寧改元。 ⑯宋熙寧二年。 ⑰宋熙寧三年。 ⑱宋熙寧四年。 ⑲宋熙寧五年。 ⑳宋熙寧六年。 ㉑宋熙寧七年。 ㉒宋熙寧八年。 ㉓宋熙寧九年。 ㉔宋熙寧十年。 ㉕宋神宗元豐改元。 ㉖宋元豐二年。 ㉗宋元豐三年。 ㉘宋元豐四年。 ㉙宋元豐五年。 ㉚宋元豐六年。 ㉛宋元豐七年。 ㉜宋元豐八年。 ㉝宋哲宗元祐改元。 ㉞宋元祐二年。 ㉟宋元祐三年。 ㊱宋元祐四年。 ㊲宋元祐五年。 ㊳宋元祐六年。 ㊴宋元祐七年。 ㊵宋元祐八年。 ㊶宋哲宗紹聖改元。 ㊷宋紹聖二年。 ㊸宋紹聖三年。 ㊹宋紹聖四年。 ㊺宋哲宗紹聖五年。六月改元元符。 ㊻宋元符二年。 ㊼宋元符三年。 ㊽海東之飛禽。

契丹國志卷之十

天祚皇帝上

帝諱延禧，道宗之孫，秦王元吉子也。母曰木拙氏。初封齊王，後為皇太孫。道宗崩，齊王即位，自號天祚皇帝，改元乾統。

辛巳乾統元年。^①春正月朔，有流星燭地，自西南入尾，抵距星。是夕，有赤氣起東北方，亘西方，中出白氣，二氣將散，復有黑氣在旁。

夏四月朔，日食，陰雲不見。

是歲，女真楊剌死，子阿骨打立。

壬午乾統二年。^②

癸未乾統三年。^③

甲申乾統四年。^④

乙酉乾統五年。^⑤夏四月，遼遣簽書樞密院蕭良詣宋，言朝廷出兵侵夏國。今大遼以帝妹嫁夏國主，請還所侵之地。

五月，宋徽宗遣龍圖閣直學士林慮報聘，見天祚，跪上國書，仰首曰：“夏人數寇邊，朝廷與師問罪，以北宋屢遣講和之使，故務含容。今踰年不進誓表，不遣使賀天寧節；又築虎徑嶺、馬練川兩堡，侵寇不已。北宋若不窮詰，恐非所以踐勸和之意。”天祚出〔其〕不意，為愕然。

秋八月，天祚以林慮來使而失情，遣使復，宋尋遣禮部侍郎劉正夫來報，酬對敏博，議皆如約。

丙戌乾統六年。^①春正月，彗出西方，其長竟天。

三月，遼復遣泛使同平章事蕭保先、牛溫舒詣宋，為夏請元符講和以後所侵西界地。徽宗曰：“先帝已畫封疆，今不復議。若自崇寧以來侵地，可與之。”

丁亥乾統七年。^②冬十一月朔，日食。

戊子乾統八年。^③

己丑乾統九年。^④

庚寅乾統十年。^⑤秋九月朔，日食。

辛卯天慶元年。^⑥秋九月，宋遣鄭允中、童貫使遼。貫至，遼君臣相聚指笑曰：“南朝人才如此。”然天祚方縱肆，貪得中國玉帛珍玩，而貫所賚皆極珍奇，至運兩浙榘藤之具、火閣書櫃床椅等往獻。天祚所以遣貫者，亦稱是。貫使歸，至盧溝河，有燕人馬植者，得罪于燕，見貫，陳滅燕之策。貫攜歸宋，改姓李，名良嗣，薦于朝，遂賜姓趙。後天祚數移檄索取，貫諱不與。復燕之議，蓋始此。

壬辰天慶二年。^⑦春，天祚如混同江釣魚，界外生女真酋長在千里內者，以故事皆來會。適遇頭魚酒筵，別具宴勞，酒半酣，天祚臨軒，使諸酋次第歌舞為樂。次至阿骨

打，端立直視，辭以不能，諭之再三，終不從。天祚密謂樞密使蕭奉先曰：“阿骨打意氣雄豪，顧視不常，當以事誅之，不然，恐貽後患。”奉先曰：“阿骨打誠服本朝，殺之，傷向化之心。設有異志，蕞爾小國，何能為？”阿骨打有弟姪曰吳乞馬、粘罕、胡舍輩，天祚歲入秋山，數人必從行，善作鹿鳴，呼鹿使天祚射之，或刺虎，或搏熊，天祚喜，輒加官爵，後至圍場司差遣者有之。阿骨打會釣魚而歸，疑天祚知其意，即欲稱兵。是年秋，遂併吞諸鄰近部族，有趙三、阿鶻產大王者，拒之不從，阿骨打擄其家。二人來訴於咸州詳穩司，送北樞密院。時樞密使蕭奉先，本咸里庸才，懼其生事，但作常事以聞。天祚指揮就送咸州取勘，欲使自新，阿骨打竟托病不至。

癸巳天慶三年。^⑭春三月朔，日食。

阿骨打將帶五百餘騎，徑赴咸州詳穩司，吏民驚駭。明日，擁騎赴衙引問，與告人趙三、阿鶻產等並跪問於廳下，阿骨打隱諱不伏供，祈送所司取狀。一夕，領從騎歸去，遣人持狀赴詳穩司云：“意欲殺我，故不敢留。”自是追呼不復至，第節次申北樞密院，遼國亦無如之何。

甲午天慶四年。^⑮秋八月，女真阿骨打始叛，用粘罕、胡舍為謀主，銀朮割、移列、婁宿、闍母等為將帥，會集女真諸部甲馬二千，首犯混同江之東，名寧江州。時天祚射鹿慶州秋山，聞之，不以介意，遣海州刺史高仙壽，統渤海子弟軍三千人，應寧江援。

秋九月，遼兵遇女真於寧江州東，戰數合，渤海大敗，或陣沒，或就擒，獲免者無幾。復攻破寧江州，無少長，悉

殺之。

女真服屬大遼二百餘年，世襲節度使，兄弟相傳，周而復始。至天祚朝，賞刑僭濫，禽色俱荒。女真東北與五國為鄰，五國之東鄰大海，出名鷹，自海東來者，謂之“海東青”，小而俊健，能擒鵝鶩，爪白者尤以為異，遼人酷愛之，歲歲求之女真，女真至五國，戰鬪而後得，女真不勝其擾。及天祚嗣位，責貢尤苛。又天使所至，百般需索於部落，稍不奉命，召其長加杖，甚者誅之，諸部怨叛，潛結阿骨打，至是舉兵謀叛。

先是，州有樵場，女真以北珠、人參、生金、松實、白附子、蜜蠟、麻布之類為市，州人低其直，且拘辱之，謂之“打女真。”州既陷，殺之無遺類，獲遼兵甲馬三千，退保長白山之阿朮火。阿朮火者，女真所居之地，以河為名也。

是月，天祚出秋山，赴顯州冬山射鹿，聞攻陷寧江州，中輟不行。

十月，差守司空、殿前都檢點蕭嗣先^①充東北〔路〕都統，靜江軍節度使蕭撻勃也副之，發契丹、奚兵三千騎，中京路禁軍、土豪二千人，別選諸路武勇二千餘人，以中京虞侯崔公義充都押官，侍衛控鶴都指揮使、商州刺史邢穎副之，屯出河店，臨白江，與寧江女真對壘。時遼國太平日久，聞女真興師，皆願從軍冀賞，往往將家屬團結軍營隨行。

是月，女真潛渡混同江，掩其不備，未陣擊之。嗣先軍潰，其家屬、金帛、牛羊、糧械悉為女真所得。復以兵追殺百餘里，管押官崔公義、邢穎等死之，又獲去甲馬三千。

初，女真之叛也，率皆騎兵。旗幟之外，各有字號小木牌，繫人馬上為號，五十人為一隊。前二十人全裝重甲，持鎗或棍棒；後三十人輕甲操弓矢。每遇敵，有一二人躍馬而出，先觀陣之虛實，或向其左右前後，結陣而馳擊之。百步之外，弓矢齊發，無不中者。勝則整陣而復追，敗則復聚而不散。其分合出入，應變若神，人人皆自為戰，所以勝也。遼國舊例，凡關軍國大事，漢人不預。天祚自兩戰之敗，意謂蕭奉先不知兵，始欲改用將帥，付以東征之事。天祚遂召宰相張琳、吳庸，付以東征事。張琳等碌碌儒生，非經濟才，統御無法，遽奏曰：“前日之敗，失於輕舉，若用漢軍二十萬，分路進討，無不克者。”天祚謂其數多，且差十萬，即降宣劑付上京、長春、遼西諸路，計人戶家業錢，每三百貫自備一軍，限二十日各赴期會，時富民有出一百軍、二百軍者，家費遂竭。琳等〔皆〕非將帥才，器甲聽從自便，人人就易槍刀氈甲充數，弓弩鐵甲百無一二。雜以番軍，分出四路：北樞密副使耶律斡離朵〔凍〕〔涑〕流河路都統，衛尉卿蘇壽吉副之；黃龍府耶律寧黃龍府路都統，桂州觀察使耿欽副之；復州節度使蕭湜曷咸州都統，將作監龔誼副之；左祗候郎君詳穩蕭〔河古奴〕〔阿古好〕草峪都統，商州團練使張維協副之。蜀〔凍〕〔涑〕流河一路遂深入女真。軍馬初一戰，稍却，各保退寨棚。是夕，都統斡離朵誤聽漢軍已遁，即離遼、奚之兵，棄營而奔。明早，漢軍尚餘三萬衆，遂推將作少監武朝彥為都統，再與女真合戰，遂大敗。餘三路聞之，各退保本路防城。數月間，遂為女真攻陷，丁壯斬戮無遺，嬰孺貫之

架上，盤舞為戲，所過赤地無餘。應遼東界內熟戶女真，亦為阿骨打吞併，分揀強壯人馬充軍，遂有鐵騎萬餘。

初，蕭嗣先出河店之敗也，諸蕃漢兵將多不赴都統行營聚合，各逃走歸家，或被傷詣行闕而告歸者。蕭奉先懼弟嗣先獲罪，輒奏天祚云：“東征潰兵，懼所至劫掠，若不從權肆赦，將嘯聚為腹心患。”天祚從之，降赦應係出河店潰軍，並免罪歸業，所有遺棄係官器甲，亦不理索。嗣先遂詣闕待罪，但免官而已。自是出征之兵皆謂“戰則有死而無功，退則有生而無罪。”由是各無鬪志，累年用兵，每遇女真，望風奔潰。降赦免罪，不能成功者，此也。

乙未天慶五年。^⑩秋七月朔，日食。

八月，天祚下詔親征女真，率蕃漢兵十餘萬出長春路，命樞密使蕭奉先為御營都統，耶律章奴副之，以精兵二萬為先鋒，餘分五部為正兵，諸大臣貴族子弟千餘人為硬軍，扈從百司護衛軍，北出駱駝口，車騎亘百里，鼓角旌旗，震耀原野。別以漢軍步騎三萬，命都檢點蕭胡覲姑為都統，樞密直學士柴誼副之，南出寧江州路。自長春州分路而進，費數月之糧，期必滅女真。一夕，軍中戈戟有光，馬皆嘶鳴，咸以為不祥。天祚問天官李圭，圭不能對。宰相張琳前奏曰：“唐莊宗攻梁，矛戟夜有光。郭崇韜曰：‘火出兵刃，破賊之兆。’遂滅梁。”天祚喜而信之，遂行。女真師至鴨綠江，人心疑懼。

初，天祚親征，女真甚懼，粘罕、兀(术)[室]偽請為卑哀求生者，陽以示衆，實以求戰變書上之。天祚大怒，下詔有“女真作過，大軍翦除”之語。阿骨打聚諸酋曰：“始

與汝輩起兵，蓋苦遼國殘虐。今吾謂若卑哀請降，庶幾紓禍，乃欲盡行翦除，為之奈何？不若殺我一族，衆共迎降，可以轉禍為福。”諸酋皆羅拜曰：“事至此，當誓死一戰。”次日，御營退行三十里。或言於天祚曰：“兵已深入，女真在近，軍心皆願一戰，何必退也？”天祚亟召諸統兵官，問策安在？人皆觀望，無敢言“不願戰”者。再傳令進兵。

十一月，天祚與女真兵會。時盛寒，雪深尺餘，先鋒接戰，雲塵亘天，日色赤暗。天祚親督諸軍進戰。少頃，軍馬左旋三轉，已橫屍滿野，望天祚御旗向西南出，衆軍隨而敗潰，始悟矛戟有光為凶兆也。女真亦不急追，徐收所獲輜重、馬牛而已。天祚一日一夜走五百里，退保長春。女真乘勝，遂併渤海、遼陽等五十四州。

耶律章奴係大橫帳，與衆謀曰：“天祚失道，皇叔燕王淳^①親賢，若廢天祚而迎燕王判燕京留守事，女真可不戰而服也。”章奴與同謀人二千餘騎，夜半奔上京，迎立燕王。是日，有燕王妃父蕭唐骨德告其事，天祚詔遣長公主駙馬蕭昱，領精騎千餘詣廣平甸，防護后妃諸王行宮，別遣帳前親信乙信，賫御札馳報燕王。時章奴先遣燕王二妃親弟蕭諦里、外甥蕭延留說之曰：“前日御營兵為女真所敗，天祚不知所在，今天下無主，諸王幼弱，請王權知軍國事。失此機會，姦雄竊發，未易圖也。”燕王曰：“此非細事，天祚自有諸王當立，南北面大臣不來，而汝等來，何也？”密令左右拘之。少頃，乙信持天祚御札至，備言章奴等欲行廢立之事。燕王對使者號泣，斬蕭諦里、蕭延留首級以獻，單騎由問道避章奴賊衆，趣廣平甸待罪。天祚待

之如初。章奴知燕王不聽，領麾下掠慶、饒、懷、祖等州，嘯聚渤海盜衆數萬，直趣廣平甸，犯天祚行闕索戰。賴順國女真阿鶻產等三百餘騎一戰而勝，擒其貴族二百餘人，並斬以徇。妻女配役繡院，或給散近幸為婢，餘得脫者奔女真。章奴偽作使人，帶牌走馬奔女真近境泰州，為讖者所獲，以送天祚。天祚命腰斬於市，剖其心獻祖廟，分送五路號令。

初，章奴之叛也，蕭奉先以燕王素得漢人心，疑章奴潛與南路漢軍同謀，遽以聞。天祚即以同知宣徽北院事韓汝誨詣漢軍行營，傳宣曰：“將士離家，暴露日久，風霜之凍，誠可憐憫。今女真遠遁，不可深入，並令放還。”諸軍皆歡呼分散。越三日，復遣使督進發，軍中洶洶，遲疑不行，及聞大軍已敗，亦自燒營逃去，天祚隨行衛兵僅三百人而已。遂降詔募燕、雲漢人，護駕到廣平甸，有官者轉一官，白身人三班奉職。及至廣平，再降指揮，若護駕至起離日，依上推賞。

是歲，宋遣羅選、侯益等詣遼充賀生辰及正旦使，入國道梗，中京阻程兩月，不得見天祚而回。

丙申天慶六年。^⑩春正月朔夜，渤海人高永昌率兇徒十數人，乘酒恃勇，持刃踰垣入府衙，登廳，問留守所在，給云：“外軍變，請為備。”保先纔出，刺殺之。是夜，有戶部使大公鼎，本渤海人，登進士第，頗剛明，聞亂作，權行留守事，與副守高澈臣集諸營奚、漢兵千餘人，次日搜索元作亂渤海人，得數十人，並斬首，即撫安民。倉卒之際，有濫被其害者。小人喜亂，得以藉口，不可禁戢，一夜燒

寨起亂。

初三日，軍馬抵首山門，大公鼎等登門，說諭使歸，不從。

初五日夜，城中舉火，內應開門，騎兵突入，陣於通衢。大公鼎、高倩臣督軍迎敵，不勝，領麾下殘兵百餘人，奪西門，出奔行闕。高永昌自殺留守蕭保先後，自據東京，稱大渤海皇帝，改元應順，據遼東五十餘州，分遣軍馬，肆其殺掠，所在州郡奚人戶，往往挈家渡遼以避。獨瀋州未下。宰相張琳，瀋州人也，天祚命討之。琳先常兩任戶部使，有東京人望，至是募遼東失業者，并驅轉戶強壯充軍。蓋遼東夙與女真、渤海有讎，轉戶則使從良，庶幾效命敢戰。旬日之間，得兵二萬餘，隨行官屬、將領，聽從辟差。

是春，天祚募渤海武勇馬軍高永昌等二千人，屯白草谷，備禦女真。會東京留守太師蕭保先^⑨為政酷虐，渤海素悍，有犯法者不恕，〔因以激變〕。東京乃渤海故地，自阿保機力戰二十餘年始得之，建為東京。

夏五月初，自顯州進兵，渤海止備遼河三叉黎樹口。張琳遣羸卒數千，疑其守兵，以精騎問道渡河趨瀋州，渤海始覺，遣兵迎敵。旬日間三十餘戰，渤海稍却，退保東京。張琳兵距城五里，隔太子河割寨。先遣人移文招撫，不從，傳令留五日糧，決策破城。越二日，發安德州義軍先渡河，次引大軍齊渡，忽上流有渤海鐵騎五百，突出其傍，諸軍少却，退保舊寨，河路復為所斷，三日不得渡，衆以饑告，謀歸瀋州，徐圖後舉。初七日夜移寨，渤海騎兵

尾襲，強壯者僅得入城，老幼悉被殺掠。是時軍伍尚整，方議再舉，忽承女真西南路都統闍母國王檄：“準渤海國王高永昌狀，遼國張宰相統領大軍前來討伐，伏乞救援。當道於義，即合應援。已約五月二十一日進兵。”檄到濟州，衆以渤海詐作此檄，不為備。是日，聞探東北有軍掩至，將士呼曰：“女真至矣！”張琳急整軍迎敵，將士望見女真兵，氣已奪，遂散走入城。女真隨入，先據城西南，後縱兵殺戮幾盡，孟初、劉思溫等死之。張琳與諸子弟等并官屬縋城苟免，盡失軍資、器甲，隨入遼州，收集殘軍，坐是謫授遼興軍節度使。^③自張琳之敗，國人皆稱燕王賢而忠，若付以東征，士必樂為用。兼遼東民自渤海之敗，渡遼失所者衆，若招之為軍，彼可報怨，此且報國，必以死戰。天祚乃授燕王都元帥，蕭德恭副之，永興(軍)[宮]使耶律佛頂、延昌宮使蕭昂並兼監軍，聽辟官屬，召募遼東饑民得二萬餘，謂之“怨軍”，如郭藥師者是也。別選燕、雲、平路禁軍五千人，並勸諭三路富民，依等第進獻武勇軍二千人，如董龐兒、張闡羽者是也。又科敷運腳車三千乘，準備隨軍支遣，境內騷然矣。

燕王既招怨軍，合禁軍、武勇軍共三萬人，自八月進發，十月到乾州十三個山割寨。至十一月二十四夜，忽管押武勇軍、太常少卿武朝彥率府屬馬僧辨濟謀作亂，遣百餘騎趨中軍帳，先殺燕王。燕王覺之，奔他軍，免，餘皆閉壁不應。朝彥知謀不成，擁騎二千欲南奔，道為[張]闡羽所殺。

燕王自被命東征，恥其行，未出境而兵亂，勉率諸軍

自黎樹口渡遼水，欲下瀋州，駐兵城下，射書令降，不應，選精銳梯城，復矢石如雨，不能上；或報女真援至，退保遼河。是行雖無所得，亦無所失。既而燕王被召赴闕，留北宰相蕭德恭上京路都統，耶律余覲副之；太常衮耶律嗜哩姑濠、懿州路都統，延慶宮使蕭和尚奴副之；都元帥府監軍耶律佛頂顯州路都統，四軍太師蕭幹副之，並以屯田為備。

自天祚親征敗績，中外歸罪蕭奉先。於是謫奉先西南面招討，擢用耶律大悲奴為北樞密使，蕭查刺同知樞密院使。間有軍國大事，天祚與南面宰相、執政吳庸、馬人望、柴誼等參議，數人皆昏謬，不能裁決。當時國人諺曰：“五個翁翁四百歲，南面北面頓瞌睡。自己精神管不得，有甚心情殺女直。”遠近傳為笑端。有人問於天祚，天祚亦笑而不悟。是歲，止罷耶律大悲奴，再詔蕭奉先代之，蕭查刺授西京留守事。其後罷吳庸、馬人望、柴誼，以李處溫、左企弓代之，至於國亡。

女真初援渤海，已而復相攻，渤海大敗。高永昌遁入海，女真遣兀室、訥波勃董以騎三千追及於長松島，斬之。其潰散漢兒軍，多相聚為盜，如侯概、吳撞天等，所在蟠結，以千百計，自稱“雲隊”、“海隊”之類，紛然並起，每一飯屠數千人，數路之民殆盡，遼不能制之。

丁酉天慶七年。^④夏，天祚再命燕王會四路兵馬防秋。九月初發燕山府，十月至陰涼河。聞怨軍時寒無衣，劫掠乾州，都統蕭幹一面招安。初，怨軍有八營，共二萬八千餘人，自宜州募者謂之前宜營，再募者謂後宜營，前錦、後

錦者亦然，有乾營、顯營，又有乾顯大營、岩州營。叛者乃乾顯大營、前錦營也。十一月，到衛州葵藜山。遂留大軍就糧司農縣，領輕騎二千，欲赴顯州，處置作過怨軍，行次懿州，或報女真前軍已過明王墳，即召大軍會懿州。

有星如月，徐徐南行而落，光照人物，與月無異。

是年，蘇、復州編民百餘戶泛海至登州岸，具言女真兵來攻奪遼東地，已過遼河之西。登州守王師中以聞于宋。宋詔童貫、蔡京議，遣人偵其實，委師中選將校七人，各借以官，用平海指揮兵船，載高藥師同往。至海北，見女真邏者，不敢前，復回青州。安撫崔直躬奏其事於宋，詔復委童貫措置，應借官過海人，悉真之法。別遣使女真，講買馬舊好。

戊戌天慶八年。^②春正月，燕王淳將討怨軍而遇女真於徽州之東，未陣而潰。初，女真入攻前後多見天象，或白氣經天，或白虹貫日，或天狗夜墜，或彗掃西南，赤氣滿空，遼兵輒敗。是夕，有赤氣若火光，自東起，往來紛亂，移時而散。軍中以謂凶兆，皆無鬪志。燕王與麾下五百騎，退保長泊、魚務。於是女真入新州，節度使王從輔開門降，女真焚掠而去。所經成、懿、濠、衛四州皆降，犒勞而過。女真別遣闍母國王，攻怨軍於顯州，怨軍大敗。

蕭幹奔繫巫閭山牽馬嶺，招收殘卒，不滿萬人。女真以馬疲，破乾、顯等州，焚掠而歸。天祚在中京，聞燕王兵敗，女真入新州，晝夜憂懼，潛令內庫三局官，打包珠玉、

珍玩五百餘囊，駿馬二千匹，夜入飛龍院餵養為備。嘗謂左右曰：“若女真必來，吾有日行三百五十里馬若干，又與宋朝為兄弟，夏國引甥，皆可以歸，亦不失一生富貴。所憂者，軍民受禍耳。”識者聞之，私相謂曰：“遼今亡矣！自古人主豈有棄軍民而自為謀身計者，其能享國乎？”暨聞女真焚劫新州以歸，即以謂威德可加，彼何能為？復自縱肆。

五月壬午朔，日有食之。

秋，女真陷東京、黃龍府、咸、信、蘇、復、辰、海、同、銀、通、擘、烏、遂、春、秦、靖等五十餘城。內並邊二十餘州，各有和糴倉，依祖宗法，每歲出陳易新，許民自願假貸，收息二分，所有無慮三五十萬碩，雖累歲舉兵，未嘗支用。至是女真悉取之，據遼東、長春兩路。

是時有楊朴者，遼東鐵州人也，本渤海大族，登進士第，累官校書郎。先是高永昌叛時，降女真，頗用事，勸阿骨打稱皇帝，改元天輔，以王為姓，以旻為名，以其國產金，號大金。又陳說阿骨打曰：“自古英雄開國受禪，先求大國封冊。”

八月，阿骨打遣人詣天祚求封冊，其事有十：徽號大聖大明皇帝，一也；國號大金，二也；玉牒，三也；袞冕，四也；玉刻御前之寶，五也；以弟兄通問，六也；生辰、正旦遣使，七也；歲輸銀絹二十五萬疋兩，分南宋歲賜之半，八也；割遼東、長春兩路，九也；送還女真阿鶻產、趙三大王，十也。天祚付羣臣等議。蕭奉先大喜，以為自此無患，差淨江軍節度使蕭習〔泥〕烈、翰林學士楊勉充封冊使、副，

歸州觀察使張孝偉、太常少卿王府充通問使、副，衛尉少卿劉湜充管押禮物官，將作少監楊立忠充讀冊使，備天子衮冕、玉冊、金印、車輅、法駕之屬，冊立阿骨打為東懷國至聖至明皇帝。其冊文略曰：“眷惟肅慎之區，實介扶餘之俗。土濱上國，材布中嶽，雅有山川之名，承其父祖之蔭。碧雲袤野，固須挺於渠材；皓雪飛霜，疇不推於絕駕。章封屢報，誠意交孚，載念遙芬，宜膺多戩。是用遣蕭習〔泥〕烈等持節備禮，冊為東懷國至聖至明皇帝。義敦友睦，地列豐腴。嗚呼！戒哉欽哉，式孚于休。”所有徽號，緣犯祖號，改為至聖至明，餘悉從之。使人自十月發行，冬十二月至金國，楊朴以儀物不全用天子之制，又東懷國乃小邦懷其德之義，仍無冊為兄之文，如“遙芬多戩，”皆非美意，彤弓象輅，亦諸侯事；“渠材”二字，意似輕侮。命習〔泥〕烈歸易其文，隨答云：“兄友弟恭，出自《周書》，言友睦則兄之義見矣。”楊朴等面折以為非是。阿骨打大怒，叱出使、副，欲腰斬之，粘罕諸人為謝乃解，尚人答百餘。次年三月，止遣蕭習〔泥〕烈、楊立忠回，云：“冊文罵我，我都不曉。徽號、國號、玉輅、御寶我都有之，須稱我大金國皇帝兄即已，能從我，今秋可至軍前；不然，我提兵取上京矣！”天祚惡聞女真事。蕭奉先揣其意，皆不以聞，遷延久之，聞上京已破，和議遂寢。後天祚雖復請和，皆不報。

①宋徽宗建中靖國改元。 ②宋徽宗崇寧改元。 ③宋崇寧二年。
④宋崇寧三年。 ⑤宋崇寧四年。 ⑥宋崇寧五年。 ⑦宋徽宗大觀改元。 ⑧宋大觀二年。 ⑨宋大觀三年。 ⑩宋大觀四年。

①宋徽宗政和改元。 ②宋政和二年。 ③宋政和三年。 ④宋政和四年。 ⑤奉先弟。 ⑥宋政和五年。 ⑦淳乃道宗弟，弘本之子，俗呼為燕王，實封秦國王。 ⑧宋政和六年。 ⑨乃奉先堂弟。 ⑩乃平州也。 ⑪宋政和七年。 ⑫宋徽宗重和改元。金阿骨打稱帝，天輔元年。

契丹國志卷之十一

天祚皇帝中

己亥天慶九年。^①春，有赤色，大三四團，長二三丈，索索如樹。西方有火五團，下行十餘丈，不至地而滅。

夏，金人攻陷上京路，祖州則太祖之天膳堂，懷州則太宗德光之崇元殿，慶州則望僊、望聖、神儀三殿，并先破乾、顯等州如凝神殿、安元聖母殿，木葉山之世祖殿、諸陵并皇妃子弟影堂，焚燒掠盡，發掘金銀珠玉。所司即以聞，蕭奉先皆抑而不奏。後天祚雖知，問及發寢事，奉先對以初雖侵犯元宮，劫掠諸物，尚懼列聖威靈，不敢毀壞靈柩，已經指揮有司，修葺巡護。奉先迎合誕謾，類皆如此。遼國屢年困於用兵，應有諸州富民子弟，自願進軍馬，人獻錢三千貫，特補進士出身。諸番部富人進軍獻馬，納粟出身，官各有差。又因燕王言遼東失業饑民困踣道路，死者十之八九，有旨令中京、燕、雲、平三路諸色人收養，候次年等第推恩。官爵之濫，至此而極。

四月朔，日有食之。

庚子天慶十年。^②冬十月朔，日食。

辛丑保大元年。^③春，日有暈，忽青黑無光，其中洶洶而動，若銚金而湧，日旁有青黑色，正如水波周回而旋轉，將暮而止。

金人自破上京，終歲不出師，然遼國防屯如故。有東南路怨軍將領董小醜，坐討平〔利〕州賊逗留不進，被誅。本部隊長羅青漢、董仲孫等倡率怨軍作亂，攻〔錦〕〔錦〕州，月餘不能下，賴都統耶律余覲援兵至，怨軍始懼。郭藥師等內變，自殺賊魁羅青漢等數人，就招安，都統蕭幹奏選留二千人為四營，擢郭藥師、張令徽、劉舜〔臣〕〔仁〕、甄五臣各統將領，餘〔兵〕六千人，悉送燕、雲、平三路充禁軍，或養濟，實欲分其勢也。余覲謂蕭幹曰：“前年兩營叛，劫掠乾州，已從招安；今歲全軍復叛，而攻〔錦〕〔錦〕州。苟我軍不來，城破，則數萬居民被害。所謂怨軍，未能報怨於金人，而屢怨叛於我家。今若乘其解甲，遣兵掩殺淨盡，則永絕後患。”幹曰：“亦有忠義為一時脅從者，豈可盡誅之？”二人議論不合，交章並奏，卒從蕭幹之議。遼自金人侵犯以來，天下郡縣所失幾半，生靈塗炭，宗廟丘墟。天祚尚以四時遊畋為樂，工作之費，未嘗少輟，遂失內外人心，嘗有倦處萬機之意。有四子：長曰趙王，昭容所出；次曰晉王，文妃所出；次曰秦王、魯王，並元妃所出。國人皆知晉王賢而屬望焉。元妃兄樞密使蕭奉先慮秦王不得立，密圖之，未有以發。晉王母文妃姊妹三人，長適耶律撻曷里，次適余覲。會撻曷里妻嘗過余覲家，蕭奉先

密遣人誣告其結余覲，將立晉王，尊天祚為太上皇帝。事發，撻曷里妻等皆伏誅，文妃亦賜死，獨留晉王。時余覲在軍中，聞之懼，即領千餘騎，并骨肉車帳叛歸金國。時方盛夏，途中為霖雨所阻。天祚遣知奚王府蕭遐買、宰相蕭德恭、大常袞耶律諦里姑、歸州觀察使蕭和尚奴、太師蕭幹各領本部軍馬會合追之，至間山縣相及，諸軍議曰：“今天祚信用奉先，致晉王之禍，兼奉先平日視吾曹蔑如也。余覲，宗室之豪俊，負氣不為人下。若擒余覲，則他日吾曹皆余覲也，不若縱之為利。”皆曰：“嗟。”於是給云“追之不及”。余覲既亡，奉先懼諸將皆叛，乃峻加蕭遐買等爵賞，以慰其心。

壬寅保大二年。^④春，金人陷中京。^⑤先是，金主阿骨打遣使曷魯等如宋，自海上歸，得書，意宋朝絕之，乃命其弟故礪國相字極烈并粘罕、兀室，用遼降人余覲為前鋒，由奚西過平地松林，駐白水；別遣精兵五百騎到松亭關，邀截本京官民奔逸車乘。天祚在燕京，聞報甚懼，即日出居庸關；又聞余覲為前鋒，導兵奄至。蕭奉先奏曰：“余覲，乃宗枝也，豈欲亡遼？不過求立其甥晉王而已，何惜一子，伐其奸謀？”遂賜晉王死。晉王賢而有人望，死非其罪，行闕百官諸軍聞之，莫不流涕，自此人心益離。

三月，報余覲兵至，天祚率騎兵五千，西奔雲中府，留宰相張琳、李處溫等，與燕王同守燕。天祚去時，衛士五千，中途潰散，僅諸王并長公主、駙馬、諸子弟三百餘騎。過雲中城下，撫諭留守蕭查刺、轉運劉企常等曰：“金兵不遠，好與軍民守城。”但取馬三千匹，由天德軍趨漁陽，入

夾山，因謂蕭奉先曰：“使我至此，皆汝之由。汝急去，人不汝容。”奉先慟哭辭去，行二十里，為左右所殺。金兵至雲中，蕭查刺等率軍民父老匪門迎降。金主阿骨打留精兵二百騎，與留守自衛，而追天祚幾及，應行宮內庫三局珍寶，祖宗二百餘年所積，及其幼女，悉為俘掠一空。金兵自追天祚，旬日未回，府中兵變，推馬權、韓執謙為都統，逐出蕭查刺等及衛兵，閉門拒守，飛申燕王求救。時燕王僭立之初，無兵可遣，但指揮蔚州發兵應援。金兵回至城下，見留守等被逐，督軍民攻城，彌旬破城，執馬權、韓執謙等，盡殺諸軍，陷朔、應諸州，擄去羣牧良馬三萬匹。天祚自奔夾山，命令不通。燕王守燕，深得人心。李處溫與族弟處能及其子爽、都統蕭幹，挾怨軍謀立燕王，告報在府百官、諸軍、僧道、父老數萬人，於三月十七日詣燕王府，方邀張琳告其事。琳曰：“攝政則可，未可即真。”處溫曰：“天意人心已定，豈可易也？”百官班立，獨琳有難色。既而王出，李爽以赭袍被之，百官軍民拜舞山呼。王驚泣，辭不獲免而即位，僭號天錫皇帝，改元建福。改怨軍為常勝軍，以李處溫守太尉，左企弓守司徒，曹勇義知樞密院，虞仲文知參政。張琳守太師，十日一朝，平章軍國大事外，雖以元老尊之，其實不欲其位在己上也。李處能、爽等數十人，各以定策功補官。方議降赦，燕中父老再告，隨駕內庫都點檢劉彥良，姦佞之人，導引天祚為一切失德之事，國人呼為“肉拄杖”。（蓋）〔謂〕其倚附而行也。妻雲奇者，本倡婦也，日夕出入禁中，以為譖謔。夫婦共為國害，請先誅而後降赦。是日，梟彥良夫婦之首於

市，人爭鬻肉而食之，然後肆赦。

燕王廢天祚為湘陰王，詔曰：“大道既隱，不行揖遜之風；皇天無私，自有廢興之數。事貴得效，人難力為。朕幼保青宮，長歸朱邸，雖曰人情之久係，誰云神器之可求，欲避周公之嫌，未忘季札之節。奈何一旦之無主，至使四海之求君，推戴四從，謳歌百和，不敢墜祖宗之業，勉與攬帝王之權，實懼纂國之為難，尚思復辟之可待。近得羣臣之奏，概陳前主之非，所謂復諫矜能，比頑棄德，躁動靡常節，平居無話言。室家之杼柚盡空，更資淫費；宗廟之衣冠見毀，不輟常改。漢子之戮實無名，伋妻之亂孰可忍！加以權臣壅隔，政事糾紛，左右離心，遐邇解體，訖無悛悟，以至播遷，伊感自貽，大勢已去。是謂辜四海之望，安得冒一人之稱，宜削徽名，用昭否德。方朕心之牽愛，尚不忍從；奈羣議之大公，正復見請。勉循故事，用降新封，可降封為湘陰王。嗚呼，命不予常，事非得已，豈予小子，敢專位號之尊！蓋徇衆心，以為社稷之計。凡在聞聽，體予至懷。”

燕王自稱帝後，以燕、雲、平、中京、上京、遼西六路，奄為己有，而沙漠以北西南面、西北路招討府諸番部族，天祚主之，猶稱保大二年，遼國自此分矣。

夏四月，燕王遣知宣徽南院事蕭撻勃也、樞密副承旨王居元充告謝使詣宋，至白溝，等候宋徽宗降旨。以天祚見在夾山，燕王安得擅立，令雄州却之，人使遂回。

是時，宋命太師童貫為宣撫使，以蔡攸副之，勒兵十五萬巡邊，下詔復燕、雲故地，仍以三策付童貫：如燕人悅

而取之，因復舊疆，上也；燕王納款稱藩，次也；燕人未服，按兵巡邊，下也。貫遣張寶、趙忠賞書往諭燕王，使舉國內附，致書略曰：“吳越錢俶、西蜀孟昶等歸朝以來，世世子孫不失富貴。況遼之與宋，歡好百年，誠能舉國內附，則恩數有加；苟懷執迷，後時失機，恐有彭寵之禍起於帳中。”淳得書，斬其二使。又令趙翊^①遣使臣說諭易州土豪史成，使起兵獻城，為史成執送燕京，斬之。

五月，童貫再遣种師道等率兵數萬，壓境問罪。先遣閔門宣贊馬擴持宋徽宗手招，撫諭燕王，使納土以歸，世世不失王爵，并告燕民，以示存恤之意。王雖不從，心亦懷懼。馬擴過白溝，有漢兒劉宗吉者，私出見擴，許開涿州門以獻，擴以二榜付之。是時，宋師稍集，种師道總東路之衆，屯白溝；王稟將前軍，楊惟忠將左師，种師中將右軍，王珪將後軍，趙明、楊志將選鋒軍，辛興宗總西路之衆屯范村；楊可世、王淵將前軍，焦安節將左軍，劉光世、龔景將右軍，曲奇、王育將後軍，吳子厚、劉安將選鋒軍，並聽劉延慶節制。以劉給、宇文黃中為參謀，鄧珪、鄧瑄為廉訪。

六月，童貫至高陽關駐軍，用知雄州和訛計，降黃榜及旗，述弔民伐罪出於不得已之意，如敢殺人，並從軍法。若有豪傑以燕京來獻，除節度使。

燕王遣大石林牙領一千五百餘騎屯涿州新城，林牙詰以兩國盟好，何為興師？既是信使，安得結劉宗吉獻城？馬擴曰：“女真兵已至山後，本朝乃是遣兵救燕。劉宗吉見投，安得不納？”林牙曰：“本欲留宣贊，緣自來通

和，不欲太甚。欲和則和，欲戰則戰，大暑熱，毋令諸軍徒苦。”語畢，上馬馳去。前軍統制楊可世信和詭言燕人久欲內附，必有箪食之迎，將輕騎數千過界，趨蘭溝甸。乃先遣人以旗榜渡河橋開示，林牙見之，曰：“有死而已。”可世為所掩，被傷而退。燕王益兵二萬，遣蕭幹統之，將渡白溝，宋諸將皆欲迎戰，師道曰：“不可妄動。”尋退兵。蕭幹迎戰於范村，甚力，興宗遣楊可弼救之，仍自督戰，乃却。凡駐白溝河十有二日，乃還師。退保雄州。其日，北風，大雨雹，追騎大至，詭以敗盟。退至雄州，童貫以其兵尚盛，未可以取，歸罪和詭、侯益，謂其探報不實，妄請興師。既而徽宗降詔班師。當燕王僭號之初，漢軍多而番軍少，蕭幹建議籍東、西奚二千餘人及嶺外南北大王、乙室王、皮室猛拽刺司。遼民遭金人入寇，往往竄山谷、沙漠間，聞燕王立，無不內向。然人馬飢甚，不能遠來，遂令州縣招之，得萬餘戶。戶選一人為軍，支贍家錢三十貫，謂之“瘦軍”。既而散處涿、易間，侵掠平民，甚於盜賊。主兵之官，縱而不問。後來常勝軍叛歸南朝，首殺涿州瘦軍家口正罪，以此取悅人心。

是月，燕王病，聞天祚自夾山傳檄至天德軍、雲內、朔、武、應、蔚等州，已會合諸蕃精兵五萬騎，約秋八月入燕，并遣近侍小底查刺馳馬問勞燕王，并索衣裳茗藥。王甚懼，會南北大臣會議，如李處溫、蕭幹謂莫若迎秦而拒淮，^①召百官共議，有從吾議者東立。獨有南面諸行都部署耶律寧處西，謂：“天祚果能復興，何名拒之？迎子拒父，亦無是理。”處溫以寧搖衆，欲誅之。淳撫枕歎曰：“此

忠臣也。天祚果來，吾有死而已，將何辭以見？”天祚兵出漁陽，僅復朔、應等州，復為金所敗，虜其元妃、諸王。天祚復奔夾山。二十四日，淳薨，謚曰宣宗，無嗣。

李處溫以其子爽舊與宋趙良嗣善，童貫使良嗣以書約為內應，募牒者投之，并通書馬柔吉等，令結義士開門迎降，拘執虜酋以護往者“歸朝滅虜”之言。處溫亦令爽潛以帛書相贈答。及淳卧病，知必死，授處溫都元帥，欲以身後託之。病既亟，蕭幹與大石林牙矯命宰相侍疾，獨處溫不至，陰聚武勇軍二千為備，給曰“奉密旨防他變”。是夜淳死，不發喪。幹等先集遼騎三千，陳于毬場，會百官，議立燕王妻蕭氏為皇太后，權主軍國事，奉迎天祚次子秦王為帝。從其議者書名押字，無敢有一異者。蕭氏遂即位於柩前，改元德興。

蕭后者，燕王秦國妃也。妃兄弟坐章奴誅，天祚囚之上京，女真破，得出，又囚于中京，淳立而歸。后以蕭幹有援立功，封于越王。天祚聞淳死，下詔削其官爵，并妻蕭氏亦降為庶人，仍改姓虺氏。后僭位時，獨李處溫後至稱賀，屬時多難，未却即誅，赦其罪，但追毀元帥宣劑而已。有弟處能，懼禍及己，落髮為僧，蕭后送海島龍雲寺。或告云處溫父子潛通童貫，欲挾后歸宋朝。后引問之，處溫曰：“臣父子於宣宗有定策功，宜數世宥，不當以讒獲罪。”太后曰：“向使燕王如周公，終享親賢重名於後世，豈不勝太寧王述軌、楚國王涅里耶？^⑥誤燕王者，皆汝父子。”併數他罪數十條。處溫無以對，遂賜死，其子爽凌遲處斬。命籍其家貲，得見錢(十)(七)萬餘貫，金銀珠玉稱是，皆

自為宰相數月之間，四方賄賂公行所得。初，處溫聞天祚播遷，勸立燕王僭號，以圖恩倖。及燕王死後，恐遼國將亡，失其所依，北通金國，南結童貫，願挾蕭后以納土，皆非至誠，欲為身謀，而至此反為身禍。及宋師撫定燕山，追封處溫為廣陽郡王，子李爽為保寧軍節度使，以其家為廟，錄其孫一人。

八月，金主趨中京，道聞天祚聚兵于國崖，亟往攻之。大戰，生擒都統蕭規，天祚脫身走。及夏國引兵數萬襲天德軍，金主遣偏將帥兵七千，擊破之。屬秋霖水暴至，夏人溺水不勝計。金主屢勝，兵驕，遂因秋成，并邊牧馬休兵，屯奉聖州之東。

自燕王死，蕭后專政，遼恐漢人應南軍，將謀之，管常勝軍郭藥師遣使奉表降宋，高鳳亦以易州降。時宋童貫回雄州，在道中，而郭藥師至，授以軍八千，并易州義兵五千，并隸劉延慶為嚮導，軍聲大振。

九月，蕭后遣蕭容、韓昉詣宋，奉表稱藩。

冬十月，宋劉延慶、郭藥師等自雄州趨新城，劉光世、楊可世自安肅軍出易州，會于涿州。時兵衆五十萬攻燕，進駐盧溝河。時燕軍蕭幹亦於燕城十里外築壘相拒。藥師命延慶選常勝軍五千騎，問道襲燕，夜半渡河，啣枚而進，質明，常勝軍五千騎雜鄉人奪迎春門以入。大軍繼至燕城，遣人諭蕭后使降。蕭幹知宋師入燕，亟往救〔之〕，人皆死鬪，藥師屢敗，奔門不得出，盡棄馬，縋城而下，死傷過半，還者數百騎而已。時宋師屯盧溝河者未動，蕭幹兵纔數千，得漢兒兩人，留帳中，夜半偽相語曰：“聞漢

兵十萬，吾師三倍，當分左右翼，以精兵衝其中，舉火為應，殲之無遺。”陰逸其一人歸報，既夕而遁，衆軍遂潰，自相蹂踐。幹遺騎追至涿水北而回。

十二月，金粘罕趨南暗口，撻懶駙馬趨(北牛)(古北)口，金主趨居庸關，分三路入燕。蕭后既敗，奉表于金，稱藩請和。金主不許，自媯、儒二州進兵，抵居庸關，遼人棄關走。

①宋徽宗宣和改元，金天輔二年。 ②宋宣和二年，金天輔三年。

③宋宣和三年，金天輔四年。 ④宋宣和四年，金天輔五年。 ⑤中京，契丹也。 ⑥本革龍兒。 ⑦湘者，天祚降封為湘陰王；秦者，乃天祚次子秦王也。 ⑧皆遼親王謀反誅者。

契丹國志卷之十二

天祚皇帝下

癸卯保大三年。^①春正月，金主入居庸關，晡時到燕。蕭后聞居庸關失守，夜率蕭幹及軍帳出城，聲言迎敵，實欲出奔。國相左企弓等辭於國門，后曰：“國難至此，我親率諸軍為社稷一戰，勝則再見卿等，不然死矣！卿等努力保吾民，毋使濫被殺戮。”言訖泣下。后未行五十里，金人遊騎已及城。左企弓等方修守具，忽報統軍蕭乙信啓城門，金人前軍已登城矣。於是左企弓、虞仲文、曹勇義、劉彥宗、蕭乙信等迎降，出丹鳳門毬場內投拜，阿骨打戎服坐，衆呼萬歲，皆伏拜，待罪於下。譯者曰：“我見城頭砲繩席角都不曾解動，是無拒我意也。”并放罪。

初，蕭后東歸以避金人，至松亭關，議所往。耶律大石林牙，遼人也，欲歸天祚；四軍大王蕭幹，奚人也，欲就奚王府立國。有宣宗駙馬都尉蕭勃迭曰：“今日固合歸天祚，然而有何面目相見？”林牙命左右牽出斬之。傳令軍

中，有敢異議者斬。於是，遼、奚軍列陣相拒而分矣。遼軍從林牙，挾蕭后以歸天祚于夾山。時奚、渤海軍從蕭幹留奚王府，幹據府自立，僭號為神聖皇帝，國號大奚，改元天興。時奚中鬪食。

六月，奚兵出盧龍嶺，攻破景州，殺守臣劉滋、通判楊伯榮。又敗常勝軍張令徽、劉（慶）〔舜〕仁軍馬於（雁）〔石〕門鎮，攻陷薊州，守臣高公輔棄城走。又寇掠燕城，其鋒銳甚，有涉河犯京師之意。人情洶洶，頗有謀棄燕者。宋童貫自京師移文王安中、郭藥師，切責之。

七月，奚兵遇郭藥師，戰於腰鋪，大敗而歸。藥師乘勝追襲，過盧龍嶺，殺傷過半，從軍老小車乘就糧於後者，悉為常勝軍所獲，因而招降到奚、渤海、漢軍五千餘人。諸軍既失老小，忿怨為蕭幹所誤，為其部曲白得哥殺之，傳首於河間府安撫使詹度，獻于宋朝，徽宗御紫宸殿受賀。

是時，蕭幹既敗於腰鋪，其黨夔離不在峰山亦敗，生擒偽阿骨魯太師，獲耶律德光尊號寶檢、契丹塗金印。常勝軍因此橫甚，藥師復佐之，朝廷不能制。

耶律大石林牙領兵七千到夾山。天祚命殺蕭后并外甥常哥，餘免本罪。

張穀者，平州人也。登進士第。建福元年，授遼興軍^②節度使。因鄉兵經過，殺節度使蕭諦里全族二百口，劫掠家資數十萬。穀以鄉人，能招安息亂，以功權知平州事。燕王死，穀度契丹必亡，籍管內丁壯充軍，得五萬人，馬一千匹，招豪傑，潛為一方之備。蕭太后嘗遣太子少保

時立愛知平州，穀有不容之意。由是立愛常稱疾不出，穀依舊權知州事。會金人下燕，粘罕首以張穀事問，參政知事康公弼曰：“張穀狂妄寡謀，雖有兵數萬，皆鄉民，器甲不備，資糧不給，彼何能為？示之不疑，圖之未晚也。”粘罕招時立愛赴軍前，進加穀為(修)[臨]海軍節度使，依舊知平州事。將發燕民由平州歸國，粘罕謂左企弓曰：“我欲遣精兵二千餘騎先下平州，擒張穀，何如？”左企弓輩以為然，獨康公弼曰：“若加之以兵，是趣平州叛也。公弼舊為平州守臣，願往伺之。”遂授以金牌，馳騎見穀，諭以粘罕之意。穀曰：“契丹天下八路，七路已下，獨一平州，敢有異志？所以未解甲者，北防蕭幹侵掠故也。”厚賂而歸。報曰“彼無足慮”，粘罕信之。遂改平州為南京，復加同中書門下事、判留守事，而實欲圖之也。

五月，金主阿骨打歸燕山，北追天祚，以疾崩於軍中，謚為大聖武元皇帝，廟號太祖。弟吳乞買立，改天輔六年為天會元年，遣燕相左企弓等文武百官并被擄燕民由平州歸國。燕民入平州境，有私訴於穀者曰：“左企弓不謀守燕而使吾民遷徙流離，不勝其苦。今明公臨巨鎮，握強兵，盡忠大遼，必能使我復歸故土，而人心亦有望於公也。”穀召諸將議，皆曰：“近聞天祚復振，出沒於松亭之南，金人所以全軍急趨山西者，恐遼議其後也。若明公仗義，奉迎天祚，以圖興復，先責左企弓叛降之罪而戮之，盡放燕人歸業，南宋必無不納燕人，則平州藩鎮矣。假如金人復來加兵，內用平州之兵，外借宋朝之援，又何懼焉？”穀曰：“此大事，不可草草。翰林學士李石智而多謀，可邀

之密議。”石至，與之謀而陰合。次日，遣將官張謙領五百騎，傳留守令，召燕相左企弓、曹勇義、樞密使虞仲文、參知政事康公弼至於灤州西岸聽候。差議事官趙能就往，疏其十罪，曰：“天祚播遷夾山，不即奉迎，一也；勸皇叔燕王僭號，二也；詆訐君父而降封湘陰王者，三也；天祚嘗遣知閣王有慶前來計議而殺之者，四也；檄書始至而有迎秦拒湘之議者，五也；不謀守燕而拜降者，六也；臣事金國而不顧大義者，七也；根括燕中財物而取悅金人者，八也；致燕人流徙而失業者，九也；教金主發兵先下平州者，十也。”皆無辭以對，遂縊殺之。

六月，榜示燕人，除留守外盡許復業。所有〔逐〕〔逃〕戶拋下田宅為常勝軍占佃者，悉還之。燕人方患遠徙，得歸復業，皆大悅。宋徽宗聞燕民之歸，降詔付帥臣詹度多方存恤，有官者津遣赴闕，換授差遣；餘各令安業，與免三年常賦。張穀聞之，喜為得計，遂以平、營、灤三州降宋。其地乃後唐末契丹太祖所陷，非石晉所割。灤州乃太祖建立也。詹度得張穀納土書，不敢受，密奏於朝，仍語穀毋遽，恐為金人所知。金主聞之，遣闍母國王將騎三千來問罪，穀帥兵拒於營州。闍母以兵少，不交鋒而歸，大書州城門曰“夏熱且去，今冬再來。”穀即妄以捷聞于宋，邀求銀絹數萬疋，并誥勅數道犒賞。

張穀之拒金人也，外則納款於大宋，通好於蕭幹，而緩急求救；內則奉安天祚畫像，凡舉事，先白而後行，仍用遼國官秩，稱保大三年，遣人奉迎天祚，以圖興復。

是時，有燕人李汝弼者，乃翰林學士李石也。高黨

者，三司使高履也。二人先嘗被擄，後緣張穀放歸，往見宣撫王安中，勸朝廷密納之。燕山路轉運趙良(弼)[嗣]力爭以為不可，恐開金人禍端，乞斬汝弼以徇，宋朝不從。授穀秦寧軍節度使，世襲平州，其屬張敦固等皆擢待制。穀得宋詔喜，率官屬郊迎。金人知之，以千騎襲破平州，穀挺身走，欲問道如京師，為郭藥師所獲。由是金人乃歸曲于宋，移檄索取，宋朝不得已，命王安中繼殺之，以水銀漬其首，函送平州。

八月朔，日食，陰雲蔽之不見。

甲辰保大四年。^③秋七月，金人陷應、蔚等州。

是秋，天祚得耶律大石林牙兵歸，又得陰山室韋(乞)[毛]割石兵，自謂天助中興，再謀出兵收復燕、雲。大石林牙力諫曰：“自金人初陷長春、遼陽^④兩路，則[車]駕不幸廣平甸，^⑤而都中京；及陷上京，則都燕山；及陷中京，則幸雲中；及破雲中，則都夾山。向以全師不謀戰備，以至舉國漢地皆為金人所有。今國勢微弱至此而力求戰，非得計也。當養兵待時而動，不可輕舉。”天祚斥而不從。大石林牙託疾不行，天祚遂強率諸軍出夾山，下漁陽嶺，取天德軍、^⑥東勝、寧邊、雲內等州，南下武州，遇金人兀室，戰于奄曷下水。兀室帥山西漢兒鄉兵為前驅，以女真千餘騎伏山間，出室韋(乞)[毛]割石兵後，(乞)[毛]割石兵顧之大驚，皆潰。天祚奔竄入陰夾山。金人以力不能入，恨其不出，謂出必得之；天祚亦畏粘罕兵在雲中，故不敢出。至是聞粘罕歸國，以兀室代戍雲中，乃率驍靺諸軍五萬，並攜其后妃二子秦王、趙王及宗屬南來。大石林牙

諫之，不聽，遂越漁陽嶺，而粘罕已回雲中，復奔山金司，與小胡魯謀歸南宋，又恐不可仗，乃謀奔夏國。計未決，小胡魯密遣人遞報粘罕，粘罕先遣近貴諭降，未復，而金使婁宿馳騎而至，跪於天祚前曰：“奴婢不佞，乃以介冑犯皇帝天威，死有餘罪。”因捧觴而進，遂俘以還。削封海濱王，送長白山東，築室居之。踰年乙巳^①而殂，遼國遂滅。

先是，宋徽宗大觀年間，林摠來使，遼國命其習儀，摠惡其繁瑣，以“蕃狗”詆伴使。天祚曰：“大宋，兄弟之邦；臣，吾臣也。今辱吾左右，與辱吾同。”欲殺之，在廷泣諫乃止。時天祚在山金司，技窮（欲）將來歸，因思往事，恐南宋未必加禮，遁走小勃律，復不納，至夜而回。復欲之雲中，天未明，遇諜者，言婁宿軍且至。天祚大驚，時從騎尚千餘，有精金鑄佛長丈有六尺者，他寶貨稱是，皆委之而遁。值天雪，車馬皆有轍迹，遂為金兵所及。

初，女真人攻時，災異屢見，曾有人狂歌於市曰：“遼國且亡。”急使人追之，則人首獸身，連道“且亡”二字，進入山中不見，變異如此，興亡之數，豈偶然哉！

論曰：前史稱一秦既亡，一秦復生。天祚之阿骨打，即唐季之阿保機也。大勢既去，則涇波濁流；適丁斯時，則人事冥合。方契丹之初，起自阿保機，同光酒色之禍，每每鑿為覆轍。數世後，遊畋射獵，雖或有之，而四時遷徙，迄未嘗有定制。內耗郡邑，外擾鄰封，以至捕海東青於女真之域，取細犬於萌骨子之疆，內外騷然，禍亂斯至。重以天祚不道，禽色俱荒，嬖倖用事，委任非人，節制房庸，部曲紛擾。強盜在門，寧捨嬰兒之金；虎狼出柙，誰

負孟賁之勇。觀夫屏主，可謂痛心！然存亡迭代，亦冥符不偶歟？

①宋宣和五年。金天輔六年，五月以後，吳乞買立，改元天會。

②遼興軍，乃平州也。 ③宋宣和六年，金太宗天會二年。 ④東京也。 ⑤常歲受禮處。 ⑥遼國改豐州也。 ⑦金天會三年，宋宣和七年。

契丹國志卷之十三

后 妃 傳

太祖述律皇后

太祖皇帝后述律氏，本國契丹人也。勇決多權變，太祖行兵御衆，后嘗預其謀。太祖嘗度磧擊党項，留后守其帳。黃頭、臭泊二室韋乘虛合兵掠之，后知之，勒兵以待其至，奮擊，大破之。由是名震諸夷。

后有母有姑，皆踞榻受其拜，曰：“吾惟拜天，不拜人也。”

晉王方經營河北，欲結契丹為援，常以叔父事太祖，以叔母事后。

劉守光末年衰困，遣參軍韓延徽求援，太祖怒其不拜，留之，使牧馬于野。后言于太祖曰：“延徽能守節不屈，此今之賢者，奈何辱以牧園？宜禮用之。”太祖召延徽語，悅之，用為謀主，後為名相。

吳王遣使遺太祖以猛火油，曰：“攻城以油然火，焚樓

櫓，敵以水沃之，火愈熾。”太祖大喜，即選騎三萬，欲攻幽州。后哂之曰：“豈有試油而攻一國乎？”因指帳前樹，謂太祖曰：“此樹無皮可以生乎？”太祖曰：“不可”。后曰：“幽州城亦猶是耳。吾但以三千騎伏其傍，掠其四野，使城中無食，不過數年，城自困矣，何必如此躁動輕舉？萬一不勝，為中國笑，吾部落亦解體矣。”太祖乃止。

太祖之崩也，后屢欲以身為殉，諸子泣告，惟截其右腕，置太祖柩中，朝〔野〕因號為“斷腕太后”，上京置義節寺，立斷腕樓，且為樹碑。

先是，后任智用權，立中子德光，在其國稱太后。左右有桀黠者，后輒謂曰：“為我達語於先帝。”至墓所，即殺之。前後所殺以百數。最後，平州人趙思溫當往，思溫不行，太后曰：“汝事先帝親近，何為不行？”對曰：“親近莫如后，后行，臣則繼之。”太后曰：“吾非不欲從先帝於地下，願諸子幼弱，國家無主，不得往耳。”乃斷一腕，置墓中，思溫亦得免。

太宗與晉帝構怨，帝用兵連年，中國疲弊，契丹人畜亦多死，國人厭苦之。太后謂太宗曰：“使漢人為胡主，可乎？”曰：“不可。”太后曰：“然則何故欲為漢主？”曰：“石氏負恩不可容。”太后曰：“汝今雖得漢地，不能居也。萬一蹉跌，悔何所及？”又曰：“漢兒何得一餉眠？自古但聞漢和番，不聞番和漢，漢兒果能回意，我亦何惜與和？”其後晉復來請和，卑辭謝過，疑其語忿，謂無和意，乃止。

太宗自大梁回師，崩於〔鎮〕〔樂〕城，諸將奉東丹王突欲之子兀欲為帝。太宗喪至國，太后不哭，曰：“待諸部寧

一如故，則葬汝矣。”

先是，太祖崩於渤海，太后殺諸將數百人。太宗崩，諸將懼死，乃謀奉兀欲勒兵北歸，太后聞之大怒，發兵拒之，兀欲以偉王為先鋒，相遇於石橋。李彥韜本從晉主北遷，是時隸太后麾下，為排陣使，迎降於偉王，太后兵由是大敗。兀欲幽述律太后於太祖墓側，居之没打河。

太宗蕭皇后

太宗皇后蕭氏，涿州人，遼興節度使蕭延思之女也。契丹所貴惟耶律與蕭二姓，后一入宮，正位椒房，凡后族皆以蕭為氏。后之生也，有異於常，及長聰慧，美姿容，帝甚寵敬之。生二子，長曰述律，後為穆宗，述軋篡弑之時，眾所擁立；次曰蒙兀。太宗南入大梁，述律后專秉國事，后無所預，弟蕭翰性殘忍，后每戒其多殺。太宗崩於樂城，后時在國。後崩，與帝合喪；暨穆宗即位，立陵寢廟，建碑頌德。

世宗甄皇后

世宗皇后甄氏，漢地人，後唐潞王時為宮人。世宗從太宗南入大梁，得之宮中。時后年四十一歲，世宗幸之，生六子，長曰明記，後即位為景宗，次曰平王、荆王、吳王、寧王、河間王。世宗既登位，册為皇后。后少而端重，風神閑雅；暨正椒宮，繩治有法。自太祖、太宗連年戰爭，驅馳戎馬，曾無寧歲，至帝嗣位，為部族所推而神志昏惰，國人至以“睡王”目之。后性嚴明，宮庭之內不干以毫髮私。

中朝喪亂，劉知遠、郭威代興，自稱為帝。帝承強盛之餘，憤憤無立志。后與參帷幄，密贊大謀，然奄奄歲時，既而有火神淀之弑，后并害焉。其後，后之子明記復為部眾推立。葬于盤巫間山，立陵其側，建廟樹碑。^①

穆宗蕭皇后

穆宗皇后蕭氏，幽州厭次人，父知璠，內供奉翰林承旨。后初產之日，有雲氣馥郁久之。幼有儀觀，進趨軌則，帝居藩時納為妃。暨即位，后正中宮。是時，契丹繼代恬安，兵勢少弱，中朝藩鎮如南唐、北漢及李守貞之類，皆用蠟丸帛書求援以為強，帝不能甚應之。后性柔婉，不能規正，黑山之弑，帝醜忍罹禍焉。后無子，眾共推立明記，是為景宗。

景宗蕭皇后

景宗皇后蕭氏，名燕燕，侍中、守尚書令蕭守興之女也。或以燕燕為北宰相蕭思溫女。景宗自幼年遭火神淀之亂，世宗與后同時遇害，帝藏積薪中，因此嬰疾，及即位，國事皆燕燕決之。蕭守興以后父超封魏王，共決大政。景宗崩，后領國事，自稱太后。凡四子，長名隆緒，即聖宗；次名隆慶，番名菩薩奴，封秦晉王；次名隆裕，（次）〔番〕名高七，封齊國王；次名鄭哥，八月而夭。女三人，長曰燕哥，適后弟北宰相留住哥，署駙馬都尉；次曰長壽奴，適后姪東京留守悖野；次曰延壽奴，適悖野母弟肯頭。延壽奴出獵，為鹿所觸死，后即縊殺肯頭以殉葬。后有姊二

人，長適齊王，王死，自稱齊妃，領兵三萬屯西鄙驢駒兒河，嘗閱馬，見番奴撻覽阿鉢姿貌甚美，因召侍宮中，后聞之，繫撻覽阿鉢，扶以沙囊四百而離之。踰年，齊妃請於后，願以為夫，后許之，使西捍韃靼，盡降之。因謀帥其衆奔骨歷札國，結兵以篡后，后知之，遂奪其兵，命領幽州。次適趙王，王死，趙妃因會飲毒后，為婢所發，后鳩殺之。后天性忮忍，陰毒嗜殺，神機智略，善馭左右，大臣多得其死力。

統和年間，舉國南征，后親跨馬行陣，與幼帝提兵初趨威虜軍、順安軍，束趣保州。又與幼帝及統軍順國王撻覽合勢以攻定州，餘衆直抵深、祁以東。又從陽城淀緣胡盧河踰關，南抵瀛州城下，兵勢甚盛，后與幼帝親鼓衆急擊，矢集城上如雨。復自瀛州抵貝、冀、天雄，南宋惶遽，駕親幸濱滯，然后為謀主；至遣王繼忠通好，及所得歲幣，亦后之謀也。國中所管幽州漢兵，謂之神武、控鶴、羽林、驍武等，皆后自統之；其將有南北皮室、當直舍利等。是時，聖宗年少，宋使臣曹利用、張皓之議和，皆后與幼帝引至帳前，問勞設館。左飛龍使韓杞至宋朝，先授幼帝書，再升殿跪奏云：“太后令臣上問皇帝起居。”此可以知太后專其政，人不畏其幼帝也。是年，帝上后尊號曰睿德神略應運啓化法道洪仁聖武開統承天皇太后。

自南北通和後，契丹多在中京。武功殿，聖宗居之；文化殿，太后居之。好華儀而性無檢束，每宴集有不拜不拱手者。惟后願固盟好而年齒漸衰，宰相耶律隆運專權，有辟陽侯之幸，寵榮終始，朝臣莫及焉。其後歸政于帝，

未踰月而崩。臨朝二十七年，年五十七，謚曰宣獻。

聖宗蕭皇后

聖宗皇后蕭氏，父突忽，追封陳王。性慎靜寡言，聖宗選入宮，生木不孤，即興宗，次曰達姐李，又公主二人。册為順聖元妃。三兄二弟皆封王，姊妹封國夫人。弟徒古撒又尚燕國公主，兄解里尚平陽公主，陳六尚南陽公主，皆拜駙馬都尉。又納兄孝穆女為興宗后，弟高九女為帝弟妃。前後恩賜，不可紀極；諸連姻婭，並擢顯官。齊天后蕭氏，本正后也，屢誕皇子不育，聖宗顧待隆渥。元妃妬恩媚寵，讒毀百端，聖宗終不之信。

聖宗崩，元妃自立為太后，乃殺齊天后，詳見帝紀。后殘忍陰毒，居喪未及一年，先朝所行法度變更殆盡，不俟聖宗服闋，加尊號曰法天皇太后。駙馬蕭懋得一子正梯，自景宗朝承天后襁育之；逮至成人，聖宗恩視比之皇子，尚韓國公主，後平渤海，勳業隆重，封蘭陵王。后兄弟媚而殺之，連坐如木柵里大師、觀音大師、彌勒大師等十餘人，一皆功臣，駢首誅夷，內外嘆憤。犯臟等人累朝切齒，雖經赦宥，並不叙用，山陵未畢，后已洗滌用之，一一擢諸清途。毛克和等四十人，后家奴隸，咸無勞績，皆授防、團、節度使；至於出入宮掖，詆慢朝臣，賣官鬻爵，殘毒番漢。自是幽、燕無行之徒願沒身為奴者衆矣。后姊秦國夫人，早年嫠居，艷醜私門，后見長沙王名謝家奴，瑰偉美姿容，為殺其妃，而以秦國妻之。后妹晉國夫人，喜戶部使耿元吉貌美，后從晉國之請，亦為殺其妻，以晉國妻

之。淫虐肆行，刑政弛紊，南北面番漢公事率其弟兄掌握之。凡所呈奏，弟兄聚議，各各弄權，朝臣朋黨，每事必知。太后臨朝凡四年，興宗方幽而廢之，契丹已困矣。

太后之廢也，諸舅滿朝，權勢灼奕，帝懼內難，乃與殿前都點檢耶律喜孫、護立太保耶律劉三等定謀廢后，召硬寨拽刺護位等凡五百餘人，帝立馬於行宮東之二里小山上，喜孫等直入太后宮，驅后登黃布車，幽于慶州。諸舅以次分兵捕獲，或死或徙，餘黨並誅。是時乃重熙之二年也。法天既廢，仍詔靈州節度使、內庫都點檢王繼恩內侍，都知監門衛大將軍、監南北面番漢臣僚，具不便軍民三十餘事，並立改之。

後數年，帝聽講《報恩經》感悟，迎回太后。

興宗蕭皇后

興宗皇后蕭氏，應州人，法天皇后弟樞密楚王蕭孝穆之女也。容德兼美，曲盡和敬。生三子，長曰洪基，即道宗；次曰紇根，名洪道，封燕王；又次曰壽千，名洪德，封晉王。帝酷好沙門，縱情無檢，后每伺帝有所失，隨即匡諫，多所弘益。洪基即位，尊為睿聖洪慈順天皇太后。清寧五年后崩，與帝合葬。

道宗蕭皇后

道宗皇后蕭氏，平州〔人〕，贈同平章事蕭顯烈女也。后生有神光之異，後入宮為芳儀，進位昭儀。生空古里，是為秦王，後名元吉，餘子皆不育。道宗登位，后正位中

宮，性恬淡寡欲。魯王宗元之亂，道宗與同射獵，內外震恐，未知音耗，后勒兵鎮帖中外，甚有聲稱。後崩，葬祖州。

海濱王蕭皇后

海濱王后蕭氏，平州〔人〕，節度使蕭檣刺之女也。奉先、保先兄弟皆緣后寵，柄任當朝。后性閑淑有則度，遭女真之亂，天祚荒淫，后不能違，以至禍敗焉。山金司之禍，后并被擒，粘罕納為次室。其後耶律余覲雲中起兵，兀室誅余覲并及於后。兀室回至燕山，請罪於粘罕曰：“蕭氏，契丹天祚元妃也。與兄實乃仇讎，不得已而從，彼素忍死以侍兄者，將有待於今日也。今既見事無成，恐或不利於兄；且兄橫行天下，萬夫莫當，而此人帷幄之間，可以寸刃害兄於不測矣。事當預防，以愛兄故，已擅殺之。”粘罕起而謝之，既而泣下。

海濱王文妃

海濱王文妃，本渤海大氏人。幼選入宮，聰慧閑雅，詳重寡言。天祚登位，册為文妃，生晉王。文妃自少時工文墨，善歌詩，見女真之禍日日侵迫，而天祚醉心畋遊，不以為意，一時忠臣多所疎斥，時作歌詩以諷諫，曾有歌云：“莫嗟塞上暗紅塵，莫傷多難畏女真。不如塞却姦邪路，選取好人。直是卧薪而嘗膽，激壯士之捐身。便可以朝清漠北，夕枕燕雲。”詞多不備載，其諷切不避權貴如此。又會作《詠史詩》云：“丞相朝來劍佩鳴，千官側目寂無聲。

養成外患嗟何及，禍盡忠臣罰不明。親戚並居藩翰位，私門潛蓄爪牙兵。可憐昔代秦天子，猶向宮中望太平。”其詩之感烈有如此者，天祚見而銜之。

是時，契丹緣金人之禍，喪郡縣幾盡，天祚遊畋不輟，嘗有倦勤意。諸子中惟晉王最賢，蕭奉先乃元妃兄，深忌之。會文妃之姊適耶律撻曷里，妹適耶律余覲，奉先誣告余覲欲立晉王，尊天祚為太上皇。帝於是戮撻曷里并其妻，文妃與晉王相繼受誅。

論曰：孽呂專朝，則人盡喪妖媚之質；艷武稱制，則羅網碎王侯之軀。天下有猜忍陰毒之性，武夫悍卒所無，而於婦人女子乎見之，初興之迷律，繼軌之二蕭是已。然能忍於諸酋之屠戮，而不能忍於長陵之拔淚；能勇於南侵之塗炭，而不能勇於辟陽之割恩。齊天可殺也，不大橫歟；武轍可尋也，不伊惑歟。若乃海濱降號，不見泣竹之妃；賈禍詩歌，空餘憂國之涕。斯亦遭家不造，末如之何矣！

①碑文，翰林學士李昉所撰。

契丹國志卷之十四

諸王傳

東丹王

東丹王名突欲，太祖長子，母曰述律氏。太祖攻渤海，拔其夫餘城，更名曰東丹國，命其長子突欲鎮東丹，號人皇王，時唐明宗初年也。太祖崩於渤海，述律后使少子安端少君守東丹，與長子突欲奉太祖之喪，發渤海。

先是，突欲鎮東丹時乃渤海國亦有宮殿，被十二旒冕，服皆畫龍像，稱制行令。凡渤海左右平章事、大內相已下百官，皆其國自除授，歲貢契丹國細布五萬疋、氈布十萬疋、馬一千匹。太祖崩，述律后愛中子德光，欲立之，至西樓，命與突欲俱乘馬立帳前，謂諸將曰：“二子吾皆愛之，莫知所立，汝曹擇可立者執其轡。”諸將知其意，爭譴躍曰：“願事元帥太子。”后曰：“衆之所欲，吾安敢違？”遂立之，為天皇王，稱皇帝。突欲慍，帥數百騎，欲奔唐，為邏者所遏。后不罪，遣歸東丹。唐明宗長興元年，突欲

自以失職，帥部曲四十人，越海自登州奔唐。明宗賜姓東丹，名慕華，以為懷化節度使、瑞慎等州觀察使，其部曲及先所俘將楊隱等，皆賜姓名。楊隱姓狄，名懷惠。

次年，明宗更賜東丹慕華姓名曰李贊華。

明宗長興三年，以贊華為義成節度使，選朝士為僚屬輔之。贊華但優游自奉，不豫政事，明宗嘉之；雖時有不法，亦不問，以莊宗後宮夏氏妻之。贊華好飲人血，姬妾多刺臂以吮之。婢僕小過，或抉目，或刀割、火灼。夏氏不忍其殘，奏離婚為尼。

贊華之歸唐，乘船踰海，因於海岸立木為碑，惟書二十漢字詩云：“小山壓大山，大山全無力。羞見故鄉人，從此投外國。”

贊華性好讀書，不喜射獵。初在東丹時，令人賚金寶私入幽州市，書，載以自隨，凡數萬卷，置書堂於賢巫閭山上，扁曰望海堂。^①

潞王末年，石晉內叛，求援契丹。潞王已危，乃遣宦者秦繼旻、皇城使李彥紳殺之，贊華遇害於其第。石晉詔贈贊華燕王，遣使送其喪歸國。其後太宗破石晉，入中原，求得李彥紳、秦繼旻殺之，以其家族財物賜東丹王子兀欲。兀欲後即位為世宗，葬之賢巫閭山，謚讓國皇帝。

恭順皇帝

自在太子名阮，太祖第三子，母曰述律氏。少豪

俠，有智略，善彈工射，太祖奇之，曰：“吾家鐵兒也。”征渤海時，山坂高峻，士馬憊勞苦，太子徑於東谷緣崖而進，屢戰有功。後渤海平，封為自在太子。尋薨，葬於祖州，追謚曰恭順皇帝。一子拽刺，封趙王，為景宗所害。

孝文皇太弟

孝文皇太弟隆慶，番名菩薩奴，母曰蕭氏，景宗第二子。生而岐嶷，儼若成人。幼時與羣兒戲，為行伍戰陣法，指揮意氣，無敢違者。景宗奇之，曰：“此吾家生馬駒也。”長善騎射，馳捷如風。定州之戰，隆慶封為梁王，加兵馬大元帥，從其母蕭后以行，力戰深入，與擒王繼忠有功，拜西京留守，封秦晉國王，又拜尚書令。尋薨，葬祖州，謚曰孝文皇太弟。

齊國王隆裕

齊國王隆裕，番名高七，母曰蕭氏，景宗第三子。性沉毅，美姿容。始封鄭王，遷授西南面招討使，拜吳國王。自少時慕道，見道士則喜。後為東京留守，崇建宮觀，備極輝麗，東西兩廊，中建正殿，接連數百間。又別置道院，延接道流，誦經宣醮，用素饌薦獻，中京往往化之。後蕭太后一年而薨，追封齊國王。

魯王宗元

魯王宗元，興宗同母弟也。少而雄耿，狠愎過人。始

封鄭王，又加兵馬大元帥，封晉國王。性極殘忍，每出一囚犯死罪者，命衆集射，斬而縛之，流血滿前，飲啗自若。意志不臣，每伺時讐。洪基嗣立，奉長樂之命，以為皇叔。後因遊獵伺間弑帝，左右遮救得免，宗元併其子洪孝受誅。

晉王宗懿

晉王宗懿，番名查箇只，聖宗弟孝文皇太弟隆慶之子也。少有氣局，幹略過人。聖宗雅愛諸姪，每誡之曰：“汝勿以材能陵物，勿以富貴驕人。惟忠惟孝，保家保身。”始封中山王，歷龍化州、饒、建、宜、平州節度使，改封晉王，薨。

燕王洪道

燕王洪道，番名叱地好，道宗同母弟也。頗有武略，庫莫奚侵擾，詔洪道討之。洪道伏兵林中，佯敗而走，奚掠輜重，洪道與伏兵合擊之，盡殲。後渤海高麗樂反，又命洪道討之。終於燕京留守，封燕王。

梁王信寧

梁王信寧，番名解里，北大王烏幹之子。始以祇候郎君授林牙，雲州、奉聖州、蔚州節度使、同平章事。與帝同謀，逐太后出宮，拜南大王、北大王、楊隱、南宰相，封梁王，加尚父，致仕。

論曰：后不可並，並后則傾；嫡不可匹，匹嫡則危。契

丹起自朔荒，吞噬上國，嫡庶之分，亦安知之？元帥太子之稱，不以屬之突欲，而以屬之德光，則其立國之初，已可議矣。既而述軋生問鼎之謀，宗元受皓首之戮，亦何怪其然哉！

①以南至海可二十里有望海寺也。

契丹國志卷之十五

外 戚 傳

述 律 魯 速

述律魯速，太祖皇后兄也，蕃部人，世為酋長。少壯武有膽略，部人憚之。從太祖平奚有功，授統軍使。盧文進自新州來奔，太祖歲入燕塞，魯速以兵從。又從圍周德威於幽州，機巧善智，城幾克，會救至，退師。改授奚王府監軍、東路兵馬都統軍。子屈列，尚奧哥公主。

蕭 延 思

蕭延思，涿州人，太宗皇后父也。少習武藝，有材力，能左右持射。自太祖時從平諸番，常率騎數十深入敵陣，屢戰有功。太宗南援石晉，時少掃古撒已死矣，太宗每嘆曰：“斯人尚在，中原不足平也。”終北面都部署、遼興節度使。

劉 珂

劉珂，平章事晞之次子也。尚世宗妹燕國公主。少善射，以材能稱。賦性謹重，未嘗有過，為太宗所知。太宗忿石晉負恩，連年南牧，戰定州，時深入，帝馬陷泥濘中，珂下馬奉帝出，身被數十瘡，流血滿體，太宗壯之。遷林牙、行宮都部署、西北路兵馬招討使。從入大梁，授同知京府事，尋授漢人樞密使，封吳王。

蕭 守 興

蕭守興，番名喂瓜，侍中解里鉢長子也。始為祗候郎君、林牙、左宣徽使。景宗居藩，燕燕為妃；即位，册立為后。守興以后父為侍中，共當國政。是時，景宗嬰疾，北漢見僭叛悉平，南宋憂逼，屢遣蠟丸求援，而守興柱石非材，兵勢少弱，石嶺關南之敗，喪萬餘人。後又遷尚書令、封魏王，任遇彌堅。年既昏耄，事多徇私，吏有言韻微說者，抉摘示明，朝廷以此患之，畏后不敢言。

蕭 孝 穆

蕭孝穆，番名陳六，法天皇后兄也。初，后選人宮為聖宗夫人，授大將軍。后封元妃，遷北宰相，封燕王。孝穆機悟有才藝，馳馬立射五的，時人莫能及。聖宗在位，喜其忠謹，與參軍國大謀。時渤海反於東京，有衆數萬，命孝穆為行營兵馬都統討之。大酋宿石真柵于金間山上，險峻不可攻，孝穆為宣揚恩意，開其自新，凡所招降七

萬餘戶而遷，以功授東遼王。聖宗疾亟，急召赴闕。聖宗崩，以輔立功封晉王。又納女為興宗后，授樞密使、楚國王。

蕭 奧 只

蕭奧只，番名掃古，燕京統軍使撻里麼之子。撻里麼於統和中攻南宋澶州，為流矢所中，死城下。奧只以父戰功為祗候郎君，遷林牙、契丹諸行宮都部署，又遷彰國節度使，奧只雖家門貴盛而虛己接物，汲引諸名士，時論賢之。宋張昇來使，奧只以侍中為館伴，從容言：“兩朝盟好，誓若山河，毋以小嫌，遽傷大信。”與昇論談移日，曲盡其懼。昇亦云：“侍中，北朝儀表也。”深敬異之。後授北宰相、宣徽使，封鄭王。

論曰：漢王諸呂，炎光幾隳；唐柄三思，皇運斯厄。古今外戚之家，未有不驕奢恃權，馴至於暨且敗也。述律諸人，起兜鍪，連輝赫奕，有繫纆金印之封，無彰彰鷗吻之迹，難矣！然考契丹之所以亡，竟不出於外戚之家，豈亂之至匪降自天？時君終當以后族為永鑒歟！如蕭奉先諸人是已，別有傳。

契丹國志卷之十六

列 傳

韓 延 徽

韓延徽，幽州人也。仕劉守光為幕府參軍，守光與六鎮構怨，自稱燕帝，延徽諫之不從，守光置斧質於庭，曰：“敢諫者斬。”孫鶴力諫，守光殺之。延徽以幕府之舊，且素重之，得全。

守光末年衰困，盧龍巡屬皆入于晉，遣延徽求援於契丹。太祖怒其不拜，留之，使牧馬於野。延徽有智略，頗知屬文，述律太后言於太祖，曰：“延徽能守節不屈，此今之賢者，奈何辱以牧圉，宜禮用之。”太祖召延徽語，悅之，遂以為謀主，舉動訪焉。

延徽始教太祖建牙開府，築城郭，立市里，以處漢人，使各有配偶，墾蕪荒田。由是漢人各安生業，逃亡者益少。契丹威服諸國，延徽有助焉。

頃之，延徽逃奔晉王，晉王欲置之幕府，掌書記王緘

疾之，延徽不自安，求東歸省母。過真定，止於鄉人王德明家。德明問所之，延徽曰：“今河北皆為晉有，當復詣契丹耳。”德明曰：“叛而復往，得無取死乎？”延徽曰：“彼自吾歸，如喪手目。今往詣之，彼手目復完，安肯害我？”既省母，遂復入契丹。太祖聞其至，大喜，如自天而下，拊其背曰：“曷者何往？”延徽曰：“思母，欲告歸，恐不聽，故私歸耳。”太祖待之益厚。及稱帝，以延徽為相，累遷至中書令。

晉王遣使至契丹，延徽寓書於晉王，叙所以北去之意，且曰：“非不戀英主，非不思故鄉，所以不留，正懼王絨之讒耳。因以老母為託。”且曰：“延徽在此，契丹必不南牧。”故終同光之世，契丹不深入南牧，延徽之力也。

後，太宗援石晉，得幽、燕，會同稱制，以延徽兼樞密使、同平章事。後數年，延徽卒於契丹。

張 礪

張礪，磁州滏陽人也。唐魏王繼岌征蜀，時為掌書記。繼岌死，礪詣王府慟哭久之。潞王時，為翰林學士。

石敬瑭叛，潞王以趙德鈞為行營招討，礪以翰林學士為行營判官。礪隨德鈞入契丹，太宗復以為翰林學士。礪事太宗甚忠直，遇事輒言，無所隱避，太宗甚重之。後自契丹逃歸中國，為追騎所獲，太宗責之曰：“何故捨我去？”對曰：“臣華人，飲食衣服皆不與此同，生不如死，願早就戮。”太宗顧通事高彥英曰：“吾嘗戒汝善遇此人，何故使之失所而亡，若失之，安可再得耶？”遂答彥英而謝。

礪。

是年，太宗會同改元，參用中國人為公卿百官，以礪為翰林承旨，兼吏部尚書。

太宗既入大梁，一時番將恣橫，肆行殺戮，如蕭翰、麻荅、耶律郎五之類，縱兵殺掠尤甚。礪言於太宗曰：“今大遼已得天下，中國將相宜用中國人為之，不宜用北人及左右近習。苟政令乖失，則人心不服，雖得之，猶將失之。”太宗不從。後改除為右僕射兼門下侍郎、同平章事。

大兵北歸，回居恒州，蕭翰、麻荅以鐵騎圍其第，礪方卧病，出見之。翰數之曰：“汝何言於先帝，云胡人不可為節度使？又吾為宣武節度使，且國舅也，汝在中書，乃帖我；又先帝留我守汴州，令我處宮中，汝以為不可，又譖我及解里於先帝，云解里好掠人財，我好掠人子女。我必殺汝！”命鎖之，礪抗聲曰：“此皆國家大體，吾實言之。欲殺即殺，奚以鎖為？”麻荅以大臣不可專殺，力救止之，翰乃釋之。是夕，礪憤恚而卒。

趙延壽

趙延壽，相州人也。父德鈞，唐為盧龍節度使。

石敬瑭叛，與契丹會擊張敬達，潞王令德鈞將幽州兵由飛狐出契丹軍後。德鈞密與契丹通，許以厚賂，云：“若立己為帝，即請以見兵南平洛陽，與契丹為兄弟國”。契丹以晉安未下，欲許德鈞之請。晉高祖亟使桑維翰入說太宗，太宗從之，指帳前石謂德鈞使者曰：“我已許石郎，此石爛，方可改也。”會太宗至潞州，德鈞父子迎謁於高

河。太宗問德鈞曰：“汝在幽州所置銀鞍契丹直何在？”德鈞指示之，太宗命盡殺之於西郊，凡三千人。遂鎖德鈞、延壽，送歸其國。德鈞見述律太后，悉以所賣寶貨并籍其田宅獻之，太后問曰：“汝近者何為往太原？”德鈞曰：“奉唐主之命。”太后指天曰：“汝從吾兒求為天子，何妄語耶？”又自指其心曰：“此不可欺也。”又曰：“吾兒將行，吾戒之云：‘趙大王若引兵北向渝關，亟須引兵歸，太原不可救也。’汝欲為天子，何不先擊退吾兒，徐國亦未晚。汝為人臣，既負其主，不能擊敵，又欲乘亂邀利，所為如此，何面目復求生乎？”德鈞俛首不能對。又問：“器玩在此，田宅何在？”德鈞曰：“在幽州。”問：“今屬誰？”德鈞曰：“屬太后。”太后曰：“然則又何獻焉？”德鈞益慙，自是鬱鬱不多食，踰年而死。

德鈞既卒，太宗釋延壽而用之。其後會同改元，參用番漢，以延壽為樞密使，尋兼政事令。

太宗遣使如洛陽，取延壽妻唐國長公主以歸。

會同六年，以延壽為盧龍節度使。

是時，晉少帝初立，構怨契丹。延壽欲代晉帝中國，屢說太宗擊晉，太宗頗然之，乃集山後及盧龍兵，合五萬人，使將之，委之經略中國，曰：“得之，當立汝為帝。”又嘗指延壽謂晉人曰：“此汝主也。”延壽信之，由是為契丹盡力。

會同八年，延壽與其弟延照將兵五萬南征，逼貝州，陷之，吳玘死，所殺且萬人。太宗逼瀧州，屯元城，延壽屯南樂。以延壽為魏博節度使，封燕王。

會同十一年，延壽進言於太宗，陳橋降卒得免死者二十萬萬人。

先是，晉軍降契丹，太宗悉收其鎧仗數百萬，貯恒州，驅馬數萬歸其國，遣杜重威將其衆從，已而南，及河，太宗以晉兵之衆，恐其為變，欲悉以胡騎擁而納之河流，或諫曰：“晉兵在他所者尚多，彼聞降者盡死，必皆拒命為患，不若且撫之，徐思其策。”太宗乃使重威以其衆屯陳橋。會久雪，官無所給，士卒凍餒，咸怨重威，相聚而泣。重威每出，道旁人皆罵之。太宗猶欲誅晉兵，延壽言於太宗曰：“皇帝親冒矢石，以取晉國，欲自有之乎，將為它人取乎？”太宗變色曰：“朕舉國南征，五年不解甲，僅能得之，豈為它人乎？”延壽曰：“晉國南有唐，西有蜀，常為仇敵，皇帝亦知之乎？”曰：“知之。”延壽曰：“晉國東自沂、密，西及秦、鳳，延袤數千里，邇於吳、蜀，常以兵戍之。南方暑濕，上國之人不能居也。它日車駕北歸，以晉國如此之大，無兵守之，吳、蜀必相與乘虛入寇，如此，豈非為它人取之乎？”太宗曰：“朕不知也，然則奈何？”延壽曰：“陳橋降卒可分以戍南邊，則吳、蜀不能為患矣！”太宗曰：“朕昔在上黨，失於斷割，悉以唐兵授晉，既而返為仇讎，北向與吾戰，辛勤累年，僅能勝之。今幸入吾手，不因此時悉除之，豈可復留以為後患乎？”延壽曰：“屬留晉兵於河南，不質其妻子，故有此憂；今若悉徙其家於恒、定、雲、朔之間，每歲分番使戍南邊，何憂其為變哉？此上策也。”太宗悅曰：“善，惟大王所以處之。”由是陳橋兵始得免，分遣還營。

天祿元年，太宗初許延壽代晉，後負約，恨之，謂人

曰：“我不復入龍沙矣。”

太宗崩，延壽偽稱受太宗遺詔，權知南朝軍國事，永康王兀欲鎖之。後二年，延壽卒於契丹。

論曰：契丹之興，當朝柄國，率其種人，名曰番漢雜用，然漢人無幾矣，而名之彰彰尤著者，莫如延徽諸人。方延徽屈身牧圉，微述律后一言，終其身夕陽牛背間耳。城郭宮室，誰其畫之？威服諸番，誰其翼之？太祖之興，延徽有力焉。礪與延壽自南歸北，委質太宗朝，痛番臣之橫肆，救陳橋之降卒，謂非忠誠天性不可；而一困於麻答之強，一失於睥睨之誤，豈不重可嗟歟！

契丹國志卷之十七

列 傳

蕭 翰

蕭翰，本國人，述律太后之兄子也，其妹復為太宗后。翰始以蕭為姓，自爾契丹后族皆稱蕭氏。翰最殘忍，工騎射。太宗與張敬達交鋒，翰等自東北起，衝唐兵為二，唐兵大敗，步兵死者萬人。

太宗南入大梁，以天時向暑，難久留，欲留親信一人為節度使。百官請迎太后，太宗曰：“太后族大如古柏根，不可移也。”又欲盡以晉百官自隨，恐搖人心，乃詔有職事者從行，餘留大梁。復以汴州為宣武軍，翰為節度使。

滋德宮有宮人五十餘人，翰欲取之，宦者張環不與，翰破鎖奪宮人，執環燒鐵灼之，腹爛而死。

初，翰聞北漢高祖擁兵而南，欲北歸，恐中國無主，必大亂，已不得從容而去。時唐明宗子許王從益與王淑妃在洛陽，翰遣高談翰迎之，矯稱太宗命，以從益知

南朝軍國事，召己赴恒州。從益、淑妃匿於徽陵下宮，不得已而出，至大梁，翰立以為帝，帥諸酋長拜之。立百官，留燕兵千人為從益宿衛，翰乃辭行。

翰至恒州，以兵圍張礪之第。麻荅以大臣不可專殺，乃止。

麻 荅

麻荅，太宗之從弟也。會同九年，契丹攻黎陽，麻荅先驅，晉博州刺史周儒以城降。未幾，周儒引麻荅自馬家口濟河，營於東岸，攻鄆州北津。

又陷德州，擒刺史尹居璠。

太宗南入大梁，以麻荅為安國節度使，又以為中京留守。

至恒州，崔廷勳見麻荅，趨走拜，起，跪而獻酒，麻荅踞而受之。

麻荅貪殘狠忍，民間有珍貨美女，必奪而取之。又捕村民，誣以為盜，披面抉目斷腕，焚灸而殺之，欲以威衆。常以其具自隨，左右前後懸人肝膽手足，飲食起居於其間，語笑自若。出入或被黃衣，用乘輿，服御物，曰：“茲事漢人以為不可，吾國無忌也。”又以宰相員不足，乃牒馮道判史館，李崧判弘文館，和凝判集賢，劉煦判中書，其僭妄如此。然契丹或犯法，無所容貸，故市肆不擾。常恐漢人亡去，謂門者曰：“漢有窺門者，即斷其首來。”

麻荅遣使督運於洛州，洛州防禦使薛懷讓聞漢高祖入大梁，殺其使者，舉州降。高祖遣兵萬人會懷讓，攻劉

鐸於邢州，不克。鐸請兵於麻荅，遣其將楊安及前義武節度使李殷將千騎攻懷讓於洺州。懷讓嬰城自守，安等縱兵大掠於邢、洺之境。契丹所留守不滿一千，麻荅令所司給萬四千人食，收其餘以自入。麻荅常疑漢兵，且以為無用，稍稍廢省，又損其食以飼胡兵，衆心怨憤。漢兵謀攻麻荅，然畏契丹尚強，猶豫未決；會楊衮、楊安等軍出，契丹留恒州者僅八百人，何福進等遂決計。未幾，召馮道、李崧會葬太宗，漢兵突入府中，焚衙門，與契丹戰。會日暮，有村民數千，諷於城外，欲奪北兵寶貨婦女，北兵懼而北遁。麻荅、劉晞、崔廷勳皆奔定州，與義武節度使耶律忠合。漢有白再榮者，拘人取財，恒州謂之白麻荅，虐可知矣。麻荅歸，世宗虜殺之。

耶律郎五

耶律郎五，即耶律忠，國主族人也。

太宗南攻石晉，郎五扈從，累有戰功。太宗入大梁，以郎五為鎮寧節度使。

郎五性殘虐，澶州人苦之。賊帥王瓊率其徒千餘人，襲據南城，北渡浮航，縱兵大掠，圍郎五於牙城。郎五聞漢平鄴都杜重威，常懼華人為變。未幾，郎五與麻荅等焚掠定州，悉驅其人棄城北去。方廣千里，剽掠殆盡。

論曰：陰山異氣，殺伐鍾焉，運數所乘，山河改色。太宗德光，鐵馬中原；翰等諸人，分麾長驚。而谿壑難滿，剽掠窮凶，而使忠臣鬱憤恚之胸，生靈塗肝腦之血，不亦重可悲歟！

契丹國志卷之十八

列 傳

盧 文 進

盧文進，字大用，幽州范陽人也。文進身長七尺，偉儀容。守光與晉王構怨，時晉王遣周德威攻幽州，文進以騎先降，拜蔚州刺史。

是時，李存矩統山後八軍，為新州團練使。及晉王在河上，與劉鄩血戰，會新州兵。存矩募山後勁兵數千人，驍勇難制，又課民出馬，民以十牛易一馬，怨之入骨，山後兵又憚遠行，至祁溝關，聚謀作亂。文進有女少而艷，存矩求為側室，文進不敢違，而心常內愧，因與亂軍殺存矩。攻新州不克，遂帥其衆奔于契丹。後引契丹軍攻新州，刺史安金全不能守，棄城去。周德威援之，進攻新州，契丹衆數萬，德威不勝，大敗奔歸。文進與契丹進攻幽州，圍城且二百日，城中危困，晉王親將兵救之，方始解去。契丹以文進為幽州節度使，又以為盧龍節度使。

文進在新州，歲歲以輕騎出入塞上，攻掠剽奪，無有寧歲，幽、瀛、涿、莫間常被其患。又教契丹以中國織紙工作無不備，契丹由此益強。南兵屯涿州，時饋運自瓦橋關至幽州，嚴界堠，常苦鈔奪，為邊患者十餘年，皆文進所為也。後奔南唐。

初，文進攻新州不克，夜走墜壑，一躍而出，明日視之，乃郡之黑龍潭也，絕岸數丈，深不可測。又嘗有大蛇，徑至座間，引首及膝，文進取食飼之而去。由是自負往來南北，無挫衄焉。

論曰：皇運將傾，則大盜移國；狂謀未敗，則桀猶不亡。求之五代，盧文進其人歟？方其自負龍蛇之異，叛亂南北之間，見其不敗者，謂之智，考其成敗，則謂之天。饋運可掠也，惠彼戎車之膏；燕地可取也，痛哉肝腦之血。此感今懷古之士，觀此未有不為之慨然者。

耶律隆運

耶律隆運，本漢人，姓韓名德讓。祖知古，加右僕射、中書令。父匡嗣，追封秦王。隆運性忠愿謹慤，智略過人。景宗嬰疾，后燕燕與決國事，雅重隆運，擢授東頭供奉官，充密院通事，尋轉上京皇城使，超授遼州節度使，改授同知燕京留守，又遷平州節度使，改樞密使，兼行營都部署。

隆運自在景宗朝翼決庶政，帝后少年，有辟陽之幸。

景宗疾亟，隆運不俟詔，密召其親屬等十餘人並赴行帳。時諸王宗室二百餘人擁兵握政，盈布朝廷。后當朝

雖久，然少姻婭助，諸皇子幼穉，內外震恐。隆運請于后，易置大臣，敕諸王各歸第，不得私相燕會，隨機應變，奪其兵權。時趙王等俱在上京，隆運奏召其妻子赴闕。景宗崩，事出倉卒，布置已定，乃集番漢臣僚，立梁王隆緒為皇帝，時年十二，後為聖宗，仍尊后曰仁慈翊聖應天皇太后。尋以輔立功守司徒、同政事，進封楚王，賜姓耶律氏及改賜今名。未幾，拜大丞相，充契丹、漢兒樞密使，南北面諸行宮都部署，改封齊王。

隆運孜孜奉國，知無不為，忠孝至誠，出於天性。帝以隆運輔翼功前後少比，乃賜鐵券誓文，躬自親書，齋戒焚香，於北斗星下讀之，宣示番漢諸臣。又以隆運一族附籍橫帳，列於景宗廟位。契丹橫帳，猶宋朝玉牒所也。

隆運自為相以來，結懽宋朝，歲時修睦，無少間隙，帖服中外，靡有邪謀。

未幾，改封晉王，授尚書令，賜以几杖，入朝不拜，上殿不趨，左右護衛特置百人。北法，護衛惟國主有之。帝以隆運動大，恩數優渥，見則盡敬，至父事之，秦（國）〔齊〕二王每日一問起居，至隆運所居帳二里外，已去蓋下車，徒步而進；暨其回也，列揖於帳外，隆運坐而受之。帝或至其帳，亦五十餘步下車，隆運出迎盡禮，帝亦先為之揖；及入，內同家人禮，飲膳服食，盡一時水陸珍品。諸國爭為奇怪入貢，動駭耳目。隆運疾，帝與太后禱告山川，召番漢名醫診視，朝夕不離左右。

及薨，帝與后、諸王、公主已下并內外臣僚制服行喪，葬禮一依承天太后故事。靈柩將發，帝自挽輜車哭送，羣

臣泣諫，百餘步乃止。葬乾陵側，詔影堂制度一同乾陵。又詔諸處應有景宗御容殿，皆以隆運真容置之殿內。其眷遇始終，無與比倫有如此者。

隆運兄弟九人，緣翼戴恩，超授官爵，皆封王。諸姪三十餘人，封王者五人，餘皆任節度使、部署等官。隆運薨，無子，帝特以皇姪周王宗業紹其後。^①始封廣王，未幾徙封周王，歷中京留守，平州、錦州節度使。宗業薨，葬乾陵側。宗業無子，帝復以周王同母弟宗範繼隆運後，歷龍化州節度使、燕京留守，封韓王。

論曰：古今天下有權臣，有重臣。權臣之權，其君危如綴旒；重臣之重，其國安如泰山。耶律隆運因緣中宮，策立明睿，鎮服內外，無有邪謀，不可謂之非權臣，亦不可謂之非重臣也。遂乃釋肺腑之戚，玉譜聯名；席茅土之封，金枝入繼。斯不謂之千載之逢而非常之遇歟！

劉 六 符

劉六符，平州人也。年十五，究通經史，兼綜百家之言。長而喜功名，慷慨有大志。歷事聖宗朝，為著作郎、中允，又為詹事、國子祭酒。興宗時，為翰林學士、右諫議大夫、知制誥、同修國史。

契丹聚兵幽、薊，來求闡南，時宋慶曆二年也。

先是，西兵久不決，六符以宋朝為怯。又李士彬、劉平之兵屢敗，宋朝吓食，積苦兵間。因說其主聚兵幽、涿，聲言南征，而六符及蕭英先以書來求闡南十縣。其書，皆六符所撰也。書至宋朝，富弼為回謝使。弼至沒打河，六

符館之，謂弼曰：“北朝皇帝堅欲割地，如何？”弼曰：“北朝若欲割地，必志在敗盟，南朝决不從，有橫戈相待耳。”六符曰：“南朝若堅執，則事安得濟？”弼曰：“南朝不發兵，而遣使好辭，更議嫁女益幣，豈堅執乎？”六符引弼入見，往復辨議，興宗大感悟，乃從弼所請。

是年八月，宋朝再遣富弼賫國書、誓書至契丹清泉淀金甌館，許增以歲幣二十萬。時契丹固惜盟好，惟六符畫策揚聲聚兵幽、涿，以動宋朝。宋方困西夏之擾，名臣猛將，相繼敗衄，呂夷簡畏之。

契丹既得歲幣五十萬，勒碑紀功。擢六符樞密使、禮部侍郎、同修國史。後遷至中書政事令。子孫顯貴不絕，為節度、觀察者十數人。

論曰：臣於慶曆年間劉六符求關南一事，每為之三嘆焉。契丹之禍，始於石晉割幽、燕，而石晉卒有少帝之辱；蔓延於我朝，而我朝澶淵之好、慶曆之盟，極而至於宣和之戰，禍猶未歇也。何則？天下視燕為北門，失幽、薊則天下常不安。幽、燕視五關為喉襟，無五關則幽、薊不可守。晉割幽、薊，併五關而棄之，此石晉不得不敗，澶淵不得不盟，慶曆之邀脅亦不得不為慶曆也，至於宣和則極矣。六符之來，世以智計歸之，而孰知產禍之由，已有所自來哉！

①宗美，本齊國王隆裕之子。

契丹國志卷之十九

列 傳

馬 保 忠

馬保忠，營州人也。疏眉目豐下，謹重寡慾，斤斤自修，士人賢其行。自力讀書，不謁州縣，節用以給親里，大穰則賑其餘於鄉黨。太平年間，授洗馬，改著作郎、殿中丞。興宗朝為樞密使、尚父、守太師兼政事令，封燕國公。時朝政不綱，溺志浮屠，僧至有正拜三公、三師者，官爵非人，妄有除授。保忠嘗從容進諫，帝至佛然怒之，詳見《帝紀》。又嘗上言：“強天下者，儒道；弱天下者，吏道。今之授官，大率吏而不儒。崇儒道，則鄉黨之行修；修德行，則冠冕之緒崇。自今其有非聖帝明王孔、孟聖賢之教者，望下明詔，痛禁絕之。”其篤意風教如此。後數年，保忠卒，賜諡曰剛簡。

論曰：官不當，則人多覬覦；源不清，則下皆奔競。契丹自重熙之時，私謁肆行，除授無法，膜拜之徒，亦授以公

孤之官，其濫極矣。保忠雖空臆無諱，然言諄聽藐，未如之何哉！

張 琳

張琳，濟州人也。為人忠義，慷慨有大志。在道宗朝為秘書中允。天祚立，兩為戶部使，負東京人望。女真日熾，高永昌繼叛於渤海，時天慶六年也。

永昌叛，遼東五十餘州盡沒，獨濟州未下，琳痛念鄉粉，欲自討之。契丹屢敗，精兵銳卒十無一存。琳討永昌，搏手無策，始招所謂“轉戶軍”。蓋遼東渤海，乃夙所難；若其轉戶，則使從良，庶幾捐軀奮命。命下，得兵二萬餘。琳自顯州進兵，渤海止備遼河三叉口。琳遣羸卒數千，陽為來攻，問道以精騎渡河，直趨濟州，渤海始覺。經三十餘戰，渤海乃走保東京。其後女真援至，師自驚恐，望風而潰，死亡不可勝計。琳遁入遼州，謫授遼興軍節度使，乃平州也。

其後，授燕京副留守，與燕王淳同守燕。淳僭位改元，命琳守太師，十日一朝，平章軍國大事，實疏之也。琳竟鬱鬱而卒。

論曰：張琳丁時孔艱，則痛心於鄉國之危；遭家不造，則扼腕於燕王之立。女真之勢湯湯方割，揚灰注海，安得不淪？惜其愔愔問鼎之間，曾無死清君側之志。此姦人得以誑之，而大節不無少貶歟！

蕭 奉 先

蕭奉先，天祚后族也。嗣先、保先，皆其弟。奉先在道宗朝為內侍供奉，又為承旨，歷吏部尚書。緣恩宮掖，專尚諂諛，朋結中人，互為黨與。至天祚朝，毳獵聲色，日蠱其心，防微不早，女真始亂。奉先是為政事令、同平章事，又兼樞密使。

方混同江諸蕃大會之時，天祚已疑阿骨打，密謂奉先曰：“阿骨打意氣雄豪，顧視不常，當以事誅之，不然恐貽後患。”奉先曰：“阿骨打，小人何知，殺之傷向化心；設有異志，蕞爾小國，何能為？”天祚乃止。

天慶四年，阿骨打興師屠寧江州。次年，阿骨打又至。弟嗣先，以殿前都點檢，充東北路招討使，蕭撻勃也副之，未陣而潰。既而出河店之戰，嗣先又敗。詣闕待罪，但免官而已。由此士無鬪志，望風奔潰。保先，亦奉先弟也，為渤海留守、少師，政令嚴酷，亦以女真之亂，為高永昌所殺。渤海始亂。

天慶九年，女真攻陷上京，發掘陵寢，取其金銀珠玉，奉先皆抑而不奏。天祚問及陵寢事，奉先對以“初雖侵犯元宮，不敢毀壞陵寢。”其蒙蔽欺罔，類皆如此。又誣告耶律余覲欲立晉王。余覲叛，奉先曰：“余覲宗枝，非欲亡遼者，不過求立晉王耳。”天祚惑之，賜晉王死。聞者揮涕，衆心益離。奉先柄國垂二十年，以至國亡。天祚奔夾山，謂奉先曰：“誤我至此，皆汝之罪，宜亟去，不然恐汝及禍，并累我。”行未十里，左右執而殺之。

李 儼

李儼，本漢地人，天祚嬖臣也。少而狡桀，侷儻不羣，軒然夷倨，才濟其姦。與蕭奉先雅相厚善。初為內侍省給事，累遷至中書供奉，積官至南面宰相，封漆水郡王。

儼資狎性巧，善諛佞人，在天祚朝秉國樞柄凡十五年。女真連年之亂，儼與奉先蒙蔽為欺，以至於亡，天祚不悟也。儼嘗與知樞密院事牛溫有隙，各進所親厚，朋黨紛然，恃奉先為內主，溫不能勝。及儼死，奉先又薦其姪處溫為相，竟至亡國。惜也，儼不逮藁街之戮云。

耶律余覲

耶律余覲，一名余覲姑，國主族人。其妻，天祚文妃之妹也。

文妃生晉王，最賢，蕭奉先忌之，誣告余覲謀立晉王。余覲奔歸女真，女真以為西軍大監軍。久不遷，常鞅鞅有異志。其軍(下有)合董也，失其金牌，女真疑其與林牙暗合，遂質其妻子。余覲有叛心，明年九月，約燕京統軍反。統軍之兵皆契丹人，余覲謀誅西軍之在雲中者，盡約雲中、河東、河北、燕京郡守之契丹、漢兒，令誅女真之在官在軍者。天德知軍偽許之，遣其妻來告。時悟室為西監軍，自雲中來燕，微聞其事而未信，與通事漢兒那也回行數百里，那也見二騎馳甚，遽問之曰：“曾見監軍否？”以不識對。問為誰，曰“余覲下人”。那也追及悟室，曰：“適兩契丹云‘余覲下人’。既在西京，何故不識監軍？”^①恐有姦

謀”。遂回馬追獲之，搜其靴中，得余覲書曰：“事已泄，宜便下手。”復馳告悟室，即回燕。統軍來謁，縛而誅之。又二日至雲中，余覲微覺，父子以遊獵為名，遁入夏國。夏人問：“有兵幾何？”云：“親兵三二百。”遂不納。投韃韃，韃韃先受悟室之命，其首領詐出迎，具食帳中，潛以兵圍之。韃韃善射，無衣甲。余覲出敵不勝，父子皆死。凡預謀者悉誅，契丹之黠、漢兒之有聲者，皆不免。

大 實

大實林牙，林牙者，乃其官名，猶中國翰林學士；大實則小名也，北地間無姓者。

大實既降女真，與大酋粘罕為雙陸戲，爭道相忿，粘罕心欲殺之而口不言，大實懼。及既歸帳，即棄其妻，攜五子宵遁。詰旦，粘罕怪其日高不來，使召之，其妻曰：“昨夕以酒忤大人，^①畏罪而竄。”詢其所之，不以告。粘罕大怒，以配部落之最賤者。妻不肯屈，強之，極口嫚罵，遂射殺之。

大實深入沙子，立天祚之子梁王為帝而相之。女真遣故遼將余覲帥兵經略，屯田于合董城。城去上京三千里。大實游騎數十，出入軍前。余覲遣使打話，遂退。

沙子者，蓋不毛之地，皆平沙廣漠，風起揚塵，至不能辨色；或平地頃刻高數丈，絕無水泉，人多渴死。大實之走，凡三晝夜始得度，故女真不敢窮追。遼御馬數十萬，牧於磧外，女真以絕遠未之取，皆為大實所得。今梁王、大實皆亡，餘黨猶居其地。

論曰：亡契丹者，蕭奉先、李繼亡之也，非女真也。夫國之盛衰，視其柄國之臣何如耳。天祚荒淫，委政后族，惑於奉先、繼之欺蔽，阿骨打不當信而信之，晉王不當害而害之，夾山之禍，有自來矣。舉二百餘年之基業，一朝而覆之，姦諛之誤國，其明效大驗，至此極也，悲夫！

番將除授職名

漢官除授職名

高唐英	彰德節度使。	韓紹芳	同平章事。
劉晞 ^①	西京留守。	竇振	三司使。
崔廷勳	大同節度使。	韓紹昇	宣徽南院事。
耿崇美	昭義節度使。	耿元吉	戶部使。
高模翰	河陽節度使。	劉玄	兵部尚書、知上京留守。
蕭海真 ^②	幽州節度使。	劉四端	禮部尚書、參知政事、 簽書樞密院事
潘聿撻 ^③	橫海節度使。	張克忠	守同司徒兼侍中、知樞 密院事。
楊釋姑 ^④	忻州節度使。	韓紹雍	行宮都部署兼侍中。
留珪 ^⑤	義成節度使。		
楊克	武定節度使。		

①北人稱雲中為西京。 ②大音陀。 ③常為樞密平章事。

④兀欲妻弟。 ⑤兀欲姊婿。 ⑥契丹通事。 ⑦兀欲弟。

契丹國志卷之二十

晉 表

晉出帝降表

孫男臣重貴言：頃者，唐運告終，中原失馭，數窮否極，天缺地傾。先人有田一成，有衆一旅，兵連禍結，力屈勢孤。翁皇帝救患摧剛，興利除害，躬擐甲冑，深入寇場。犯露蒙霜，度鴈門之險；馳風擊電，行中冀之誅。黃鉞一麾，天下大定，勢凌宇宙，義感神明，功成不居，遂興晉祚，則翁皇帝有大造於石氏也。旋屬天降鞠凶，先君即世，臣遵承遺旨，纂紹前基。諒闇之初，荒迷失次，凡有軍國重事，皆委將相大臣。至於擅繼宗祧，既非稟命；輕發文字，輒敢抗尊。自啓釁端，果貽赫怒，禍至神感，運盡天亡。十萬師徒，望風束手；億兆黎庶，延頸歸心。臣負義包羞，貪生忍恥，自貽顛覆，上累祖宗，偷度朝昏，苟存視息。翁皇帝若惠顧疇昔，稍霽雷霆，未賜靈誅，不絕先祀，則百口荷更生之德，一門啣無報之恩，雖所願焉，非敢望也。臣

與太后、妻馮氏於郊野面縛俟命。

晉李后降表

晉室皇太后新婦李氏妾言：張彥澤、傅住兒等至，伏蒙皇帝阿翁降書安撫者。妾伏念先皇帝頃在并、汾，適逢屯難，危同累卵，急若倒懸，智勇俱窮，朝夕不保。皇帝阿翁發自冀北，親抵河東，跋履山川，踰越險阻。立平臣孽，遂定中原，救石氏之覆亡，立晉朝之社稷。不幸先帝厭代，嗣子承祧，不能繼好息民，而反虧恩辜義。兵戈屢動，駟馬難追，戚實自貽，咎將誰執！今穹昊震怒，中外攜離，上將牽羊，六師解甲。妾舉宗負轡，視景偷生，惶惑之中，撫問斯至。明宣恩旨，曲示含容，慰諭丁寧，神爽飛越。豈謂已垂之命，忽蒙更生之恩，省罪責躬，九死未報。今遣孫男延煦、延寶奉表請罪，陳謝以聞。

澶淵誓書

宋真宗誓書

維景德元年，歲次甲辰，十二月庚辰朔，七日丙戌，大宋皇帝謹致誓書于契丹皇帝闕下：共遵誠信，虔守歡盟，以風土之宜，助軍旅之費，每歲以絹二十萬匹，銀一十萬兩，更不差使臣專往北朝，只令三司差人搬送至雄州交割。沿邊州、軍，各守疆界，兩地人戶，不得交侵。或有盜賊逋逃，彼此無令停匿。至於墾畝稼穡，南北勿

縱搔擾。所有兩朝城池，並可依舊存守，洶濠完葺，一切如常，即不得創築城隍，開掘河道。誓書之外，各無所求。必務協同，庶存悠久。自此保安黎獻，謹守封陲，質于天地神祇，告于宗廟社稷，子孫共守，傳之無窮，有渝此盟，不克享國。昭昭天鑒，當共殛之。遠具披陳，專俟報復，不宣。

契丹聖宗誓書

維統和二十二年，歲次甲辰，十二月庚辰朔，十二日辛卯，大契丹皇帝謹致書于大宋皇帝闕下：共議戢兵，復諭通好，兼承惠顧，特示誓書：“以風土之宜，助軍旅之費，每歲以絹二十萬匹、銀一十萬兩，更不差使臣專往北朝，只令三司差人搬送至雄州交割。沿邊州、軍，各守疆界，兩地人戶，不得交侵。或有盜賊逋逃，彼此無令停匿。至於墾畝稼穡，南北勿縱搔擾。所有兩朝城池，並可依舊存守，洶濠完葺，一切如常，即不得創築城隍，開掘河道。誓書之外，各無所求，必務協同，庶存悠久。自此保安黎獻，謹守封陲，質于天地神祇，告于宗廟社稷，子孫共守，傳之無窮，有渝此盟，不克享國。昭昭天鑒，當共殛之。”某雖不才，敢遵此約，謹告于天地，誓之子孫，苟渝此盟，神明是殛。專具諮述，不宣。

關南誓書

契丹致宋書

維契丹重熙十年，歲次壬午，二月，弟大契丹皇帝謹致書于兄大宋皇帝闕下：粵自世修歡契，時遣使輶，封圻殊兩國之名，方冊紀一家之美。蓋欲洽於綿遠，固將有以披陳。切緣瓦橋關南，是石晉所割，迄至柴氏，以代郭周，興一時之狂謀，掠十縣之故壤，人神共怒，廟社不延。至於貴國祖先，肇創基業，尋與敝境，繼為善鄰。暨乎太宗紹登寶位，於有征之地，才定并、汾；以無名之師，直抵燕、薊。羽石精銳，禦而獲退，遂致移鎮，〔富〕國強兵〔富〕。南、北王府并內外諸軍，彌年有戍境之勞，繼日備渝盟之事，始終反覆，前後諳詳。嘗切審專命將臣，往平河右，炎涼屢易，勝負未聞。兼李元昊於北朝久已稱藩，累曾尚主，克保君臣之道，實為甥舅之親，設罪合致討，亦宜垂報。邇者郭積待至，杜防又回，雖具音題，而但虞詐謀，已舉殘民之伐，曾無忌器之嫌。營築長堤，填塞隘路，開決塘水，添置邊軍，既潛稔於猜嫌，慮難敦於信睦。倘或思久好，共遣疑懷，曷若以晉陽舊附之區，關南元割之縣，俱歸當國，用康黎人。如此，則益深兄弟之懷，長守子孫之計。緬維英晤，深達惘悰，適屆春陽，善緩沖裕。

宋回契丹書

維慶曆二年，歲次壬午，四月，大宋皇帝謹致書于契丹皇帝闕下：昔我烈考章聖皇帝保有基圖，惠養黎庶，與大契丹昭聖皇帝弭兵講好，通聘著盟。肆余纂承，共遵謨訓，邊民安堵垂四十年。茲者專致使臣，特貽緘問，且以瓦橋舊地，晉陽故封，援石氏之割城，述周朝之復境，係于異代，安及本朝？粵自景德之初，始敦鄰寶之信，凡諸細故，咸不實懷。況太宗皇帝親駕并郊，匪圖燕壤，當時貴國亟發援兵，既交石嶺之鋒，遂舉薊門之役，義非反覆，理有因緣。元昊賜姓稱藩，稟朝受祿，忽謀狂僭，假擾邊陲，屢議討除，已嘗聞達。杜防、郭積傳導備詳，及此西征，豈云無報？聘輶旁午，屢聞嫉惡之談；慶問交馳，未諭聯親之故。忽窺異論，良用惘然，謂將軫於在原，反致譏於忌器。復云營築堤埭，開決陂塘，昨緣霖潦之餘，失為愆溢之患，既非疏導，當稍繕防，豈蘊猜嫌，以虧信睦。至於備塞隘路，閱(省)[集]兵夫，蓋邊臣謹職之常，乃鄉兵充籍之舊，在於貴境，寧撤戍兵？一皆示以坦夷，兩何形於疑阻？顧惟歡契，方保悠長，遽興請地之言，殊匪載書之約，信辭至悉，靈鑒孔昭。兩地不得相侵，緣邊各守疆界，誓書之外，一無所求，期在久要，弗違先志。諒惟聰達，應切感思，甫屬清和，妙臻戢殺。

契丹回宋誓書

維重熙十一年，歲次(癸未)[壬午]，八月壬申朔，二

十九日庚子，弟大契丹皇帝謹致書于兄大宋皇帝闕下；來書云，謹按景德元年十二月七日章聖皇帝與昭聖皇帝誓曰：“共遵誠信，虔守歡盟，以風土之儀物，備軍旅之費用，每歲以絹二十萬匹，銀一十萬兩，更不差使臣專往北朝，只令三司差人搬送至雄州交割。沿邊州、軍，各守疆界；兩地人戶，不得交侵。或有盜賊逃遁，彼此勿令停匿，至於墾畝稼穡，南北勿縱搔擾。所有兩朝城池，并各依舊存守，修壕葺塞，一切如常，即不得創築城隍，開決河道。誓書之外，一無所求，各務協心，庶同悠久。自此保安黎庶，謹守封疆，質于天地神祇，告于宗廟社稷，子孫共守，傳之無窮，有渝此盟，不克享祀，昭昭天鑒，共當殛之。”昭聖皇帝復答云：“孤雖不才，敢遵此約，謹當告于天地，誓之子孫。神明具知。”嗚呼，此盟可改，後嗣何述！切以兩朝修睦，三紀于此，邊鄙用寧，干戈載偃，追懷先約，炳若日月。今綿纊已深，敦好如故，關南縣邑，本朝傳守，懼難依從，別納金幣之儀，用代賦稅之物，每年增絹一十萬匹，銀一十萬兩，搬至雄州白溝交割。兩界澹淀，已前開畝者，並依舊例，自今已後，不得添展，其堤堰水口，逐時決洩壅塞，量差兵夫，取便修葺疏導，非時霖潦，別至大段漲溢，並不在關報之限。南朝河北沿邊〔州、軍〕，北朝自古北口以南沿邊軍民，除見管數目，依常教閱，無故不得大段添〔進〕〔屯〕兵馬。如有事故添屯，即令逐州、軍移牒關報，兩界所屬之處，其自來乘例更替，及本路移易，並不在關報之限。兩界逃走作過諸色人，並依先朝誓書

外，更不得似目前停留容縱。恭惟二聖威靈在天，顧茲纂承，各當遵奉，共循大體，無介小嫌。且夫守約為信，善鄰為義，二者缺一，罔以守國。皇天厚地，實聞此盟，文藏宗廟，副在有司，餘並依景德、統和兩朝誓書。顧惟不德，必敦大信，苟有食言，必如前誓。

議割地界書

契丹道宗遣泛使林牙興復軍節度使蕭禧如宋，言代北對境有侵地，請遣使同分畫。其後宋割棄地五百里，以分水嶺為界，時宋神宗熙寧七年也。

契丹求地界書

維咸雍十年，歲次甲寅，三月，大遼皇帝謹致書于大宋皇帝闕下：切以累朝而下，講好以來，互守成規，務敦夙契。雖境分二國，克保於驩和；而義若一家，共思於悠永。事如問於遼越，理須至於敷陳。其蔚、應、朔三州土田，一帶疆土，祇自早歲曾遣使人止於舊封，俾安鋪舍，庶南北永標於定限，往來悉絕於姦徒，泊覽舉申，輒有侵擾於全屬，當朝地分，（或）營修戍壘，或存止居舍，皆是守邊之冗員，不顧睦鄰之大體，妄圖功賞，深越封陲。今屬省巡，遂令按視，備究端實，諒難寢停。至縷細之緣由，分白之事理，已具聞達，盡令折移，既未見從，故宜伸報。據侵入當界事理，所起鋪墩之處，各差官員，同共檢照，早令毀撤。却於久來元定地界再安置外，其餘邊境更有生創事端，委差去使臣到日，一就理會。

如此則豈惟疆場之內，不見侵踰；兼於信誓之間，且無違爽。茲實穩便，願俟准依。

宋回契丹書

維熙寧七年，歲次甲寅，三月，大宋皇帝謹致書於大遼皇帝闕下：辱迂使指，來貺函封，歷陳二國之和，有若一家之義，固知鄰寶，深執信符。獨論邊鄙之臣，嘗越封陲之守，欲令移徙，以復舊常。切惟兩朝撫有萬宇，豈重尺土之利，而輕累世之歡。況經界之間，勢形可指；方州之內，圖籍俱存。當遣官司，各加覆視。倘事由夙昔，固難徇從；(或)誠有侵踰，何吝改正？而又每戒疆吏，令遵誓言，所諭創生之事端，亦皆境堠之細故，已令還使，具達本因。細料英聰，洞垂照悉。

契丹國志卷之二十一

南北朝饋獻禮物

契丹賀宋朝生日禮物

宋朝皇帝生日，北朝所獻：刻絲花羅御樣透背御衣七襲或五襲，七件紫青貂鼠翻披或銀鼠鵝項鴨頭納子，塗金銀裝鑲金龍水晶帶，銀匣副之，錦緣帛鞞皮靴，金玦（京）〔東〕皂白熟皮靴鞋，細錦透背清平內製御樣、合線摺機綾共三百匹，塗金銀龍鳳鞍勒、紅羅厓金線繡方鞞二具，白楮皮黑銀鞍勒、氈鞞二具，綠褐楮皮鞍勒、海豹皮鞞〔二具〕，白楮皮裹筋鞭一條，紅羅金銀線繡雲龍紅錦器仗一副，黃樺皮纏楮皮弓一，紅錦袋皂雕翎獐角飽頭箭十，〔青黃鸞翎箭十八，〕法漬法麴麵麴酒二十壺，蜜〔曬〕山菓十束檣椀，蜜漬山菓十束檣，疋列山梨柿四束檣，榛栗、松子、郁李、黑郁李子、菓棗、楞梨、堂梨二十箱，菓杭糜梨杪十椀，蕪荑白鹽十椀，青鹽十椀，牛、羊、野豬、魚、鹿腊二十二箱，御馬六匹，散馬二百匹。

正旦，御衣三襲，鞍勒馬二匹，散馬一百匹。國母又致御衣綴珠貂裘、細錦刻絲透背、合線御綾羅綺紗縠御樣，果實、雜粍、腊肉凡百品，水晶鞍勒，新羅酒，青〔白〕鹽。國主或致戎器寶鐵刀，鸞禽曰海東青之類。

承天節，又遣庖人持本國異味，前一日就禁中造食以進御云。

宋朝賀契丹生辰禮物

契丹帝生日，南宋遣金酒食茶器三十七件，衣五襲，金玉帶二條，烏皮、白皮靴二〔量〕〔緇〕，紅牙笙笛，齋栗，拍板，鞍勒馬二匹，纓複鞭副之，金花銀器三十件，銀器二十件，錦綺透背、雜色羅紗綾縠絹二千匹，雜綵二千匹，法酒三十壺，的乳茶十斤，岳籠茶五斤，鹽蜜菓三十罐，乾菓三十籠。其國母生日，約此數焉。

正旦，則遣以金花銀器、白銀器各三十件，雜色羅紗綾縠絹二千匹，雜綵二千匹。

宋朝勞契丹人使物件

契丹每歲國使人南宋境，宋遣常參官、內職各一人，假少卿、監、諸司使以上接伴。內諸司供帳，分為三番，內臣主之。至白溝驛賜設，至貝州賜茶、藥各一銀合，至大名府又賜設，及畿境，遣開封府判官勞之，又命臺省官、諸司使館伴逐於班荆館，至都亭驛各賜金花、銀灌器、錦衾褥。朝見日，賜大使金塗銀冠、皂羅氈冠、衣八件、金鞞鞢帶、烏皮靴、銀器二百兩、綵帛二百匹；副使皂紗折上巾、

衣七件、金帶、象笏、烏皮靴、銀器一百兩、綵帛二百匹、鞍勒馬各一匹。其從人，上節十八人，各練鵲錦襖〔及〕衣四件、銀器二十兩、綵帛三十四；中節二十人，各寶照錦襖及衣三件、銀器十兩、綵帛二十四；下節八十五人，各紫綺襖〔及〕衣四件、銀器十兩、綵帛二十四，並加金塗銀帶。上節、中節又加絲鞋。就館，賜生餼，大使稭、粟各十石，麵二十石，羊五十、法酒、糯米酒各十壺，副使稭、粟各七石，麵十五石、羊三十、法酒、糯米酒各十壺。

承天節各別賜衣一襲。

遇立春，各賜金塗銀鍍幡勝、春盤。又命節帥就玉津園伴射弓，賜來使銀飾箭筒、弓一、箭二十；其中的，又賜窄袍、衣五件，金束帶、鞍勒馬。

在館遇節序，則遣臣賜設。

辭日，長春殿賜酒五行，賜大使盤裘暈錦窄袍及衣六件、銀器二百兩、綵帛一百匹。副使紫花羅窄袍及衣六件、銀器一百兩、綵帛一百匹，並加金束帶、雜色羅、錦、綾、絹百匹。從人各加紫綾花纒錦袍及銀器、綵帛。

將發，又賜銀瓶、合盆、紗羅等。又令近臣餞于班荆館，開封府推官餞于郊外，接伴大使、副使復為送伴，緣路累賜設。

外國貢進禮物

新羅國貢進物件

金器二百兩 金抱肚一條五十兩 金鈔鑲五十兩
金鞍轡馬一匹五十兩 紫花綿紬一百匹 白綿紬五百匹
細布一千匹 麗布五千匹 銅器一千斤 法清酒醋共
一百瓶 腦元茶十斤 藤造器物五十事 成形人參不定
數 無灰木刀攏十箇 細紙墨不定數目

本國不論年歲，惟以八節貢獻，人使各帶正官，惟稱陪臣。

橫進物件

梗米五百石 糯米五百石 織成五彩御衣金不定數

契丹回賜物件

犀玉腰帶二條 細衣二襲 金塗鞍轡馬二匹 素鞍
轡馬五匹 散馬二十四 弓箭器仗二副 細綿綺羅綾二
百匹 衣著絹一千匹 羊二百口 酒菓子不定數

並命刺史已上官充使，一行六十人，直送入本國。

契丹賜奉使物件

金塗銀帶二條 衣二襲 錦綺三十疋 色絹一百匹

鞍轡馬二匹 散馬五四 弓箭器〔仗〕一副 酒菓不定數

上節從人 白銀帶一條 衣一襲 絹二十四 馬一匹

下節從人 衣一襲 絹十四 紫綾大衫一領

西夏國貢進物件

細馬二十四 麓馬二百匹 駝一百頭 錦綺三百匹
織成錦被褥五合 菴容、砮石、井鹽各一千斤 沙狐皮
一千張 兔鶻五隻 犬子十隻

本國不論年歲，惟以八節貢獻。

契丹回賜除羊外，餘並與新羅國同，惟玉帶改為金帶，勞賜人使亦同。

諸小國貢進禮物

高昌國 龜茲國 于闐國 大食國 小食國 甘州
沙州 涼州

已上諸國三年一次遣使，約四百餘人，至契丹貢獻。

玉 珠 犀 乳香 琥珀 瑪瑙器 寶鐵兵器 斜
合黑皮 褐黑絲 門得絲 怕里呵 礪砂 褐里絲

已上皆細毛織成，以二丈為匹。

契丹回賜，至少亦不下四十萬貫。

契丹國志卷之二十二

州縣載記

契丹自太祖、太宗初興，戰爭四十餘年，吞併諸番，割據燕、雲，南北開疆五千里，東西四千里，共二百餘州。

建五京五處

燕京三司 西京轉運 中京度支 上京鹽鐵 東京
戶部錢鐵司

大藩府六處

南大王府 北大王府 乙室王府 黃龍府 興中府
奚王府

錢帛司三處

(平)(長)春路 遼西路 平州

節鎮三十三處

奉聖州 雲內州 長春州 龍化州 海北州 貴德
府 蔚州 應州 朔州 (綿)[錦]州 乾州 顯州 靈
州 遼州 咸州 瀋州 (薊)[蘇]州 復州 慶州 祖
州 川州 成州 萊州 懿州 宜州 坤州 平州 辰
州 興州 同州 信州 饒州 建州

建觀察防禦團練使八處

武安州 永州 秦州 高州 利州 寧江州 歸州
廣州

刺史州七十餘處

德州 黔州 潭州 惠州 榆州 營州 灤州 勝
州 溫州 巖州 歸化州 榆州 松州 恩州 山州
武德州 通州 韓州 烏州 靖州 寧邊州 賓州 祥
州 新州 衛州 降聖州 燕州 海州 涿州 銀州
遼西州 鐵州 開州 保州 薊州 北安州 岳州 嘉
州 集州 連州 弘東州 濱州 肅州 威州 古州
仙澗州 文州 蘭州 慎州 拱州 安州 渝州 河州
雙州 宋州 涿州 易州 檀州 順州 薊州 雍州
東州 海州 [東]勝州 景州 許州 招州 康州
錦州 來州 儒州 雲州 平州

遼東邊遠不記州十餘縣二百餘外見記五處

金肅 河清 曷童 五花 振武

諸藩臣投下州二十三處

徽州 濠州 驩州 衛州 荊州 閩州 隨州 和
州 澄州 全州 義州 遂昌州 豫州 員州 福州
榮州 唐州 粟州 黑州 河州 茂州 龍州 宗州

控制諸國

沙漠〔府〕控制沙漠之北

置西〔北〕路都招討府、奧隗部族衛、驢駒河統軍司、
倒撻嶺衛，鎮撫韃靼、蒙骨、迪烈諸軍。

雲中路控制夏國

置西南面都招討府、西京兵馬都部署司、金肅、河清
軍、五花城、南北大王府、乙室王府、山金司。

燕山路備禦南宋

置燕京都總管府、節制馬步軍控鶴指揮使、都統軍
司、牛欄監軍寨、石門詳穩司、南北皮室司、猛拽刺司，並
隸總管府。

中、上京路控制奚境

置諸軍都虞候司、奚王府大詳穩司、大國舅司、大常袞司、五院司、六院司、沓溫司。

遼東路控扼高麗

置東京兵馬都部署司、契丹、奚、漢、渤海四軍都指揮使、保州統軍司、(陽)[湯]河詳穩司、金吾營、(窋杓)[杓窋]司。

長春路鎮撫女真、室韋

置黃龍府兵馬都部署[司]、咸州兵馬詳穩司、東北路都統軍司。

論曰：契丹之興，其盛如此，其亡也忽焉，惜哉！

四至鄰國地理遠近

東南至新羅國。西以鴨綠江東八里黃土嶺為界，至保州一十一里。

次東南至五節度熟女真部族。共一萬餘戶，皆雜處山林，尤精弋獵。有屋舍，居舍門皆於山牆下闢之。耕鑿與渤海人同，無出租賦，或遇北主征伐，各量戶下差充兵馬，兵回，各逐便歸本處。所產人參、白附子、天南星、茯苓、松子、猪苓、白布等物。並係契丹樞密院所管，差契丹或渤海人充節度管押。其地南北七百餘里，東西四百餘

里，西北至東京五百餘里。

又次東南至熟女真國。不屬契丹所管。其地東西八百餘里，南北一千餘里。居民皆雜處山林，耕養屋宇，與熟女真五節度同。然無君長首領統押，精於騎射，今古以來，無有盜賊詞訟之事，任意遷徙，多者百家，少者三兩家而已。不與契丹爭戰，或居民等自意相率齎以金、帛、布、黃蠟、天南星、人參、白附子、松子、蜜等諸物，入貢北番；或只於邊上買賣，訖，却歸本國。契丹國商賈人等就入其國買賣，亦無所礙，契丹亦不以為防備。西至東京二百餘里。

東北至生女真國。西南至熟女真國界，東至新羅國，東北不如其極。居民屋宇、耕養、言語、衣裝與熟女真國並同，亦無君長所管。精於騎射，前後屢與契丹為邊患，契丹亦設防備。南北二千餘里，沿邊創築城堡，搬運糧草，差撥兵甲，屯守征討，三十年來，深為患耳。南界西南至東京六百里。

又東北至屋惹國、阿里〔眉〕國、破骨魯國等國。每國各一萬餘戶。西南至生女真國界。衣裝、耕種、屋宇、言語與女真人異。契丹樞密院差契丹或渤海人充逐國節度使管押，然不出征賦兵馬，每年惟貢進大馬、蛤珠、青鼠皮、貂鼠皮、膠魚皮、蜜蠟之物，及與北番人任便往來買賣。西至上京四千餘里。

正東北至鐵離國。南至阿里眉等國界。居民言語、衣裝、屋宇、耕養稍通阿里〔眉〕等國，無君長，皆雜處山林。不屬契丹統押，亦不與契丹爭戰，復不貢進，惟以大

馬、蛤珠、鷹鶴、青鼠、貂鼠等皮、膠魚皮等物與契丹交易。西南至上京五千餘里。

次東北至靺鞨國。東北與鐵離國為界，無君長統押，微有耕種。春夏居屋室中，秋冬則穿地為洞，深可數丈而居之，以避其寒。不貢進契丹，亦不爭戰，惟以細鷹鶴、鹿、細白布、青鼠皮、銀鼠皮、大馬、膠魚皮等與契丹交易。西南至上京五千里。

又次北至鐵離、喜失牽國。言語、衣裝、屋舍與靺鞨稍同。無君長管押，不貢進契丹，亦不爭戰，惟以羊、馬、牛、駝、皮、毛之物與契丹交易。西南至上京四千餘里。

正北至蒙古里國。無君長所管，亦無耕種，以弋獵為業，不常其居，每四季出行，惟逐水草，所食惟肉酪而已。不與契丹爭戰，惟以牛、羊、駝、馬、皮、毳之物與契丹為交易。南至上京四千餘里。

又次北至于厥國。無君長首領管押，凡事並與蒙古里國同。甲寅歲，曾率衆入契丹國界為盜，聖宗命駙馬都尉蕭徒欲統兵，大破其國。邇後，更不復為盜，惟以牛、羊、駝、馬、皮、毳之物與契丹為交易。東南至上京五千餘里。

又次北西至鼈古里國。又西北，又次北近西至達打國。各無君長，每部族多者三二百家，少者五七十家，以部族內最富豪者為首領。不常厥居，逐水草，以弋獵為業。其婦人皆精於騎射。常與契丹爭戰，前後契丹屢為國人所敗，契丹主命親近為西北路兵馬都統，率番部兵馬十餘萬防討，亦制禦不下。自契丹建國已來，惟此二國為

害，無奈何，番兵困之。契丹嘗為所攻，如暫安靜，以牛、羊、駝、馬、皮、毳為交易，不過半年，又却為盜。東南至上京六千餘里。

西近北至生吐蕃國，又西至党項、突厥等國。皆不為契丹國害，亦不進貢往來，蓋以熟土渾、突厥、党項等部族所隔。東南至雲州三千里。

正西與吳賊以黃河為界。

西南至麟州、府州界。

又次南近西定州北平山為界。

又南至薊州城北界河。

又次南至遂城北鮑河為界。

又南近東至滄州北海。

又南至安肅軍自澗河為界。

又南近東至登州北海。

又南至雄州北拒馬河為界。

又南至海。

四京本末

上京 太宗建

上京臨潢府，乃大部落之地。離來州數十里即行海岸，俯挹滄溟，與天同碧，窮極目力，不知所際。有訥都烏河。番語山為“胡都”，水為“烏”。其東北三十里，即長泊也。涉沙磧過白馬淀，渡土河，亦云撞撞水，聚沙成墩，少

人煙，多林木，其河邊平處，國主曾於此處過冬。又至木葉山三十里許，有居人瓦屋及僧舍。

中京 承天太后建

中京之地，奚國王牙帳所居。奚本曰庫莫奚，其先東部胡宇文之別種也。窟居松漠之間，俗甚不潔，而善射獵，好為寇抄。其後種類漸多，分為五部：一曰辱紇，二曰莫賀弗，三曰契个，四曰木昆，五曰室得。每部一千餘人，為其帥，隨逐水草。中京東過小河，唱叫山道北奚王避暑莊，有亭臺。自古北口至中京北，皆奚境。奚本與契丹等，後為契丹所併。所在分奚、契丹、漢人、渤海雜處之。奚有六節度、都省統領。言語、風俗與契丹不同。善耕種，步射，入山採獵，其行如飛。《契丹圖志》云：奚地居上、東、燕三京之中，土肥人曠，西臨馬盃山六十里，其山南北一千里，東西八百里，連亘燕京西山，遂以其地建城，號曰中京。

南京 太宗建

南京本幽州地，乃古冀州之域。舜以冀州南北廣遠，分置幽州，以其地在北方。幽，陰也。東有朝鮮、遼東，北有樓煩、白檀，西有雲中、九原，南有滹沱、易水。唐置范陽節度，臨制奚、契丹。自晉割棄，建為南京，又為燕京析津府，戶口三十萬。大內壯麗，城北有市，陸海百貨，聚于其中；僧居佛寺，冠于北方。錦繡組綺，精絕天下，膏腴蔬蕘、果實、稻粱之類，靡不畢出，而桑、柘、麻、麥、羊、豕、

雉、兔，不問可知。水甘土厚，人多技藝，秀者學讀書，次則習騎射，耐勞苦。石晉未割棄已前，其中番漢雜鬪，勝負不相當；既築城後，遠望數十里間，宛然如帶，回環繚繞，形勢雄傑，真用武之國也。

東京 太宗建

東京，本渤海王所都之地。在唐時，為黑水、靺鞨二種依附高麗者。黑水部與高麗接，勝兵數千，多驍武，古肅慎氏地也，與靺鞨相鄰，東夷中為強國。所居多依山水，地卑隰，築土如堤，鑿穴以居。其國西北與契丹接。太祖之興，始擊之，立其子東丹王鎮其地，後曰東京。

契丹國志卷之二十三

族姓原始

契丹部族，本無姓氏，惟各以所居地名呼之，婚嫁不拘地里。至阿保機變家為國之後，始以王族號為“橫帳”，仍以所居之地名曰世里著姓。世里者，上京東二百里地名也。^①復賜后族姓蕭氏。番法，王族惟與后族通婚，更不限以尊卑；其王族、后族二部落之家，若不奉北主之命，皆不得與諸部族之人通婚；或諸部族彼此相婚嫁，不拘此限。^②故北番惟耶律、蕭氏二姓也。

國土風俗

契丹國在庫莫奚東，唐所謂黑水靺鞨者，今其地也。有七十二部落，不相統制，好為寇盜。父母死而悲哭者，以為不壯，但以其屍置於山樹上，經三年後，乃收其骨而焚之。因酌酒而祝曰：“冬月時，向陽食；〔夏月時，向陰

食)；我若射獵時，使我多得豬鹿。”其無禮頑嚙，於諸夷最甚。其風俗與奚、靺鞨頗同。至阿保機，稍并服諸小國，而多用漢人。漢人教之以隸書之半增損之，作文字數千，以代刻木之約。又制婚嫁，置官號，稱皇帝。漢時為匈奴所破，保鮮卑山。魏青龍中，部酋為王雄所殺，衆遂〔潛〕逃潢水之南，黃龍之北。至元魏，自號曰契丹。在唐開元、天寶間，使朝獻者無慮二十。故事：以范陽節度為押奚、契丹使，至唐末，契丹始盛。

併合部落

初契丹有八部，族之大者曰大賀氏。後〔分為八部，部之〕〔更八部名，各立〕長號“大人”，而常推一人為王，建旗鼓，以統八部。每三年則以次相代，或其部有災疾而畜牧衰，則八部聚議，以旗鼓立其次而代之。被代者以為元約如此，不敢爭。及阿保機，乃曰“中國之主無代立者”。由是阿保機益以威制諸國，不肯代。其立九年，諸部共責誚之。阿保機不得已，傳其旗鼓，而謂諸部曰：“吾立九年，所得漢人多矣。吾欲別自為一部以治漢城，可乎？”諸部將許之。漢城在炭山東南灤河上，有鹽鐵之利，乃後魏滑鹽縣也。其地可植五穀，阿保機率漢人耕種，為治城郭邑屋廛市如幽州制，漢人安之，不復思歸。阿保機知衆可用，用其妻述律策，使人告諸部大人曰：“我有鹽池之利，諸部所食。然諸部知食鹽之利，而不知鹽有主人，可乎？當來犒我”。諸部以為然，共以牛酒會鹽池。阿保機伏兵

其旁，酒酣伏發，盡殺諸部大人，復併為一國，東北諸夷皆畏服之。

兵馬制度

晉末，契丹主投下兵，謂之“大帳”，有皮室兵約三萬人騎，皆精甲也，為其爪牙。國母述律氏投下，謂之“屬珊”，有衆二萬。是先，戎主阿保機牙將半已老矣，每南來時，量分借得三五千騎，述律常留數百兵，為部族根本。其諸大首領太子偉王、永康、南北王、于越、麻荅、五押等，大者千餘騎，次者數百人，皆私甲也。別族則有奚、靺，勝兵亦千餘，人少馬多。又有渤海首領大舍利高模翰兵，步騎萬餘人，并髡髮左衽，竊為契丹之飾。復有近界韃靼、于厥里、室韋、女真、党項，亦被脅屬，每部不過千餘騎。其三部落吐渾、沙陀，泊幽州管內雁門以北十餘軍、州部落漢兵，合三萬餘衆，此是石晉割路契丹之地。番漢諸族，其數可見矣。每契丹南侵，其衆不啻十萬。國主人界之時，步騎車帳不從阡陌，東西一槩而行。大帳前及東西面，差大首領三人，各率萬騎，支散游奕，百十里外，交相規邏，謂之“欄子馬”。戎主吹角為號，衆即頓舍，環遶穹廬，以近及遠。折木稍屈之，為弓子鋪，不設槍營塹柵之備。每軍行，聽鼓三伐，不問昏晝，一(布)[匝]便行。未逢大敵，不乘戰馬，俟近敵師，即競乘之所，以新羈戰馬，蹄有餘力。其用軍之術，成列而不戰，俟退而乘之，多伏兵，斷糧道，冒夜舉火，上風曳柴，饋餉自贖，退敗無恥，散

而復聚，寒而益堅，此其所長也。

建官制度

賤他姓，貴耶律、蕭氏二姓。其官有契丹樞密院及行宮都總管司，謂之北面，以其在牙帳之北，以主蕃事；又有漢人樞密院、中書省、行宮都總管司，謂之南面，以其在牙帳之南，以主漢事。其惕隱，宗正寺也。夷離畢，參知政事也。林牙，翰林學士也。夷離巾，刺史也。內外官多做中國者。其下佐史，則有敝史、木古思奴古、都奴古、徒奴古。分領兵馬，則有統軍、侍衛、控鶴司，南王、北王、奚王府五帳分、提失哥東西都省太師兵。又有國舅、鈐轄、遙箠、常袞諸司，南北皮室、二十部族節度，頻必里、九克、漢人、渤海、女真五節度，五冶大師一百、六百、九百家奚。凡民年十五以上，五十以下，皆籍為兵。將舉兵，必殺灰牛、白馬，祀天地及木葉山神。鑄金魚符，調發兵馬。其捉馬及傳命，有銀牌二百。軍所舍，有遠探欄子馬，以夜聽人馬之聲。每其主立，聚所得人戶、馬牛、金帛及其下所獻生口，或犯罪沒入者，別為行宮領之，建州縣，置官屬。既死，則設大穹廬，鑄金為像，朔、望、節、辰、忌日輒致祭，築臺高丈餘，以盆焚酒食，謂之“燒飯”。

宮室制度

十宮各有民戶，出兵馬，阿保機曰洪義宮，德光曰永

興宮，兀欲曰積慶宮，述律曰延昌宮，明記曰章敏宮，突欲曰長寧宮，燕燕曰崇德宮，隆緒曰興聖宮，隆慶曰敦睦宮，隆運曰文忠王府。又有四樓，在上京者曰西樓，木葉山曰南樓，龍化州曰東樓，唐州曰北樓。凡受冊，積柴升其上，大會蕃夷其下，已，乃燔柴告天，而漢人不得預。有譚子部百人，夜以五十人番直，四鼓將盡，歌於帳前，號曰“聒帳”。每謁木葉山，即射柳枝，譚子唱番歌前導，彈胡琴和之，已事而罷。

衣服制度

國母與蕃官〔皆〕胡服，國主與漢官則漢服。蕃官戴鹿冠，上以金華為飾，或以珠玉翠毛，蓋漢、魏時遼人步搖冠之遺象也。額後垂金花織成夾帶，中貯髮一總。服紫窄袍，加義欄，繫粘鞮帶，以黃紅色縑裹革為之，用金、玉、水晶、碧石綴飾。又有紗冠，制如烏紗帽，無簷，不襯雙耳，額前綴金花，上結紫帶，帶末綴珠。或紫皂幅巾，紫窄袍，束帶。（丈）〔大〕夫或綠巾，綠花窄袍，中單多紅綠色。貴者被貂裘，貂以紫黑色為貴，青色為次，又有銀鼠，尤潔白；賤者被貂毛、羊、鼠、沙狐裘。弓以皮為弦，箭削樺為幹，韃勒輕快，便於馳走。以貂鼠或鵝項、鴨頭為扞腰。宋真宗景德中，太常博士王曙、戶部員外郎李維往賀國主生辰，還，言國主見漢使疆服衣冠，事已，即幅巾雜蕃騎出射獵矣。

漁獵時候

每歲正月上旬，出行射獵，凡六十日。然後並撻魯河鑿冰釣魚，冰泮，即縱鷹鵠以捕鵝雁。夏居炭山，或上陁避暑。七月上旬，復入山射鹿，夜半，令獵人吹角效鹿鳴，既集而射之。宋真宗時，晁迥往賀生辰，還，言始至長泊，泊多野鵝、鴨，國主射獵，領帳下騎，擊扁鼓遶泊，驚鵝、鴨飛起，乃縱海東青擊之，或親射焉。國主皆佩金玉錐，號殺鵝殺鴨錐。每初獲，即拔毛插之，以鼓為坐，遂縱飲，最以此為樂。又好以銅及石為槌，以擊兔。每秋則衣褐裘，呼鹿射之。夏月以布易氈帳，籍草圍棋、雙陸，或深澗張鷹。

試士科制

太祖龍興朔漠之區，倥傯干戈，未有科目。數世後，承平日久，始有開闢。制限以三歲，有鄉、府、省三試之設。鄉中曰鄉薦，府中曰府解，省中曰及第。時有秀才未願起者，州縣必根刷遣之。程文分兩科，曰詩賦，曰經義，魁各分焉。三歲一試進士，貢院以二寸紙書及第者姓名給之，號“喜帖”。明日舉按而出，樂作，及門，擊鼓十二面，以法雷震。殿試，臨期取旨，又將〔第〕一人特贈一官，授奉直大夫、翰林應奉文字。第二人、第三人止授從事郎，餘並授從事郎。聖宗時，止以詞賦、法律取士，詞賦為

正科，法律為雜科。若夫任子之令，不论文武並奏，應亦有員數。

①今有世里没里，以漢語譯之，謂之耶律氏。 ②漢人等亦同此。

契丹國志卷之二十四

王沂公行程錄

初，奉使者止達幽州，後至中京，又至上京，或西涼淀、北安州、炭山、長泊。

自雄州白溝驛度河，四十里至新城縣，古督亢亭之地。又〔七〕十里至涿州。北度涿水、范水、劉李河，六十里至良鄉縣。度盧溝河，六十里至幽州，號燕京。子城就羅郭西南為之，正南曰啓夏門，內有元和殿、洪政殿，東門曰宣和。城中坊閭皆有樓。有閔忠寺，本唐太宗為征遼陣亡將士所造；又有開泰寺，魏王耶律漢寧造，皆邀朝士遊觀。城南門外有于越王廨，為宴集之所。門外永平館，舊名礪石館，請和後易之。南即桑乾河。

出北門，過古長城、延芳淀，四十里至孫侯館，改為望京館，稍移故處。望楮谷山、五龍池，過溫餘河，大夏坡，坡西北即涼淀避暑之地。五十里至順州。東北過白嶼河，北望銀冶山，又有黃羅螺盤、牛欄山，七十里至檀州。

自北漸入山，五十里至金溝館。將至館，川原平廣，謂之金溝淀，國主嘗於此過冬。自此入山，詰曲登（涉）（陟），無復里堠，但以馬行記日景而約其里數。過朝鯉河，亦名七度河，九十里至古北口。兩旁峻崖，中有路，僅容車軌；口北有鋪，設弓連繩，本范陽防扼奚、契丹之所，最為隘束。然幽州東趨營、平州，甚平坦，自頃犯邊，多由斯出。又度德勝嶺，盤道數層，俗名思鄉嶺，八十里至新館。過雕窠嶺、偏槍嶺，四十里至卧如來館，蓋山中有卧佛像故也。過烏灤河，東有灤州，因河為名。又過墨斗嶺，亦名渡雲嶺，長二十里許。又過芹菜嶺，七十里至柳河館，河在館旁。西北有鐵冶，多渤海人所居，就河灑沙石，鍊得成鐵。渤海俗，每歲時聚會作樂，先命善歌舞者數輩前行，士女相隨，更相唱和，回旋宛轉，號曰“踏鎚”。所居室，皆就山牆開門。過松亭嶺，甚險峻，七十里至打造部落館。惟有番戶百餘，編荆為籬，鍛鐵為軍器。東南行，五十里至牛山館。八十里至鹿兒峽館。過蝦蟆嶺，九十里至鐵漿館。過石子嶺，自此漸出山，七十里至富谷館，居民多造車者，云渤海人。正東望馬雲山，山多禽獸、林木，國主多於此打圍。八十里至通天館。二十里至中京大定府，城垣庫小，方圓纔四里許。門但重屋，無築闌之制。南門曰朱夏，門內夾道步廊，多坊門。又〔有市樓四：曰天方、大衢、通闕、望闕。次至大同館，其北門〕曰陽德、閭闔。城內西南隅岡上有寺。城南有園圃，宴射之所。

自過古北口，即蕃境。居人草庵板屋，亦務耕種，但無桑柘；所種皆從隴上，蓋虞吹沙所壅。山中長松鬱然，

深谷中多燒炭為業。時見畜牧，牛、馬、橐駝，尤多青羊，黃豕，亦有挈車帳，逐水草射獵。食止糜粥、抄糲。

富鄭公行程錄

富鄭公之使北朝也，自中京正北八十里至臨都館。又四十里至官寮館。又七十里至松山館。又七十里至崇信館。又九十里至廣寧館。又五十里至姚家寨館。又五十里至咸寧館。又三十里度潢水石橋，旁有饒州，蓋唐朝嘗於契丹置饒樂州也，今渤海人居之。又五十里至保和館。度黑河，七十里至宣化館。又五十里至長泰館，西二十里許有佛寺民(社)[舍]，云即祖州，亦有祖山，山中有阿保機廟。又四十里至上京臨潢府。自過崇信館，即契丹舊境，蓋其南皆奚地也。入西門，門曰金德，內有臨潢館。子城東門曰順陽，入門北行至景福門，又至承天門，內有昭德、宣政二殿，皆東向，其甍廡亦皆東向。臨潢西北二百餘里，號涼淀，在漫頭山南，避暑之處，多豐草，掘丈餘，即堅冰云。

余尚書北語詩

余靖尚書使契丹，為北語詩，契丹愛之。再往，益親。余詩云：“夜筵設罷^①臣拜洗，^②兩朝厥荷^③情幹勒。^④微臣雅魯^⑤祝若統^⑥聖壽鐵擺^⑦俱可忒。^⑧”國主舉大杯，謂余曰：“能道此，余為卿飲。”復舉之，國主大笑，遂為醕觴。

①侈盛也。 ②受賜也。 ③通好也。 ④厚重也。 ⑤拜舞也。
⑥福佑也。 ⑦高高也。 ⑧無極也。

刁奉使北語詩

刁約使契丹，為北語詩云：“押燕移離畢，^①看房賀跋支。^②餞行三匹裂，^③密賜十貔狸”。^④

①移離畢，官名，如中國執政。 ②賀跋支，如執政防閑。 ③匹裂，似小木罽，以木為之，加黃漆。 ④形如鼠而大，穴居，食穀粟，嗜肉。北朝為珍膳，味如豚肉而脆。

契丹國志卷之二十五

胡嶠陷北記

同州郃陽縣令胡嶠，居契丹七年，周廣順三年，亡歸中國，略能道其所見。云：“自幽州西北入居庸關。明日，又西北入石門關，關路崖狹，一夫可以當百，此中國控扼契丹之險也。又三日，至可汗州，南望五臺山，其一峰最高者，東臺也。又三日，至新武州，西北行五十里有雞鳴山，云唐太宗北伐聞雞鳴于此，因以名山。明日，入永定關北，此唐故關也。又四日，至歸化州。又三日，登天嶺，嶺東西連亘，有路北下，四顧冥然，黃雲白草，不可窮極。契丹謂嶠曰：‘此辭鄉嶺也，可一南望而為永訣。’同行者皆慟哭，往往絕而復蘇。又行三四日，至黑榆林。時七月，寒如深冬。又明日，入斜谷，谷長五十里，高崖峻谷，仰不見日而寒尤甚。已出谷，得平地，氣稍溫。又行二日，渡涅水。又明日，渡黑水。又二日，至湯城淀，地氣最溫，契丹苦太寒，則就溫於此。其水泉清冷，草軟如茸，可

藉以寢，而多異花，記其二種：一曰早金，大如掌，金色燦人；一曰青囊，如中國金燈，而色類藍，可愛。又二日至儀坤州，渡麝香河。自幽州至此無里堆，其所向不知為南北。又二日，至赤崖。蕭翰與世宗兀欲相及，遂及述律后，^①戰於沙河，述律兵敗而北，兀欲追至獨樹渡，遂囚述律于撲馬山。又行三日，遂至上京，所謂西樓也。西樓有邑屋市肆，交易無錢而用布。有綾、錦諸工作，(官)(宦)者、翰林、伎術、教坊、角觝、秀才、僧尼、道士等，皆中國人，而并、汾、幽、薊之人尤多。自上京東去四十里，至真珠寨，始食菜。明日東行，地勢漸高，西望平地松林，鬱然數十里。遂入平(州)(川)，多草木，始食西瓜，云契丹破回紇得此種，以牛糞覆棚而種，大如中國冬瓜而味甘。又東行，至裏潭，始有柳，而水草豐美；有息雞草尤美而本大，馬食不過十本而飽。自裏潭入大山，行十餘日而出，過一大林，長二三里，皆蕪蕩，枝葉有芒刺如箭羽。其地皆無草。兀欲時卓帳于此，會諸部人葬太宗。自此西南行，日六十里，行七日，至大山門，兩高山相去一里，而長松、豐草、珍禽、異獸、野卉，有屋室碑石，曰：‘陵所也。’兀欲入祭，諸部大人惟執祭器者得入，入而門闔。明日開門，曰‘拋盡’，禮畢。問其禮，皆秘不肯言”。嶠所目見囚述律，葬太宗等事，與中國所記差異。

已而翰得罪被鎖，嶠與部曲東之福州。福州，翰所治也。嶠等東行，過一山名十三山，云此西南去幽州二千里。又東行數日，過衛州，有居人三十餘家，蓋契丹所據中國衛州人築城而居之。嶠至福州，而契丹多憐嶠，教其

逃歸，嶠因得其諸國種類遠近。云：“距契丹國東至于海，有鐵甸，其族野居皮帳，而人剛勇。其地少草木，水鹹濁，色如血，澄之久而後可飲。又東女真，善射，多牛、鹿、野狗。其人無定居，行以牛負物，遇雨則張革為屋。常作鹿鳴，呼鹿而射之，食其生肉。能釀糜為酒，醉則縛之而睡，醒而後解，不然則殺人。又東南渤海，又東遼國，皆與契丹略同。其南海曲，有魚鹽之利。又南奚，與契丹略同，而人好殺戮。又南至于榆關矣。西南至儒州，皆故漢地。西則突厥、回紇。西北至嫺厥律，其人長大，髦頭，酋長全其髮，盛以紫囊。地苦寒，水出大魚，契丹仰食。又多黑、白、黃貂鼠皮，北方諸國皆仰足。其人最勇，鄰國不敢侵。又其西轄戛，又其北單于突厥，皆與嫺厥律略同。又北黑車子，善作車帳，其人知孝義，地貧無所產。云契丹之先，常役回紇，後背之，走黑車子，始學作車帳。又北牛蹄突厥，人身牛足。其地尤寒，水曰瓠盧河，夏秋冰厚二尺，春冬冰徹底，常燒器銷冰，乃得飲。東北至韃劫子，其人髦首，披布為衣，不鞍而騎，大弓長箭，尤善射，遇人輒殺而生食其肉，契丹等國皆畏之。契丹五騎遇一韃劫子，則皆散走。其國三面皆室韋，一曰室韋，二曰黃頭室韋，三曰獸室韋。其地多銅、鐵、金、銀，其人工巧，銅、鐵諸器皆精好，善織毛錦。地尤寒。馬溺至地成冰堆。又北狗國，人身狗首，長毛不衣，手搏猛獸，語為犬嗥，其妻皆人，能漢語，生男為狗，女為人，自相婚嫁，穴居食生，而妻女人食。云嘗有中國人至其國，其妻憐之，使逃歸，與其筋十餘隻，教其每走十餘里遺一筋，狗夫追之，見其家物，必銜而歸，

則不能追矣。”其說如此。又曰：“契丹嘗選百里馬二十匹，遣十人齎乾餼北行，窮其所見。其人自黑車子，歷牛蹄國以北，行一年，經四十三城，居人多以木皮為屋。其語言無譯者，不知其國地、山川、部族名號。其地氣遇平地則溫和，山林則寒冽。至三十三城，得一人，能鐵旬語，其言頗可解，云地名頡利烏于邪堰。云‘自此以北，龍蛇、猛獸、魑魅羣行，不可往矣’。其人乃還，此北荒之極也。”

契丹謂嵯曰：“夷狄之人豈能勝中國？然晉所以敗者，主暗而臣不忠。”因具道諸國事，曰：“子歸悉以語漢人，使漢人努力事其主，無為夷狄所擄，吾國非人境也。”嵯歸，錄以為記云。

①太祖之后。

張舜民使北記

殺狐林

契丹主太宗怒晉出帝不稟北命，擅登大寶，自將兵南下，執出帝并母、后、大臣北歸。於鄴西愁死崗得疾，至樂城殺狐林而崩。其〔愁死〕崗者，本陳思王不為文帝所容，於此悲吟，號愁思崗，〔託〕〔訛〕為“愁死”。殺狐林者，村民林中射殺一狐，因以名之。

兜玄國

契丹上京曾有人忽見二青衣駕赤犢出耳中，別有天

地，花木繁茂，云兜玄國也。

割 馬 肝

張舜民使契丹，是時耶律永興、姚跋洞二人接伴，舜民因問：“北馬有割去肝者，遂無病能行，果否？”答云：“有之。其法飲以醇酒，於腋間破之，取去少肉，然亦十喪八九。”

雕 窠 生 獵 犬

舜民又問：“北地雕窠中生獵犬，果否？”答云：“亦有之，然極難得。今駕前有二隻，其性頗異，每獵而獲，十倍於常犬。”

吹 葉 成 曲

胡人吹葉成曲，以番歌相和，音韻甚和。

銀 牌

銀牌形如方響，刻蕃書“宜速”二字，使者執牌馳馬，日行數百里，牌所至，如國主親到，需索更易，無敢違者。

佛 妝

北婦以黃物塗面如金，謂之“佛妝”。

以 車 渡 河

過盧溝河，伴使云：“恐乘輜危，莫若車渡極安，且可速濟。”南人不曉其法。

契丹國志卷之二十六

諸蕃記

奚國

太祖初興，擊奚滅之，復立奚王，而使契丹監其兵，後為中京。詳見前志。

古肅慎國

古肅慎城，方五里，在渤海國三十里，遺堞尚在。

室韋國

“室”或為“失”，蓋契丹之類，其南者為契丹，在北者號為室韋。路出和龍北千餘里，入契丹國。與奚、契丹同。夏則城居，冬逐水草，有南室韋、北室韋。其俗，丈夫皆披髮，婦人皆盤髮，衣服與契丹同，乘牛車，以蓬蔕為屋，如甌車狀。度水，則束薪為楫，或有以皮為舟者。馬則織草為鞵，結繩為轡。氣候多寒，田收甚薄。惟麋鹿射

獵為務，食肉衣皮，鑿冰沒水中，而網取魚鼈。地多積雪，懼陷院穿，騎木而行。太祖併諸蕃三十六國，室韋在其中。

新羅國

新羅在高麗國東，本漢時樂浪地。其言語、名物有似中國人，名“國”為“邦”，“(宮)(弓)”為“弧”，“賊”為“寇”，“行酒”為“行觴”，相呼皆為“徒”。文字、甲兵同於中國。選人壯健者悉入軍。每月旦相賀，王設宴會，班賚羣官。有大事，則聚官詳議定之。田甚良沃，水陸兼種。服色尚素，婦人辮髮繞頭，以雜綵及珠為飾。婚嫁唯酒食而已，輕重隨貧富。新羅國王誦，自契丹承天皇后初臨朝入貢。其後王誦為部下所殺，立其弟詢。契丹以王詢不進貢，興兵北討，十年方罷兵，新羅依舊朝貢。

高昌國

高昌都交河城，漢車師前王庭也。四面多大山，晉以其地為高昌郡。地石磧，氣候溫暖，厥土良沃，麥一歲再熟，宜蠶。有草名羊刺，其上生蜜而味甚佳。引水溉田。出赤鹽，其味甚美。俗事天神，兼信佛法。其官有八長史，有五將軍，又有侍郎、校郎、主簿、從事，階位相次。契丹時，三年一次朝貢，進獻玉、珠、乳香、斜合、黑皮、褐里絲等。亦有互市，其國主親與北主評價。

女 真 國

女真，世居混同江之東山，乃鴨綠水之源。東瀕海，南鄰高麗，西接渤海，北近室韋。其地乃肅慎故區也。地方數千里，戶口十餘萬，無大君長，立首領，分主部落。地饒山林，田宜麻穀，土產人參、蜜蠟、北珠、生金、細布、松實、白附子，禽有鷹、鶴、海東青之類，獸多牛、馬、麋、鹿、野狗、白鼯、青鼠、貂鼠。後為契丹所制，擇其酋長世襲。又於長春路置東北統軍司，黃龍府置兵馬都部署司，咸州置詳穩司，分隸之，役屬於契丹。其後常遣銀牌天使至女真，每夕必欲薦枕者，其國舊輸中、下戶作止宿處，以未出適女待之。後求海東青使者絡繹，持大國使命，惟擇美好婦人，不問其有夫及閹閹高者，女真浸忿遂叛。

黃 頭 女 真

黃頭女真，皆山居，號合蘇館女真。合蘇館，河西亦有之。有八館，在黃河東，與金粟城、五花城隔河相近。其人獷樸勇鸞，不能別死生，契丹每出戰，皆被以重札，令前驅。髭髮皆黃，目睛多綠，亦黃而白多。

嗶 熱 國

嗶熱者，國最小，不知其始所居。後為太祖徙置黃龍府南百餘里，曰賓州，州近混同江，即古之粟末河，黑水也。部落雜處，以其族類之長為千戶，統之契丹。〔女真〕貴游子弟及富家兒，月夕被酒，則相率攜樽馳馬，戲飲其

地。婦女聞其至，多聚觀之，間令侍坐，與之酒則飲，亦有起舞歌謳以侑觴者。邂逅相契，調諫往反，即載以歸，婦之父母知亦不為之顧。留數歲有子，始具茶食酒數車歸寧，謂之“拜門”，因執子壻之禮。其俗謂男女自媒，勝於納幣而婚者。飲食皆以木器，好真蠱，他人欲其不驗者，云三彈指於器上則其毒自解，亦間有遇毒而斃者。族多姓李。

渤海國

渤海國，去燕京東北千五百里，以石累城脚，東並海。其王舊以大為姓，右姓曰高、張、楊、寶、烏、李，不過數種，部曲、奴婢無姓者，皆從其主。婦人皆悍妬，大抵與他姓相結十姊妹，迭幾察其夫，不容側室及他游，聞則必謀真毒，死其所愛。一夫有所犯而妻不之覺者，衆人則羣聚而誦之，爭以忌嫉相誇。男子多智謀，驍勇出他國右，至有“三人渤海當一虎”之語。自天祚之亂，金人陷城，慮其難制，轉徙他所，其人大怨。宮室安居踰二百年，往往為園池，植牡丹，多至三二百本，有數十餘叢生者，皆燕地所無，纔以十數千或五千賤質而去。其居故地者，仍〔歸〕契丹，舊為東京，置留守，有蘇、扶（復）等州，蘇與宋登州、青州相直，每大風順，隱隱聞鷄犬聲。

契丹國志卷之二十七

歲時雜記

正旦

正月一日，國主以糯米飯、白羊髓相和為團，如拳大，於逐帳內各散四十九箇，候五更三點，國主等各於本帳內窗中擲米團在帳外，如得雙數，當夜動蕃樂，飲宴；如得隻數，更不作樂，便令師巫十二人，外邊繞帳撼鈴執箭唱叫，於帳內諸火爐內爆鹽，并燒地拍鼠，謂之“驚鬼”。本帳人第七日方出。乃穰度之法。北呼此謂之“妳捏離”，漢人譯云，“妳”是“丁”，“捏離”是“日”。

立春

立春日，婦人進春書，以青繒為幟，刻龍象銜之，或為蝦蟆。

人 日

人日，京都人食煎餅於庭中，俗云“薰天”。未知所從出也。

中 和

二月一日，大族姓蕭者，並請耶律姓者，於本家筵席。北〔呼此〕節為“轄里忒”，漢人譯云“轄里”是“請”，“忒”是“時”。

上 巳

三月三日，國人以木雕為兔，分兩朋走馬射之。先中者勝，其負朋下馬，跪奉勝朋人酒，勝朋於馬上接盃飲之。北呼此節為“淘裏化”，漢人譯云“淘裏”是“兔”，“化”是“射”。

佛 誕 日

四月八日，京府及諸州，各用木雕悉達太子一尊，城上昇行，放僧尼、道士、庶民行城一日為樂。

端 五

五月五日午時，採艾葉與綿相和，絮衣七事，國主著之，蕃漢臣僚各賜艾衣三事。國主及臣僚飲宴，渤海厨子進艾糕，各點大黃湯下。北呼此節為“耐賽籬”。又以雜絲結合歡索，纏于臂膊，婦人進長命縷，宛轉皆為人象，帶

之。

朝 節

夏至日，婦人進扇及粉脂囊。

三 伏

六月十八日，大族耶律姓並請蕭姓者，亦名“瞎里厨”。

中 元

七月十三日夜，國主離行宮，向西三十里卓帳宿。先於彼處造酒食，至十四日，應隨從諸軍並隨部落動番樂，設宴至暮，國主却歸行宮，謂之“迎節”。十五日動漢樂，大宴。十六日早，却往西方，令隨行軍兵大喊三聲，謂之“送節”。此節為“賽離捨”，漢人譯云“賽離”是“月”，“捨”是“好”。謂“月好”也。

中 秋

八月八日，國主殺白犬於寢帳前七步，埋其頭，露其嘴。後七日，移寢帳於埋狗頭上。北呼此節為“捏褐妳”，漢人譯云“捏褐”是“狗”，“妳”是“頭”。

重 九

九月九日，國主打團斗射虎，少者輸重九一筵席。射罷，於地高處卓帳，與番漢臣登高，飲菊花酒。出兔肝切

生，以鹿舌醬拌食之。北呼此節為“必里遲離”，漢人譯云“九月九日也”。又以茱萸研酒，灑門戶間辟惡。亦有人鹽少許而飲之者。又云男摘二九粒，女一九粒，以酒咽者，大能辟惡。

小 春

十月內，五京進紙造小衣甲并槍刀器械各一萬副。十五日一時推塚，國主與押番臣寮望木葉山^①奠酒拜，用番字書狀一紙，同焚燒奏木葉山神，云“寄庫”。北呼此時為“戴粹”，漢人譯云“戴”是“燒”，“粹”是“甲”。

冬 至

冬至日，國人殺白羊、白馬、白雁，各取其生血和酒，國主北望拜黑山，奠祭山神。言契丹死，魂為黑山神所管。又彼人傳云：凡死人，悉屬此山神所管，富民亦然。契丹黑山，如中國之岱宗。云北人死，魂皆歸此山。每歲五京進人、馬、紙物各萬餘事，祭山而焚之。其禮甚嚴，非祭不敢近山。

臘 月

臘月，國主帶甲戎裝，應番漢臣諸司使已上並戎裝，五更三點坐朝，動樂飲酒罷，各等第賜御甲、羊馬。北呼為“杪離忒”，漢人譯云“杪離”是“戰”，“忒”是“時”。是“戰時”也。

治 盜

正月十三日，放國人做賊三日，如盜及十貫以上，依法行遣。北呼為“鶴里吋”，漢人譯云“鶴里”是“偷”，“吋”是“時”。

行 軍

契丹行軍不擇日，用艾和馬糞，於白羊琵琶骨上炙，炙破便出行，不破即不出。

午 日

契丹出軍，每遇午日起程，如不用兵，亦須排辦，望西大喊七聲，言午是北朝大王之日。

旋 風

契丹人見旋風，合眼，用鞭望空打四十九下，口道“坤不刻”七聲。

舍 利

契丹富豪民要裹頭巾者，納牛、駝十頭，馬百匹，并給契丹名目，謂之“舍利”。

跪 拜

男女拜皆同，其一足跪，一足着地，以手動為節，數止於三。彼言“捏骨地”者，即“跪”也。

長白山

長白山，在冷山東南千餘里，蓋白衣觀音所居。其山禽獸皆白，人不敢入，恐穢其間，以致蛇虺之害。黑水發源於此，舊云粟末河，太宗破晉，改為混同江。其俗剝木為舟，長可八尺，形如梭，曰“梭船”，上施一槳，止以捕魚；至渡車，則方舟或三舟。

澤蒲

西樓有蒲，瀕水叢生，一幹葉如柳，長不盈尋丈，用以作箭，不矯揉而堅，《左氏》所謂“董澤之蒲”是也。

回鶻豆

回鶻豆，高二尺許，直幹，有葉無旁枝，角長二寸，每角止兩豆，一根才六七角，色黃，味如粟。

螃蟹

渤海螃蟹，紅色，大如碗，螯巨而厚，其脆如中國蟹螯。石鱖，鮫魚之屬，皆有之。

①葬太極處。

校點後記

《契丹國志》二十七卷，又稱《遼志》或《契丹志》，舊題宋葉隆禮撰，是目前除官修《遼史》之外，僅存的記述遼代218年歷史較有系統的記傳體史學著作。

作者葉隆禮，字士則，號漁林，嘉興人，宋理宗淳祐七年進士。十年十月，以承奉郎任建康西廳通判。十二年十月改除國子監簿。開慶元年十月調兩浙轉運判官，再以兩浙轉運判官兼知臨安府，轉朝奉大夫。景定元年除軍器監，兼職如故，不久除直寶文閣，知紹興府，宋末謫居袁州，入元后隱迹無考。

本書不見于陳振孫《直齋書錄題解》及《宋史·藝文志》，元袁桷《清容集》卷四十一有《修遼金宋史搜訪遺書條例事狀》，所列遺書凡一百四十餘種，亦不見此書。然元蘇天爵《滋溪文稿》卷二十五《三史質疑》已論及此書，《千頃堂書目》卷三亦有著錄，且注為元人葉隆禮撰。或以為葉氏入元之後整理刊行，始公諸于世。

本書多為撮錄司馬光《資治通鑒》、李燾《續資治通鑒長編》、薛居正《舊五代史》、歐陽修《新五代史》，以及徐夢辛《三朝北盟會編》、洪皓《松漠紀聞》、武圭《燕北雜記》

《契丹疆宇》等書而成。而這些書，至今有的尚有節本，有的已全部散佚，皆因《契丹國志》以存，校勘拾遺，有補于遼代歷史的研究，功不可掩。更重要的是其比官修之《遼史》還約早百年，又是《遼史》資料的重要來源，可補證《遼史》之闕誤，溯其淵源具有一定意義。

《契丹國志》版本，現存者以北京圖書館藏黃丕烈跋元刻本為最古。士禮居藏元刻先後兩部，皆殘本：一得之鮑渌飲，以述古堂藏曹彬侯手抄本抄補，后歸鋼琴鐵劍樓；一易之試飲堂顧氏，亦以抄本補配並手校。另有清乾隆五十八年承恩堂刊本，嘉慶二年長沙席氏掃葉山房刻《四朝別史》本，系出《四庫》，與元本及抄本不同，不惟刪去胡安國說及上方小字標目，文中觸目字樣亦經改易。民國二十二年北平文殿閣據席本排印《國學文庫》本，以席本流傳最廣，另有一些明、清的抄本。長洲章鈺以海豐吳氏藏汪士鐘藝芸精舍影抄元刊本，及掃葉山房本手校一過。我們這次以黃丕烈本為底本，刪去小字標目，參校其他抄、刻本進行整理。

凡底本誤脫衍亂之處，統一以（ ）標示誤衍之字，以 [] 出其正補文字，以存其真。原書目錄與內文不全相應者，一仍其舊，不敢臆改。囿于水平、謬誤之處，尚祈讀者教正。

校點者

1999年2月